

九國志

附拾遺

九國志總目

卷一

吳臣傳三十二首

卷二

吳臣傳十八首

卷三

吳臣傳四首

卷四

南唐臣傳一首

卷五

吳越臣傳五首

卷六

前蜀臣傳十八首

卷七

後蜀臣傳二十七首

卷八

東漢臣傳五首

卷九

南漢臣傳八首

卷十

閩臣傳八首

卷十一

楚臣傳十九首

卷十二

北楚臣傳一首

按宋史路振傳振字子發永州祁陽人淳化中以扈
言日出賦擢甲科真宗時知制誥嘗採五代僭偽吳
南唐吳越前後蜀東南漢閩楚九國君臣行事作世
家列傳未成而卒王應麟云書凡四十九卷其孫綸
增入荆南高氏于治平元年六月辛酉上之詔付史
館實十國也陳振孫書錄解題則云末二卷爲北楚
張唐英補撰合五十一卷宋藝文志及馬端臨經籍
考總題爲路振九國志五十一卷俱不及其孫蓋綸

雖經增輯而當時所傳播者則唐英補撰也書仍路氏之舊故不改舊名其書向無刊本惟散見永樂大典中邵二雲太史摘錄散篇欲爲編輯因闕軼過半不果成乙未冬二雲南旋留稿于孔荏谷農部處今年夏荏谷出底本屬予編次雖卷帙殘缺而所存諸傳俱首尾完善可補五代正史之遺因爲分國類敘得列傳一百三十六首釐爲十二卷並補世家目於卷首且於目下略注始末以便檢閱吉光片羽當亦嗜古者所同珍也乾隆四十一年歲在丙申十二月二十六日有香周夢棠識于宣武門內貝璽衡衡之因居是日立春

九國志卷一

守山閣叢書 史部

宋路振撰

金山錢熙祥錫之校

吳

太祖以唐景福元年再入揚州至唐帝五福三年爲

南唐所篡蓋晉天福二年也歷傳四主凡四十六年

世家

太祖

姓楊名行密初名行慰字化源

唐末亂化源三年入揚州唐以爲淮南節

南留後景福元年七月再入揚州唐以爲淮南節

度使乾寧二年封宏農王天復二年進爵吳王天

祐二年十一月庚辰薨年五十四謚曰武忠武義

初改謚曰孝武王廟號太祖乾貞元年追尊爲武

皇帝陵曰興陵

高祖

名隆演初名藏又名渭字鴻源行密第二子唐

烈祖

名渥字承天行密長子唐末祐二年冬嗣位五

年五月戊寅爲張顥徐溫所弑年二十三謚曰

威武義初改謚景王廟號烈祖乾貞元年追尊爲景皇帝陵曰紹陵

天祐爲武義元年二年五月巳丑薨年二十四
謚曰宣乾貞元年尊爲高祖宣皇帝陵曰肅陵

睿帝

名溥行密第四子武義二年六月戊申嗣位改
元順義乾貞元年稱帝天祚三年禪位南唐昇

元二年十月辛丑薨年二十八追謚曰睿皇帝葬
平陵凡改元四順義六年乾貞二年太和六年天
祚三年

列傳

袁襲劉威陶雅李神福臺濛

張訓李遇劉金秦裴馬珣

劉存李簡柴再用陳璋侯纘

朱景張崇王綰王稔李厚

陳知新李虔裕

袁襲

襲廬江人少好學善屬文淵明緯象秦畢之亂高駢辟行密爲行軍司馬俾率所部赴難行密猶豫不行襲言于行密曰高駢倦于政事聽惑妖妄彥等雖以誅呂用之爲名觀其事乃以暴易亂耳寧知非天將贊于公耶行密善其言乃移檄諸州誘集徒衆將兵數萬長驅至廣陵秦畢害駢襲勸行密縞素舉哀于城下衆皆義之及破賊入城招輯編戶會孫儒兵至行密問計于襲曰今城壁未完賊且盛若儒至圍城是重擾民也不如且避之先是海陵將高霸擁衆來附行密將令以兵屯天長扼儒來路襲謂行密曰霸擁大衆心持兩端若使居天長是自扼也可因犒其士卒擒而斬之行密遂斬霸而併其兵行密聞孫儒至復欲遁歸海陵襲曰不若歸合

肥繕甲兵再議攻取今稽乾象公必再來及孫儒逼城行密果自天長返謂襲曰無子吾幾不得歸行密平宣州獲趙錙留與其弟同館錙與梁祖有素果遣使來求錙時襲寢疾行密使人問襲襲曰但斬首送之必無慮也未幾卒襲剛忍好克每欲殺人必折節下之行密哭之曰吾每恤刑而襲好殺享年不永深可哀也

卷一萬八千一百三十四第二頁

劉威

威廬州慎縣人少爲小吏豪爽有志節與田頔陶雅俱爲行密奔走之舊行密起淝上及平秦畢有功表領賓州刺史大順初與安仁義敗孫儒別將劉建鋒于武進其後儒兵益集威與頔屢爲所敗行密將歸銅官威曰今衆寡勢殊難與爭

然儒焚室掃壘絕後而來糧若不繼何從供饋公宜勿與戰
堅壁以禦之坐待其弊行密然之儒果敗乾寧初表授廬州
刺史及行密承制封拜就遷淮南節度副使行軍司馬東西
行營副都統未幾加使相天祐三年授鎮南軍節度使撫州
危全諷率虔吉撫信之衆十餘萬將復鍾傳舊地時州兵無
多士庶大駭威獨傲然曰縱酣飲全諷屯象牙潭不敢輕進
及周本破全諷四州初平渭令威巡視四境撫諭而還先是
行密疾病問周隱以後事隱以威爲請威初聞不能無意及
移鎮鍾陵復多專刑徐溫請討威威聞之沮喪計無所出有
幕客黃訥謂威曰公受謫雖深反本無狀能挺身入覲必解
前疑也威曰善遂遣訥爲先容渭果復令之鎮天祐十一年

卒于鎮年五十八

卷一萬八千一百三十四第三頁

陶雅

雅字國華合肥人本儒家子儀形魁偉眉目甚秀乾符中天
下將亂始投筆和門會西蕃入寇徵四方兵防秋靈夏雅與
行密肥上軍偕往未幾改隸諸葛爽征沙陁有功從爽鎮河
陽還補廬州衝山指揮使行密據合肥遣雅平鄉盜秦定過
修已等遷八營主將光啓初破桐城吳迴擊李本于柳子山
乘勝攻舒州下之以雅爲舒州刺史爲蔡盜許勅潛兵夜至
雅奔歸文德初從行密破趙錙授池州刺史大順中破孫儒
軍于人頭山儒平授常州刺史遷池州團練使田頔攻歙州
時給事中裴樞守新安將歸款于行密以宣州副使魯卽往

代之是時諸將授郡鮮不以虐斂爲事惟雅寬厚人多便之
樞因遣問政山人聶師道往說頽曰苟得池陽陶牧爲守州
人孰不承命頽驛報行密因令雅治新安入見樞盡州郡禮
樞奇之及樞至京師奏雅爲歙州刺史天復三年田頽以宣
州叛雅以州兵助臺濠伐之頽出戰橋陷墮馬爲帳下小卒
許渥王綬所殺宣州平兼西南面招討使先是順義軍使汪
武聚盜據婺源行密以爲滁州刺史婺源歙屬邑武恃險未
嘗謁雅及頽叛武多行剽劫至是雅移檄聲言討洪饒由婺
源往武引弟姪十餘人就路迎謁雅顧左右擒殺之緩轡入
其營中無敢動者天祐初陳詢以陸州歸款吳越遣萬衆攻
詢雅率兵救之軍士夜驚多踰營遁去將吏白雅欠伸不應

乃下令曰明日有軍士不在營者俱斬果遞相傳告未頃而定明年破婺州虜越州刺史沈夏以功遷衢睦團練使江南都招討會宣州王茂章叛奔越雅虜茂章伏兵斷其歸路乃令大將軍金師會領睦州事遂班師新安而越兵大至衢睦婺三州復沒八年移鎮武昌雅利黥川殷阜上書寢之遂遙領武昌軍節度加同平章事知歙州團練觀察等事十年八月卒于任年五十七雅性沉靜好讀書手不釋卷雖臨陣敵常褒衣博帶自幼年戲弄未嘗有椎刀傷手及爲大將每矢石交飛終莫能中接賓佐有禮事兄弟以孝敬非公宴不舉音樂疏財重士人以此歸之典黥川二十餘年民感其化生男女或以陶爲字焉

卷一萬八千一百
三十四第三頁

李神福

神福洺州人幼執親喪哀毀過瘠鄉里異之及長沈厚勇敢唐末四境交募助兵因隸上黨軍籍時高駢兼諸道行營都統神福從州將王重屯淮海因投于行密中和中同安賊陳儒攻刺史高燹遣使來告行密未能救謀于神福對曰此羣盜爲合易與耳公但聲言赴援可不勞尺刃爲公解之乃請本軍旌旗間道以入旣夕引州兵出外各持旌旗入列大陣之狀儒果夜遁行密大奇之光啓二年壽州張勣叛寇淝上神福率兵與戰敗之于楮城秦畢之亂高駢召行密因遣神福諭曲谿劉金旰賈令威各以義兵來附破秦畢軍神福功居多會選卒爲黃頭軍遷神福爲左右黃頭都尉龍紀中

涇縣王賞太平嵇常滿俱聚盜剽鄉里神福引兵破之但誅其首惡餘皆不問大順二年孫儒前鋒兵屯漂水行密遣神福將兵禦之神福謂諸將曰兵倍不戰況儒衆十倍于我當且避其銳以驕之乃退舍而儒衆果怠神福乃選銳卒躋險夜襲之果大潰又擊儒要山寨破之擒其將李宏以功改左游奕將銅官鎮遏使田頔爲孫儒所敗行密欲退守銅官神福諫曰儒掃境而來利在速戰宜堅壁清野以老其師神福願以本軍據險結柵時出輕騎抄其糧運彼前不得戰退無儲糧此送死之道行密曰善因以神福爲宣池兩路都游奕使是夏儒食盡果敗以功奏授左千牛衛將軍景福二年廬州刺史蔡儔叛遣何壤來寇神福迎擊于青牛山大破之遂

傳城下賊平遷左衙都校未幾授舒州刺史天福元年與呂師造攻臨安錢鏐使顧全武來援神福退師令羸老行又令師造設伏青山路自將一軍殿後夜未半全武果盡銳來追神福僞北走伏軍發前返來攻越軍大敗擒全武復攻臨安久不克先是神福遣使護鏐先塋禁其樵採及獲全武又遣通家問越人皆感之因納其牒賂而返二年改昇州刺史行密以女妻其子承鼎三年攻杜洪于鄂州大敗洪軍時城中積荻山上神福謂將軍曰今夜焚此諸將皆不測是夕遣人乘舟載火炬至灞口分焚樹僞爲梁軍來援之狀城中焚荻應之諸將伏其智梁祖遣將韓勍率步騎萬餘屯灞口又令荆南以舟師赴援成汭盡衆浮江而下神福登岸望之曰舟

人雖盛然首尾懸絕宜急擊之乃迎戰大別山汭果敗溺水
死勅亦引衆遁去自是洪勢益孤會宣州田頴叛襲昇州劫
神福與帳下妻子俱歸宛陵厚養之以誘神福行密急書召
神福覽書袖之揚言曰鄂州尙未下又令急取荆南因號令
諸軍逮閭順流而下頴遣將王壇汪建以舟師援洪又別遣
人遺神福書約分地而治神福斬其使擊壇建破之復戰于
皖口又敗其衆浮尸棄舟蔽江而下壇建以輕舟遁去四年
以兵屯田梁加西面行營招討使光州團練使疾甚求醫于
江都卒年五十

卷一萬八千一百
三十四第八頁

臺濠

濠廬州合肥人少爲金牛鎮將行密據合肥始來歸從征秦

畢趙鏗俱破敵有功大順中馬敬言爲孫儒敗于廣德初儒與李從立乘勝至東谿時城守未固軍士大恐濠以一旅巡谿西會天晦詐令士卒傳諭往返者數四謂大衆屯集中夜皆遁去及儒柵陵陽濠於魯江五堰作輕舟餽糧終儒之世軍無飢色從行密歸廣陵以功遷楚州刺史乾寧三年破蘇州以濠守之越人水陸大至濠擊敗之錢鏐親率舟師至會糧盡濠拔衆遁歸光化二年行密初得昀山以濠爲海州刺史在任貪殘爲郡民所訴又爲田頔所譖降爲漣水制置使天復三年田頔叛于宣州行密歷數諸將無敵頔者乃謂濠曰非公莫可濠曰頔不守富貴自取滅亡濠今仗大王威武以順翦逆往必擒頔願王無慮行密大悅濠初入其境卽翻

陣以往軍士皆笑其怯濠曰顏宿將多謀當自過防翼日果
遇陣于廣德濠欲奪其銳先以行密書遺顏將校皆下馬拜
受因其擾亂濠麾衆擊之顏兵大敗乘勝遂圍宣城冬十月
顏出州外求戰登橋馬墜爲外兵所殺宣州平行密承制加
濠檢校太保宣州觀察使天祐元年卒于治所年五十

卷一
萬八

千一百三十
四第九頁

張訓

訓字克明滁州清流人身長八尺餘要帶十圍中和三年歸
行密于合肥行密訪以方略悅之令從石令言攻同川克其
城從田頔擊張勣于楮城入擊趙鐸昌山兵破之克宣州訓
功居多遷左右黃頭指揮使以所部戍廣德拒孫儒于黃池

從李神福襲歷陽下滁州孫儒焚廣陵悉銳攻宣州行密命
訓潛軍入廣陵滅其餘燬獲軍儲數十萬以賑飢民行密令
馬爽守廣陵爽叛爲諸將所殺城中大囂訓整師以出衆乃
定孫儒之起也毘陵守將劉建鋒從儒俱西土豪陳可言據
毘陵訓率兵奄至城下可言倉卒出迎訓于馬上手刃殺之
奪其兵入城中又率兵絕儒糧道于安吉馬頭儒敗訓論功
爲最景福九年從行密歸江都路經毘陵行密顧左右曰毘
陵大城也訓一劍下之不亦壯哉卽授温州刺史乾寧二年
屯兵漣水以備梁師劉知俊聚糧石場戍守皆潰盡焚其儲
積訓歸路出東海爲知俊所邀訓擊大破之青口之役吳師
悉起訓帥所部迎行密行密喜以兵千人令爲前鋒會朱瑾

假梁人兵鋒先入其壘訓登岸疾戰踰柵而入遂破龐師古軍以功授淮海遊奕使天復三年王茂章平密州以訓爲刺史會梁祖以大軍至訓謂諸將曰城孤師少何以待之皆欲焚城掠聚而去訓曰不可如此則我師難歸遂封府藏下懸門立虛幟于城上遣老弱居前訓自以銳兵殿其後梁軍前鋒至見城上旗多未敢逼數日方入城又見府庫城邑宴然如故亦不追之天祐七年遷黃州刺史卒于治所訓質直勇而多力曾渡毘陵西橋馬畏不渡乃持尾鬣舉之以濟然不恃其勇故多功保全焉

卷一萬八千一百三十四第十六頁

李遇

遇合肥人始事行密帳下光啓中禦梁軍于慎縣遇單騎按

梁率先破敵以伍長遷馬軍副指揮使從平秦畢趙鏌孫儒
皆有功遷淮南馬步諸軍都尉累遷常州刺史天復三年安
仁義以潤州叛夜襲毘陵仁義善射諸軍多畏避遇背城逆
戰仁義喪師自是不敢東顧天祐中宣州王茂章奔越乃以
遇爲淮南行軍司馬宣州團練使徐溫專政遇不能下之常
言曰徐溫何人吾所未識溫怒命柴再用將兵送王壇代遇
不受命再用攻其城逾月不克時宣王遣典客何夔說遇曰
公本圖反請斬夔以徇本無反心可隨納款遇聞王命遂開
門委命溫族之孫仁義方嬰爲人匿之而免李昇秉政以仁

義爲縣令

卷一 萬八千一百
三十五 第一頁

劉金

金淮陰洪澤人光啓中江淮兵亂從鄉酋李章保曲谿章死
金代有其衆行密營廣陵金盡以其衆來附破秦彥金有力
焉文德初從攻趙鐔于陵陽明年金度鐔必遁思以計擒之
因僞與鐔通好約爲外應鐔大以金帛爲遺復夜迎金入卧
內許妻以女金歸營慮鐔兵盛出不能制乃遣人臨城大譟
云劉郎不能與爾爲女壻也鐔聞之沮喪果宵遁大順中孫
儒寇宛陵行密遣金拒之屢破儒軍以功授滁州刺史行密
破鍾離移濠州刺史未幾遷團練使天祐二年卒子仁規嗣
仁規娶行密女渥襲位遷過口兩城使乾貞初授清淮軍節

度使

卷一萬八千一百
三十五第一頁

秦裴

裴慎縣人少驍勇頗涉獵以鷹隼爲事嘗云天上黃鷹地下黃金餘不足貴也行密起合肥因隸帳下大順元年奏授檢校左散騎常侍行密據廣陵以裴知楊子縣有虎入縣郭裴親殺以獻行密召裴賞之裴曰此衆共殺非獨能制也行密嘆曰勇而能謙必享富貴歷高郵無錫令俱有能名乾寧五年率兵破越崑山鎮以三千兵守之錢鏐遣顧全武引萬衆來復裴援絕全武以檄說裴裴封函納款全武頗自負召諸將聚觀全武曾爲僧發函乃佛經一卷全武大慙裴戰無虛日士卒多病傷死未幾糧盡告降錢鏐預設千人食以待之及出土卒不滿百鏐讓之曰軍孤衆寡何苦相拒裴曰但事君盡節死而後已今食盡歸命非本志也鏐大賞之因熟視

裴曰君有藩侯相他日必歸君餘勿爲念裴在越三年寂無歸耗忽一日裴遣人告行密遣李神福攻越臨安鏐遣顧全武方宇救之爲神福所擒明年行密送全武及宇易裴以歸天復三年從李神福攻鄂州荆南成汭乘大艦來援裴率兵沂流逆戰汭敗溺水死又攻田頔衆于吉陽磯以功授諸軍都尉從劉存攻夏口破之加昇州刺史天祐三年洪州鍾傳卒州人立其子匡時江州刺史延規傳之養子忿不得立以其郡納款因授裴西南面行營招討使攻匡時至蓼州時軍欲限水爲柵裴不聽匡時果遣將劉楚據之諸將相顧失色俱咎裴裴曰城中驍銳惟楚耳若令總衆拒守此城何由卒破吾固留此要害以謀致之旣而分軍晨出盡銳破柵旣擒

楚方傳于城下未幾城陷擒匡時以獻諸將皆服其智號令
嚴肅兵士無敢殺戮洪之士卒俱來就營求其戚屬爲出府
帛贖還之洪人感悅授洪州制置使張顥用事慮裴爲變急
召歸及湖口遇鄂帥劉存與潭軍戰沒復授裴鄂岳觀察使
會重午裴宴諸將而潭人入寇裴遣弟師鐸師虬乘戰艦先
往裴食訖登黃鶴樓以望乃以平頭舫顧小校曰但乘此卷
旗奪潭人船以戰及與師鐸軍合乃建大將旗潭人睥眄裴
因擊敗之六年入覲因求歸故里以民禮謁縣宰見里中故
老必拜坐以少長爲齒九年加武昌軍節度使遇疾求歸至
湓中卒年五十九裴在治七年積軍儲二十萬開青山大冶

公家仰足

卷一萬八千一百
三十四第十頁

馬 珣

珣廬江人少驍勇有機略初以貨財商于江都會泰畢圍城乃歸鎬鄒軍畢師鐸于城南立高樓以望城中呂用之患焉募壯士摧其樓珣應募夜半獨伏劍入賊營倒之用之厚賞遷十餘級行密入城聞其名錄爲偏將與朱延壽相友善乾寧初授珣舒州刺史移守漣水四年梁將朱友恭圍翟章于黃州命珣率兵援之黃州陷戰不利與張訓呂師造成知進石率等收散兵三百人自黃州間道緣分寧絕山谷而東道經撫州危全諷聞其來布四壘于路壘皆萬餘人珣語諸將曰彼謂我可坐縛也今與諸軍擊其中堅逐其軍帥取其資而食其穀可以歸矣會夜擊全諷之壘大破之全諷僅免乃

飲宴于賊營擇其利兵而用之明日廣張旗幟揚麾伐鼓從山直下衝其連營鋒若雷電賊皆潰走珣凱唱而歸謁行密言其戰行密罵之曰懦豎子何不遂據其城珣拜謝不敏珣滑稽好妓樂歌舞雖出師登騎俳諧不輟旣而卧疾謂所親曰若患愈當乞師數千可以蕩平西南夷獠俄而卒衆惜其智勇部下將校見其二子無不感慨申敬朱延壽錄其孤而字之延壽敗行密收其二子給與宅第

卷一萬八千一百二十四第十七頁

劉存

存陳州人少拳勇從行密起合肥破秦畢趙鏗皆有功孫儒入寇身先苦戰爲賊斷足三指而戰不輟翼日行密出城與儒戰存請先登行密諭以指痛不止因求皮履裹足而往是

日平儒以功遷壽州馬軍都尉乾寧中預破葛從周于淝河
遷舒州刺史改團練使天復中副李神福攻杜洪於江夏會
田頴叛遣將汪建王壇率舟師沂流而上存與神福下瀝池
磯逆戰爲流矢中目存戰自若建敗存殺獲俱多四年復攻
江夏時神福病歸存代爲招討使引十數騎巡城憩于高岡
張樂命飲酒酣鄂兵大至存以旗向江三招而止鄂人望之
屹然有頃自退軍中服其詹略存急焚鄂城樓梁援兵將突
圍而出諸將欲急擊之存曰擊之賊必復入復入則城會固
矣不若聽其遁去諸將皆曰善是日城陷擒杜洪父子斬于
廣陵市以功授淮南行軍司馬鄂岳都團練使天祐四年率
舟師攻潭州大雨不止軍回至瀏陽爲潭人所敗執存以歸

馬殷親解其縛欲授以官存大詔曰汝昔歲宣城潰散偶漏
我鋒刃今反欲臣我耶殷知不可留乃斬之唐保大中邊鎬
平湖南遣使就墳致祭贈宣武軍節度使武衛上將軍

卷一
萬八

千一百三十
四第四頁

李簡

簡上蔡人有膽勇資質瓌偉始隸陳蔡軍中趙鏐選武幹之
士因任爲帳下親信龍紀初鏐爲行密所圍糧盡將逸簡給
守門者得出因奔行密補黑雲隊長大順二年孫儒寇廣德
行密將逆戰會夜屯于行密柵及旦儒軍圍之數重率百餘
人挺身突戰自外破柵拔行密以出遷黑雲都指揮使乾寧
二年從攻濠州濠水深闊簡手搥重擊口銜大刀先渡踰壘

破其關鍵擒刺史張遂以獻從攻壽州加淮南右廂馬步軍都虞候先是江都多盜令雖嚴莫能禁止及是爲簡獲者必徇其部分姓名所盜之物盡黥于面于是寇竊皆息三年從田頔破蘇州虞刺史成及從行密破龐師古于青口敗梁軍于淝河副王茂章援青社從臺濠圍田頔于宣州皆有功簡本姓陳旣貴欲復其氏行密謂之曰天下皆知有李簡何處有陳簡也以是不易渥襲位王茂章以宛陵叛命簡率衆攻之茂章聞簡至率衆奔越改楚州團練使杭人屢寇無錫以簡爲常州刺史改鄂岳觀察使天祐十二年授武昌軍節度使武義初加鎮西大將軍襲復州破之俘知州鮑唐以獻乾貞二年加西南面招討使人觀卒于采石江年六十九簡鎮

上游之地十餘年重關洞啓敵人不敢侵軼然忍而好殺又非法重斂鄂民之高貨者無不破產時論以此鄙之

卷一萬八千一

百三十四
第四頁

柴再用

再用蔡州汝南人性至孝七歲遇龐勛亂舉族避地祖訓鼓不能去唯再用獨留侍賊見而去之以是大爲鄉里所異及長沉毅有斷面黑如鐵人號爲柴黑子會秦宗權召募驍勇再用以騎射應選時軍令亡馬者斬一日戰回藉鞍而寢旣寤而馬逸再用追之遇賊于林中環樹而射一發人樹俱貫賊畏走遂奪馬而歸光啓中從孫儒攻廣陵再用本名存嘗與軍中小校結爲死友會有告小校謀反儒斬之執再用至

儒問何故反再用不對既伏質又問之始對曰某與彼相結

爲死友彼反

○原脫此二字據通鑑二百六十注引改

則某反矣公既誅之復何

問焉儒奇之曰汝果不反吾再用汝因令改名再用儒敗歸
行密授先鋒馬軍指揮使乾寧中朱延壽辟爲衙將因遷壽
州團練都押衙敗梁兵于壽春遷團練副使從延壽平劉存
于弋陽授知光州軍州事一日大震電衆人皆伏匿再用當
戶坐不動俄見青襦袴者四人昇再用所坐牀出庭中復大
震屋楣折有龍出焉梁兵寇光山再用擊走之以功遷光州
刺史天祐二年梁祖平趙匡凝于襄漢乘勝略淮上遣使謂
再用曰苟以城降遷爾蔡州本郡爲賞再用乘闖而拜曰此
州城小衆寡王若先下壽州回當自送款梁祖信之攻壽州

不拔而返再用襲之斬首三千餘級以功加檢校太保渥襲
位遷楚州刺史俄授淮南左廂步軍都指揮使越人寇東州
遣再用率兵禦之賜長稍伍拾戰敗艦破水滿再用爲長稍
所泛得不溺家人聞敗飯于僧爲禱再用戰歸取其飯召麾
下以犒之曰此輩濟我佛何力之有十一年袁州劉崇景叛
引潭將許貞爲援令再用攻之近城有萬勝岡再用欲奪之
每旦出師岡下不與戰袁人頗怠一日列大陣岡南崇景望
之氣奪因出戰再用躍馬徑入陣中斬首數十袁人大敗崇
景棄城而遁武義元年破越軍于無錫遷鎮西將軍領天平
軍節度使未幾移鎮武昌改德勝軍節度加中書令卒年七
十二再用寬厚淹雅有儒者之風好讀左氏春秋未嘗省視

厨廩寮屬白事有不如意但對之假寢諸子娶聘必擇平昔舊族史官王振請述戰功以補方冊再用曰鷹犬之狀出自偶然何足紀也累歷藩鎮敦尚儉素車馬導從不過十人亦一時之良將也

卷一萬八千一百三十四第十三頁

陳瑋

瑋潁川人少橫壯不羈歷事諸帥俱無成乃歸行密未幾復委質于錢鏐景福初授杭州武勇都指揮使改鎮海軍踏白使乾寧中領賓州刺史從平董昌詔賜佐忠去僞功臣天復二年鏐將許再用叛據外城召田頔爲援頔將樹柵于杭州咽喉之地鏐乘闖觀之大懼出金綵十輦募諸將有能奪其地者與之仍以頔爲賞瑋應募選驍健三百假護軍白馬以

出免胄馳擊往返者數四竟奪之鏐大喜飲之巨觥卽授璋
衢州刺史與軍校葉讓不協因斬之與睦州陳詢連衡復歸
款于行密鏐以兵圍其州踰月不能出行密遣周本援之拔
璋盡室以歸天祐二年行密遣陶雅平婺睦復授璋衢婺州
諸軍事充都招討副使會王茂章叛雅棄其地改璋池州團
練使署淮南節度副使越將張仁保陷東州授璋水陸行營
都招討使擊仁保于海曲奪戰船三百艘盡復東州舊地復
乘輕舟入松江九谿偵邏越師大集圍之數重璋獨射施工
心目皆應弦而倒因奮銳衝擊長圍遂解軍回泊洞庭見橘
林意欲除之謂士卒曰若食鱸用此木研酸酪不假他物自
有香辛味諸軍皆爭取樹立盡九年以舟師破岳州擒刺史

苑玫荆人潭人會于江口邀璋歸路璋乃方舟並貫夜過其所敵人後出已無及矣璋每入敵境或晚泊戒士卒整舟櫂待令下當行必此宿車之所也若移帳下岸修棚習射及夜多前去越兵寇上饒璋引兵侵蘇湖上饒之兵乃解乾貞元年加鎮北大將軍領平盧軍節度使溥遣王彥章苗璘舉兵西伐璋謂嚴可求曰朝廷攻湖湘何不用璋與周本彥章與璘可當其偏裨耳其後彥章果敗三年加使相大和二年改鎮東將軍充寧國軍節度使遇疾歸江都求醫至江陽縣卒年六十五

卷一萬八千一百三十四第十三頁

侯 纘

纘字信美城濮人黃巢聚兵于曹濮纘從之時年十六巢陷

京師纘逃歸鄆州時僖宗幸蜀徵十道兵討巢朱瑄以鄆兵
應命纘爲偏將預行尋復與諸道兵伐秦宗權皆以勇果聞
頃之隨瑄弟瑾襲兖州纘與瑾逆殺齊克讓破宿州瑾據有
兖州纘爲爪牙梁祖攻兖州力戰以却梁兵梁祖圍時溥于
徐州兖鄆兵救之不利溥死梁兵遂攻兖鄆戰于城下者數
年長圍三合而三却之時纘常在瑾之左右大小數百戰隨
瑾搏擊馳突出入敵中殺傷不可勝計乾寧四年隨瑾與太
原將史儼掠徐泗瑾將康懷貞以兖州叛瑾無所歸與瑾等
率兵數千走海州遂來歸行密授瑾衙將是歲梁祖大舉兵
伐吳龐師古聶金率衆入自青口葛從周以精甲圍壽陽江
淮大恐行密以兵萬二千會戰于青口時兵起倉卒加以陰

寒戰士皆飲冰餐雪而行甫及梁營則豎戈值足鬪志未決
瑾與纘率五千餘騎潛濟淮入自壘北舞槩而馳囂聲雷沸
梁兵皆殞眩不能舉遂斬龐師古大將繼之死者大半鳴鼓
西行破葛從周于壽陽沉其卒萬餘人于淝河梁人大震纘
功爲多授左右隨從騎副使隨王茂章救王師範于青州破
梁兵五萬餘殺友寧纘復有功從周本攻蘇州戰于黃天蕩
從徐溫却王景仁于壽陽逐劉崇景于袁州朱瑾救徐州之
圍及攻潁州纘皆與戰累授滁州刺史大和三年卒年七十

卷一萬八千一百
三十四第十九頁

朱景

景壽陽霍邱人少豪猾驍壯有膽略爲邑中所服行密得淮

南以霍邱地界南北盜賊交會難可防限聞景之勇爲遠近
所畏故以委之且俟北鄙之奔突景招合無賴年少得絕伎
者百餘人撫禦之晝與捕獵暮分巡警月餘而材伎彊力無
有及景者以是服從如一浚淮羣盜莫敢犯之梁祖聞其名
命寇彥卿率勁騎三千襲霍邱圖取景且諭梁祖之意令降
景率其徒戰于邱墟林澤中射死者無數彥卿兵折力殫而
去康懷貞之至復爲景所困王茂章來寇度淮水可涉處立
表識之景易置于深潭水中立表浮木之上茂章軍敗望表
而涉溺死者大半積其尸爲京觀後破李進金何軡步騎數
千尋拜滁州刺史移光州刺史卒于任

卷一萬八千一百
三十四第十九頁

崇廬州慎縣人少以伉勇隸軍籍光啓中始補戎職從行密破趙錙有功乾寧二年行密攻蘇州崇爲越人所獲行密欲嫁其妻妻曰崇忠孝必不負公請待之未幾崇果返以爲諸將都尉遷蘇州防遏使越人攻蘇州崇從臺濠敗越兵于小白方天復中安仁義叛崇與茂章率兵攻之擒仁義以功授常州刺史累遷屬州團練觀察處置等使天祐十一年加檢校太傅光州軍校王言叛崇討平之授平南軍節度使武義元年加安西大將軍梁祖遣將合湖南兵攻荊州以崇爲應援招討使引軍攻安州降其騎兵二百而遷還德勝軍節度使加中書令太和中封清河郡王卒于治所年七十二崇殘酷暴斂肥人畏之嘗入覲議者盛言不返鄺市少年皆將頤

相慶崇歸聞之因歛將頤錢數萬貫尤好使酒殺人重掌奏
刁鎔每謂左右曰吾醉慎勿令鎔出一日醉甚三召鎔至竟
殺之詰旦召鎔左右曰已殺矣崇大悔取其首視之揖曰罪
過員外其輕人命如此頗信鬼神家人求以厭息崇者先是
后土廟塑韋安道配座乃遣巫女詐云天上謫后土與公爲
偶崇往視之巫女潛洩異香以爲后土至矣崇乃命樂對像
酣飲一夕家人竊其兵器盡置廟中巫女報曰列仙不喜殺
戰故遣六丁取至公不得更用此傷害崇因是大爲改悔歷
藩鎮二十年掠下以奉上每歲一入覲輸貢絡繹國中執事
無不受賂故其肆虐凌下保全祿位終身爲橫耳

卷一萬八
千一百三

王綰

綰廬江人勇敢有謀光啓中始從行密破趙鏐下蘇濠累有戰功署行營諸軍都尉兼漣水防遏使光化二年青州戍將陳漢賓殺海州刺史牛從義歸款于行密行密命綰與張訓率勇士二千乘勢未附襲之漢賓設備不暇果出迎謁遂入府中諭以利害漢賓乃解甲聽命以功授檢校左僕射是歲青州王師範告沂密內叛授綰海州副使兼沂密交鄆諸州副使與臺濠攻密州下之將擊沂州覘者曰城中偃旗卧鼓寂若無人綰曰此必有備而援兵近矣諸將曰密城旣下沂易與耳綰不能禁但于茂林設伏以待果攻沂不克援兵俱至師旣退爲沂兵持其後綰伏兵擊之沂人大北未幾代臺

濛爲海州刺史天復三年改漣州制置使天祐中復刺海州
就加平盧軍節度使明年改定南大將軍知處州防禦使谿
洞民多爲盜至皆平之順義元年授百勝軍節度使召歸乾
貞初卒年七十二

卷一萬八千一百
三十四第十五頁

王稔

稔廬州人少驍勇始以騎射隸行密帳下累從征討有功乾
寧中梁祖遣將葛從周討揚州稔與柴再用率兵禦之稔以
六騎登高山覘梁軍爲梁軍所圍候者望見之請以救兵往
再用曰王稔辦事不須憂也稔與其徒解鞍而卧梁兵不敢
上會暮圍兵漸合稔乃步依林木轉戰而行因是解去時亡
馬令峻遂重襲梁兵奪馬而還軍中壯之袁州劉崇景叛湖

南將許貞率衆來援貞單騎來鬪稔獨援長槩逐走之以功授滁州刺史又從徐溫破寇于山南遷壽州團練使未幾授清淮軍節度稔好儒學性寬厚褒衣博帶有同儒者先是壽春人多尙武復警夜至嚴稔至唯閱經籍下帷肄業通宵無禁不數戰鼓篋待問者四境鱗萃每講肄開必饋以束脩旨酒鄉里薦舉歲常百餘人稔多力每選二勁弓弦加兩耳分手前引雙滿者數四乾貞三年歸授左右雄武統軍卒年六

十六

卷一萬八千一百三十四第十五頁

李厚

厚蔡州人乾寧初歸行密爲黑雲隊長破濠壽有功加檢校兵部尙書改隸朱延壽將戰會立新軍每旗以五伍爲制遣

厚以十旗擊其西偏不克而返延壽將斬之厚曰彼衆我寡
願更益師以往苟不勝敵死未晚也乃增以五旗厚力戰梁
人亂延壽乘之遂大敗行密聞之召歸授黑雲都指揮使天
復中從臺濛破宣州天祐三年以兵援宜春深掠越境師還
以功遷黃州刺史溥襲位授泰寧軍節度使同中書門下平
章事卒于金陵年六十

卷一萬八千一百
三十四第十六頁

陳知新

知新廬江人從行密起兵攻畢師鐸孫儒皆有功屢以親軍
攻定南北諸部多立奇績累授先鋒指揮使天祐三年率兵
攻邑陵破其水柵逐楚將許貞盡收其地拜岳州刺史四年
加團練使是歲從劉存大舉師伐湖南會天大雨旋至瀏陽

江爲楚兵所襲存與知新戰敗俱被擒楚王馬殷親釋其縛
且慰勉之冀爲已用知新叱罵曰吾豈能負楊公而反事汝
耶殷知不可留乃殺之家悉陷敵

卷一萬八千一百
三十四第十七頁

李虔裕

虔裕潁川人少多力善戰初爲義興令行密惜其材召居帳
下常率衆居前從王茂章援青州去爲軍歸則殿後我軍
背嶮虔裕以五百人當之追兵大至茂章亦留解鞍而寢虔
裕促茂章亟去自與梁人戰殺傷無數日暮兵盡被擒士卒
無求生者以故我軍行遠追兵不能及梁人執虔裕見太祖
太祖壯其事欲釋之虔裕請死不得瞋目大罵被害行密厚
恤其家後數年嫁其妻詰且行矣其妻沐浴禱之曰王愍我

窮獨恐終不能自存當嫁我于某氏嗟乎今日猶君之妻明日他適矣君忠烈若是沒豈無神遂棄我是夜無疾而卒夫忠婦義如此

卷一萬八千一百三十四第十七頁

九國志卷一終

九國志卷二

吳

列傳

劉信

馮宏鐸

賈鐸

危全諷

譚全播

李濤

鍾泰章

朱瑾

米志誠

翟虔

張可琮

鄭璠

楊彪

陳祐

劉權

崔太初

陳彥謙

高澧

劉信

信字興遠兖州中都人少豪勇善騎射始陷蔡盜許勅軍中
勅敗自滁州奔于行密及破秦畢頗著戰功大順中行密與
孫儒對壘一日召信受事信醉不能起行密罵之信出殺賊

左右請追信行密曰信醉耳豈負吾者耶明日信果返孫儒平以功轉騎軍副指揮使從破濠泗遷滁州刺史改左右隨從馬軍都尉王師範據青州密人叛師範求濟師行密遣臺濠率兵破之信先登破敵冒重瘡及青人犒師先求白甲軍增其賞蓋信所部兵皆鐵鎧也天祐六年袁吉信撫州結潭人將復豫章改信鎮南軍節度副使率兵敗潭將苑玫于上高遷袁州刺史危全諷新破其將黎汾王藻聚殘黨爲盜南城間信盡破之一郡遂寧十一年授鎮南軍兩使留後劉崇景以袁州叛信擊走之授鎮南軍節度使信爲治苛猛民流言將反會王祺率舟師南上信意其圖已乃乘小舟解其冠帶詣祺請罪祺大驚謂曰奉命討譚全播于南康請公駐吉

州以警潭人非他也時虔城險攻之久不克祺以疫死遂改
信爲招討使全播懼因納款信受其質而還徐溫方執政聞
之大怒杖其使者信子彥英時爲親軍校溫令將三千人往
援之溫戒之曰汝父據上游之地擁數萬之衆取一小郡不
克而還是反也今授汝此兵可往助父反信聞之大懼卽返
旆疾趨克其城而還先是有讒于溫言其逗撓固縱全播至
是信自獻捷于江都溫大喜復遣還鎮十六年吳王開國加
信征南大將軍後唐莊宗卽位遣諫議大夫薛昭文冊閩王
假道豫章信勞之謂昭文曰皇帝知有信否昭文曰主上新
有河南未熟公之名信曰漢有韓信吳有劉信異代其人也
因指牙旗銀首舉卮酒以屬昭文曰射中此願公飲一箭而

穿之觀者無不稱快信用親吏吉況輩聚歛財貨置積廳事
日納銀滿其中莊宗伐蜀溫恐信爲變急召歸江都爲左統
軍溫卒又傾心事知誥復歸鎮明年卒于治所年七十信將
上章請立廟于洪州許之

卷一萬八千一百三十四第十一頁

馮宏鐸

宏鐸連水人少與張雄友善雄以事爲吏所抑因與其徒亡
入海爲盜宏鐸隨之聚衆千人自號天成軍遂據上元雄卒
宏鐸繼其位聚水軍于金陵樓艦之盛聞于天下大順元年
詔復以上元爲昇州命宏鐸刺史遂增版築大其城爲戰守
之備行密定淮浙因請歸附時田頔在宣州常欲窺伺宏鐸
界居二大國之間又郡中數有妖怪居人相驚忽負抱嬰兒

奔走諭之不可止宏鐸心不自安遂悉衆南上其日淮口大風發屋拔樹大石巨木皆飄于空聲言將討豫章實欲襲頽頽自帥舟師與戰于昌山宏鐸敗沿流將入海行密自出東塘邀之先使人謂宏鐸曰用兵者勝負豈有常哉今衆力未損公何憂一郡而欲自屏於海外吾府雖小足以容君之衆使無失所若欲淮南節度吾亦當讓君捨此而去無謂也宏鐸左右聞之皆哭于是聽命行密乃升宏鐸舟執手慰勉一軍皆歡呼遂以宏鐸歸署揚州節度副使館給甚厚將吏皆分部安堵嘗與行密同祀漢高廟有二鳥闕于樹行密命射之宏鐸引弓伺便一發而二鳥俱墜天祐四年卒

卷一萬八千一百三

賈鐸

鐸字聲遠唐相昀之嫡孫生于上蔡遇亂爲秦宗權愛將宗權暴虐不軌鐸諫之不聽反見疑懼禍及乃挈家夜與屬卒千人出奔宗權嚴兵追之鐸且戰且行數日乃渡淮遇故人馮敬章導之襲蘄春破其城推敬章爲帥鐸爲牙將塹城厲兵以自固行密命朱延壽攻之鐸方出獵延壽潛軍掩至圍其城鐸奔還度不得入以兵伏林中選士二人被羊皮夜入延壽所掠羊羣中因得入城約城中夜半開門舉火爲應再以羊皮復命鐸如期領兵趨城南門門中火舉乃力戰突圍得入延壽知其狀驚曰吾恐其潰圍而出今反潰圍而入如是則城安可卒平乃以鐸報行密令召軍中與鐸有舊者持

誓書金帛與之和仍令延壽與之約婚小將柴再用應召而行鐸乃請盟延壽以妹妻其子匡浩行密復授鐸左監門衛將軍乾寧二年加壽州左右軍光化二年授檢校右僕射天復三年加金紫光祿大夫檢校司空授黃州刺史天祐三年移光州刺史七年卒于治所

卷一萬八千一百
三十四第二十頁

危全諷

全諷臨川南越人世爲農夫初生赤而毛醜狀駭人父母欲勿舉其姊保護之僅而得全及長人質明秀豪勇任氣乾符末所在寇亂乃招合同縣少年卽其居爲軍營鄉里賴焉時安南都護謝肇受詔安撫江嶺聞而嘉之補爲討捕將表加憲職賊帥黃天感據龍安鄉朱從立據石牛洞皆竊稱名號

官軍屢敗遣全諷討之期年悉平中和五年黃巢餘黨柳彥章攻破臨川逐郡守大掠而去全諷遂入之詔卽以全諷爲撫州刺史郡署及俘郭焚蕩略盡乃悉心爲理招懷亡散興緝圯壞不數年完復如故時南平王鍾傳亦乘亂據有豫章朝廷因命爲帥諸郡亦多自立者皆不能恭承節度而全諷最强尤驕傲不遜遂爲勅敵从之傳不能忍自率兵討之旣傳其城而城中夜失火士民驚亂諸將請急攻之傳曰君子不逼人之危乃掃地而祭曰全諷之罪無害于民烟焰漸止天之惠也翌日全諷聞之遣使謝罪聽命請以其女嫁傳之長子匡時傳許之乃盟而還由是稍脩支郡之禮然豫章之人常畏之傳卒軍中以匡時爲留後全諷曰聽鍾郎三年爲

節度吾當爲之旣而我師圍豫章全諷不能救及城陷乃謀東兵時宣州刺史王茂章叛入越假道臨川以之梁問全諷曰君欲大舉願見君之將士以卜濟否乃陳師于野與茂章登城而觀之茂章曰衆凡幾何曰十萬茂章曰淮南有三等將如公此將可當下將爾盍更益十萬乎全諷不聽悉衆屯象牙潭自稱江西留後旁郡皆以兵資之湖南馬殷又遣將高安以爲之援軍勢甚盛豫章大恐將軍周本攻象牙潭大破之擒全諷于陣諸郡皆潰楚撤高安之圍而遁于是克定八郡之地送全諷維揚親詰之全諷不答初行密之攻趙鏐遣使通聘于臨川全諷報禮甚至糧運兵器皆取給焉至是以舊恩釋之先是潤州刺史安仁義築第于邗溝之西因以

賜全諷資給甚厚天祐六年以壽終諸子隨才敘錄全諷敬愛賓客善撫士民頗有巧思多所興創今城郭館署皆其遺構也

卷一萬入千一百三十五第三頁

譚全播

全播南康人昭宗末嶺表寇亂全播與鄉人盧光稠相與聚兵謀署首領衆推全播怒曰諸君舉事必望成功須藉良帥盧公軀貌堂堂眞諸君帥也衆唯唯未定全播拔劍三擊庭樹曰不從令者與此樹同乃立光稠而全播爲謀主所向多捷兵勢漸盛遂破王潮之衆入據虔州推光稠爲兵馬留後全播分掌城中兵天復三年與潭人共伐番禺下韶州潭人不利乃引還光稠命其子延昌守韶州其弟光睦果敗奔還

潮人乘之伏兵四起大破之斬其首將鄭廉遂從光陸圍潮州番禺救之乃引還劉巖劉隱以廣州之衆伐光稠以報韶州之役旌旗相繼數十里圍城十餘重光稠大懼全播曰吾詣劉公易與爾無足憂也光稠喜曰虔與韶昔與君所共定也此日之事非君不能辦之于是治戰場于城內告戰期于劉巖巖令諸軍曰戰之日勿殺虔兵悉可生擒之全播選精甲萬餘伏于隍塹邱嶇之間與老弱五千鼓行而前數戰乃退巖縱兵長驅中伏發巖等大敗單騎遁免斬首萬餘級光稠議功全播泛讓諸將而不受自是光稠大歎賞之俄有疾將以符印授全播不從光稠死延昌自韶州奔喪全播立事之延昌好遊獵荒傲無度大將黎球俟其出獵閉壁門而殺

延昌于城外球以全播不與已同謀將害之全播請老閉門
不出後球方欲蒞事見延昌持彈叱責之球中凡而死衛將
李彥圖復知州事全播懼禍稱疾篤杜門李彥圖疑之與議
親姻多方以覘其動靜全播應覘爲狀終不可識廣州聞全
播之病乃北侵陷韶州李彥圖卒其子不肖閉子城以自衛
州人無歸相率詣全播第請爲帥拒之不可遂從之遣使詣
梁俄授萬勝軍防禦使五嶺虔韶二州節度開通使檢校太
尉開通侯在任七年人物殷盛俄而徐溫命劉信伐之信以
大衆填其城壕全播令人潛爲地道運其土壕深如故信以
爲神莫之測也攻擊萬端不能剋遣使說之令款服全播請
從溫聞之怒曰信以十倍之衆不能下一城何以取威敵國

命回兵攻剋之擒全播以歸授左威衛將軍領虔州如故卒
于江都年八十五當盧光稠之未舉南康先有謠言曰盧破
黎頭出李子始開花潭深魚正聚楊柳西邊栽旣而光稠有
南康至于延昌而破黎球繼球死李彥圖繼之全播方盛柳
者劉也而楊氏命劉信攻取之一郡之地何真數之若是乎

卷一萬八千一百
三十五第四頁

李濤

濤趙郡人祖遠唐杭州刺史父逸壽安令濤涉書史會唐末
四方盜起乃投筆從軍光啓三年秦彥囚高駢濤從行密義
舉列八寨維揚西彥盡以步騎背城求戰俄而彥軍已破一
寨諸將以兵勢相懸宜堅壁勿出濤怫然曰今以順伐逆奚

論衆寡設令欲退將焉歸濤願以所部爲前鋒請觀破賊行
密壯之遂出戰果敗彥軍自是無復敢出濤以功遷騎軍都
尉渥襲位授和州刺史初行密旣卒張顥陰有異志以都統
符印送宣諭使李儼行事嗣王意未決一日諸將共議四座
畏顥無敢言者濤曰都統符印是昭皇御翰所賜王父子承
襲用在不疑苟付他人中外安仰諸將以其辭正皆伏羲顥
獨默然投袂而去渭襲位遷吉州刺史十年授行營招討使
攻越臨安濤敗陷于越順義元年吳越通好杭人厚禮歸之
授右雄武統軍加泗州防禦使遷寧遠軍節度使太和四年

卒年七十二

卷一萬八千一百三十三第十四頁

鍾泰章

泰章字憲明廬州合肥人少不拘細行雄果有四方之志中和中行密據合肥召置帳下累從征討皆克獲有功天復三年朝使李儼至行密得承制拜授以功歷左監門衛將軍天祐五年張顥弑渥將出徐溫守潤州以圖自立溫與儼可求謀非泰章不可除顥泰章知之因選士三千人夜集軍舍椎牛享之刺血而飲以爲誓溫謂曰吾有老母不若且止泰章曰斯事一言旣出寧可中輟耶明日泰章與姚克贍殺顥于衙堂遷檢校尙書左僕射左衙副指揮使從周本攻越州拔衆夜歸越人襲之泰章以二百人散樹旗于菰蒲間越兵退去絕糧三日泰章壯氣無衰泰章自以除顥功大賞薄會與骨言爭握槊因譁語較軍功以及之溫聞而歎曰斯固吾過

也明日加泰章滁州刺史滁民有訴泰章者泰章詣金陵自理溫逆謂之曰前事理已改授公光州矣泰章遂之任未幾遷壽州團練使會疆吏告泰章侵市官馬因遣王稔以巡霍邱爲名注代泰章泰章歸中途改饒州刺史俄召歸金陵在郡二年加同中書門下平章事泰章多力嘗怒其家人其人匿避泰章愈怒因拉折鐵杵後卒于治所年六十二

卷一
萬八

千一百三十
四第十三頁

朱瑾

瑾宋州下邑人也雄武倜儻有吞噬四方之志光啓元年汶陽曹全昱遇害軍城無帥鄆兵共推瑾兄瑄爲留後瑾之季仲俱爲列校明年兗州齊克讓妻女于瑾瑾伏兵仗假稱聘

禮改服甲士詐爲昇夫而往親迎夜發卒殺兖州軍校王稠
膚遂虜克讓詰旦自稱留後三年夏秦宗權併兵攻夷門梁
祖幾至不守會瑄援至合梁祖兵大戰城北瑾單騎嘗寇馳
突往返當者無不披靡宗權敗走自是瑾與梁祖互爲犄角
屢破宗權朝廷以功授瑾兖州節度使未幾梁祖交惡于瑾
遂成仇敵大順二年冬瑾率兵萬人攻單父梁祖遣丁會禦
之瑾軍大敗于金鄉景福初梁祖攻徐州瑾率全軍來援時
傅擊梁軍殺其將霍存因席卷十餘寨乾寧元年梁祖親攻
鄆瑄瑾合兵迎戰敗之于東河二年春梁祖將朱友恭攻瑾
塹其城守之是時連歲交兵四郊無耕織瑄瑾勢蹙因間遣
使乞師太原李克用假步騎五千濟河梁人退舍十月梁祖

復親攻兖州塹圍之瑾單騎求鬪梁將無應敵者瑾兄瓊先以齊州納款于梁梁祖使瓊臨兖州說瑾瑾怒瓊無急難之義僞遣使告降梁祖自至延壽門與瑾交說瑾謂梁祖曰兖城符印他人莫可付願得兄來付與旣而梁祖遣掌謁劉捍與瓊偕至瑾立馬橋上遙謂捍云願兄先來乃麾將士擒瓊徑入未頃城上大譟擲瓊首于外梁祖大悔因班師焉四年正月鄆州先下瑾亦糧盡與晉將李承嗣史儼求軍食于野梁將龐師古奄至城下瑾將康懷貞率瑾子私以兖城送款歸不得入引承嗣諸軍將保沂州爲其將尹處賓拒關不納瑾狼狽將奔海上復追之後追乃渡淮歸于行密行密迎之于局郵待以殊禮立解所服玉帶爲贈擇甲第遺財帛鉅萬

表瑾領武寧軍節度淮南行軍副使是冬梁祖遣將龐師古
大寇青口行密親征之令張訓以羸兵前導師古意輕吳師
貪奕基不顧瑾請假梁人旗率騎前濟突入師古中軍營
行密得引兵急渡爭破諸柵遂擒師古斬之乘勝攻淖河軍
葛從周敗走光化二年春從行密攻彭門移師侵宋梁祖屯
睢陽以禦瑾會天大雨與瑾交綏而退天復三年授瑾東面
諸道行營都統平盧軍節度使同中書平章事天祐十三年
淮南小校馬謙李球乘酒脅衆挾渭登樓發武庫兵爲亂陳
于門橋北外衆屢却會瑾自浙西至惟引一騎視其坐起云
此不足爲禍因返顧外衆推手一呼亂兵皆潰去遂擒謙是
冬與行軍副使徐知訓率兵攻潁州梁人援至而解渭將開

國知訓患瑾位加于己請以泗州建靜淮軍出瑾爲節度先是瑾因朔望令女妓通候問于知訓知訓淫縱強欲私之瑾心已不平復有是行會知訓夜張祖筵瑾中宵先起詰旦度知訓酒方困復留刺以出旣盱知訓果來謝瑾因延入室出其妻陶氏知訓方拜瑾以笏擊之踏于地左右自外突入殺之初瑾先繫二惡馬于廡下及將圖知訓密令釋其羈紲馬果蹄嚙外人莫得聞變因斬首以出知訓從人數百瑾扼臂叱之俱辟易散去復乘知訓馬馳入府中訴于渭云今日爲大王除患渭曰此事吾不敢知因命瑾疾去瑾忿以知訓首擊柱詬渭曰懦夫安足與成事攜劒復出望府門已闔因踰垣折足大呼曰吾爲萬人除患今以一身當之耳遂自刎夷

其族時年五十二

卷一萬八千一百三十四第八頁

米志誠

志誠沙陀部人少便騎射以驍勇聞乾寧四年奔于行密龐師古寇青口葛從周寨淝河志誠俱爲前鋒連戰皆勝以功遷馬軍指揮使田頴叛于宣州志誠與臺濛敗頴于廣德天祐六年危全諷將伐鍾陵湖南遣苑玫屯上高以爲全諷聲援命志誠與王祺率兵破之十年從徐溫敗錢瑛于梁谿後又破王茂章于淮上十一年隨柴再用討劉崇景于袁州敗袁人于萬勝岡崇景棄城遁去遂入之先是袁人兒童聚戲穴地爲釜圈箸爲餽曰將柴米來至是果應以功加檢校太傅領泰寧軍節度使十五年朱瑾殺知訓攜其首入府中志

誠聞之被甲引其子并親從十餘騎至天興門問瑾所向聞瑾已死乃歸徐溫疑其助瑾遣使殺之嚴可求懼其不克遣人僞自袁州至告大破楚人諸將皆賀志誠亦入因伏壯士斬于棘門之下諸子皆棄市

卷一萬八千一百三十四第十四頁

翟 虔

虔彭城人也乾寧初徐方將陷虔盡室南渡謁行密于廣陵及徐溫典右衛以虔爲軍佐屬張顥之亂溫與嚴可求陰計其事密遣虔往傳導及誅顥虔有力焉因授子城甲仗諸庫院鈐轄等使天祐十五年朱瑾殺徐知訓挈首突入府門時兵衛倉卒莫敢抗禦虔驅率散卒共閉關瑾以是不得出遂踰垣折足自刎而死會米志誠引十餘騎問瑾所向聲言以

襲瑾爲名虔乘圍謂曰瑾已戮矣何不急自歸營因是志誠
遂返渭喜其應機却賊以瑾宜陵莊賜虔爲賞及吳國建復
旌其勲授閣門宮城武備等使領光州刺史順義四年溥幸
白沙對徐溫呼雨爲水溫請其故溥曰此是翟虔父名吾慣
諱矣因言宮內諸王須索虔多阻限不時進納溫欲斬之爲
溥救護而免黜于撫州未幾授行軍副使及廉使徙任虔知
本州軍事七年卒年六十三

卷一萬八千一百
三十四第十六頁

張可琮

可琮不知何處人中和之亂奔于江淮行密識其勇毅擢在
左右破孫儒于宛陵先登陷城稍遷列校時吳人初得宣城
毘陵之地無錫居越人之衝患其攻擾天復中選可琮守之

錢鏐忌其名揀驍將卒二千中夜襲之邑中大擾可琮閱兵
得百餘人皆乘城疾戰越人驚潰而去吏士皆賀可琮笑曰
彼衆我寡其勢未已方復勞諸軍一陣爾于是息燈火屏旗
鼓若空邑然越人偵之以爲宵遁果復至可琮約將士候其
附城突擊大破之寇盡潰去方告于郡守李簡簡雖怒其不
時告且壯其事列上其功後以徐溫之命掠東洲下之卽以
爲制置使天祐中除江陰縣鎮遏使遂城江陰沙山之役可
琮以江陰之衆供軍旅展斥候無闕謀徐溫喜之擢拜常州
刺史大修城隍民賴以安順義五年卒年六十五

卷一萬八
千一百三

第十四頁
十八頁

鄭璠

璠汝南人始事秦宗權後隸孫儒入淮南尋歸行密前後戰
伐皆預行光化四年授左先鋒兵馬使是歲從李神福攻臨
安擒越將顧全武方宇等四十餘人遷左衙將天祐初王茂
章征安仁義于潤州洎城陷中十餘瘡以功遷左先鋒都尉
從攻豫章璠以所部發機飛火燒龍沙門率壯士突火先登
入城焦灼被體以功授檢校司徒復從柴再用與越人戰敗
及陳璋復東洲璠城而守之復會呂師造攻蘇州與越人戰
虜其次將陳綰璠左脇中弩幾死授蘇州行營都指揮使周
本擒危全諷于象牙潭璠所部功多又攻新淦縣克而守之
尋以張宣代歸復佐周本攻袁吉緣山疾戰悉攻其巖壁焚
之民皆復業十五年從王祺劉信攻虔州克之授璠羅城使

順義元年領饒州刺史六年知楚州率兵援汀州軍事乾貞
元年就拜團練使二年授鎮南軍節度副使知軍府事太和
三年授饒州刺史五年遷金陵行軍副使卒年六十六

卷一
萬八

楊彪

彪宿州人身長七尺餘呼聲如鐘侔儼有武幹善騎射行密
見而壯之擢授衙內散指揮使渥嗣位潭人犯邊授西南面
行營護軍副將謂諸將曰彼衆我寡未欲輕動乃守其要津
以輕兵挑戰登高以望之見其麾下進退不一彪笑曰非勅
敵乃縱兵出戰親射其首將殺之順風焚其艦溺殆盡凱旋
擢授江陰鎮遏使徐知誥鎮潤州充都尉以從越人寇無錫

東南大震知誥東征彪與陳再遇領死士千人於路次弓弩
忽發越人驚擾又竊賊號令以入其壘殺獲甚衆明日又戰
自旦及辰未決彪躍馬疾馳之越人遂退師還以功授殿直
軍副使與郭悰分直宿衛徐知誥謂之曰郭悰猛而少機警
宿衛之職唯爾是賴大和三年卒年五十二

卷一萬八千一百三十四第十

頁九

陳祐

祐歷陽人年十七歸行密于合肥從入廣陵孫儒來襲吳師
亂祐之卒伍獨成列泊入宛陵稍遷爲偏校時行密修貢于
天子祐應募而行達于朝廷制授兼御史中丞從攻滁濠壽
等州下重甲先登戈陽弓墜而復上敗龐師古葛從周朱友

寧皆預戰有功秦裴下豫章時朱思勅范思從陳璠以兵戍之璠等皆渥之心腹也張顥忌焉令祐以渥命往誅之三校皆勇士也顥旣遣祐行甚憂之祐踰險輕行六日至豫章微服懷短兵入秦裴帳下裴驚其來且告之故因責裴以不能制三帥而令有異謀裴懼未及對祐令召思勅等宴會及至則祐已與裴飲矣三校入見祐皆色變俄而酒三行祐數其罪悉叱而斬之以歸徐溫之誅張顥祐有力焉天祐十年越人侵無錫徐溫自征之祐率黑雲都尉以從諸軍未集祐告溫曰寇謂我勞頓而至未能陣也願以所部先薄之大軍見可則進溫從之祐詭道以出賊後會大軍夾攻大敗之十三年溫在潤州小將周郊詐稱役徒懷短兵入府多殺軍吏而

衛士無兵仗拔武庫之捷出兵仗授之以戰或有自後擊祐
傷腦踣于地從者負之息于門下稍蘇時賊雖息府中尙擾
升樓傳呼不能止祐舉首叱之衆皆投兵仗罷去温手封其
傷授黑雲都尉温遷金陵制宮室府署命祐董其事以功加
檢校司空太和元年授饒州刺史卒于任年六十五

卷一萬
八千一

百三十四
第十九頁

劉權

權許州人少從軍于蔡州景福元年來歸行密入淮南隸田
頽麾下累遷同州節度副使光化二年頽與越人戰權乘勝
深入爲寇所得錢鏐見而慰之曰爾壯士也吾終不以俘虜
相蓄洎通和縱之歸渥襲位補衙將渭開國以權侍衛勤肅

授左衙列校檢校右僕射從周本攻蘇州回授右衙列校爲
毘陵子城使率海船與越人戰勝充洪州都督長史領吉州
刺史潁川之役授行營都虞候時徐知訓爲帥而軍政皆委
朱瑾梁將袁象先率步騎救潁瑾晨興望西北皆昏黑知梁
兵將至召權與議值天大寒權幅巾綿袍而至瑾問曰爾何
職曰行營都虞候瑾曰是職也動必爲諸軍先今氛興西北
陰霾閉天此梁人至矣爾司斥候尙爲此服且軍禮何在叱
左右執之就戮知訓徒跣而往救之僅免時梁祖兵已至戰
少不利乃引還及瑾殺知訓城中恐懼將從而爲變權出師
而瑾自殺衆乃肅然徐知誥至丹陽遷左右軍都押衙事武
義元年領雄武大將軍六月從徐溫與越人戰于沙山洛社

敗之俘其卒數千七月從知誥戰無錫大破越人二年卒

卷一

萬八千一百三十四
第二十二頁

崔太初

太初雄西人父亮蔡州監牧副使太初身長七尺勇力過人
中和末以大刀長槊應募行密見偉之召居帳下歷壽州衙
內副指揮使天復中田安將謀叛行密疑朱延壽與之交結
太初累從延壽征討曾諫延壽及延壽擒行密嘉其意遷太
初衙內都指揮使天祐十五年從徐溫破王茂章遷本州司
馬權知壽州團練使先是壽春自乾符後守卒俱爲多謀彊
力者據而後奏報以要恩及陳紹卒宣王遣王定持虛衙官
告以往令度可授者與之定以軍政雖出太初而職在衙將

審審言之次因潛報太初曰詰朝若州之符印再至于君愼
勿更讓明日召諸將齒先以符印置坐末以次遞捧而上及
審言而止定曰王府之命非審公而誰然合更相推以成禮
也審言如教復至太初定曰唯公不可多讓乃麾其下位者
俱令列賀復數日軍州無異議始以官告授之人有密譖太
初常蓄鄉關之念者會徐知訓征潁州路出壽春且觀其意
太初着烏帽草履徒步至塌山爲知訓馭馬五十餘里知訓
見其屈降前疑大釋太初不喜儒生多疑好察每通衢交會
之所牆必置耳常謂人曰還聞牆有耳否又曰非牆耳乃吾
也。案六帖十二引作耳由是行路之人鮮敢偶語者召歸授右雄武
大將軍加檢校太傅同中書門下平章事守左殿直統軍大

和三年卒年六十六

卷一萬八千一百三十五第三頁

陳彥謙

彥謙毘陵人少負壯節有剽繁治劇之才行密定江表召爲潤州司馬以幹局聞徐溫鎮浙右以機務爲寄彥謙亦坦然不疑言行計從人莫能間溫欲居金陵問策于彥謙對曰金陵昔爲王者都今實近畿關輔也作鎮于彼其誰不往溫從之遷彥謙金陵大都督府右司馬營度外城府署三年而畢上經費之籍天祐十五年朱瑾殺徐知訓溫召謂之曰蛇豕雖亡枝蔓猶在令就廣陵除其餘孽及梁祖卽位隴蜀建號彥謙勸溫諷渭建朝廷及更章服彥謙頗有力焉溫嘗閱帑藏見金帛委積因曰此三軍物吾豈敢有然致此盈衍公之

力也因授鎮海軍節度判官無錫之役未戰而溫疾吳越兵
攻其帳我軍相顧失色彥謙卽引旗鼓詭遷于左其攻稍息
及敗越兵遷楚州團練使諸藩郡歲時伏臘爭獻賂遺溫恣
令納之病溫親往慰問自調湯藥臨卒手疏十餘事首卽以
嫡嗣爲請順義五年卒年六十

卷一萬八千一百
三十四第二頁

高 澧

澧越州人祖實唐武寧軍節度使父彥湖州刺史澧爲錢鏐
之將累功遷特進湖州刺史武義軍使天祐七年以受疑挈
家屬二百餘口甲卒五千來奔授淮南節度副使澧嗜酒好
俠殺人而飲其血日暮必于宅前後掠行人而食之一旦醉
在樓上王寬經其下澧召之登而命左右去其梯操鋌于旁

而以酒虐寬寬爲所圖乃以大觴酢之澧皆推觴寬躍而取其鉦橫之于膝乃慢罵澧連以觴罰之澧辭不欲寬乃引鉦逐之澧環席而走叩頭乞哀併飲十觴卧不能起寬乃下樓徐去泊上馬命以鉦還之十五年徐知訓爲朱瑾所殺徐溫遷怒誅之

卷一萬八千一百三十四第廿一頁

九國志卷二終

[illegible]

九國志卷三

吳

列傳

田頽 安仁義 朱延壽 徐溫

田頽

頽字德臣廬州合肥人博實書傳容止儒雅雄果有大志少與行密同鄉及戍塞上情好愈密軍回俱遷入營主將中和二年行密圖有肥上頽首爲輔翼光啓二年壽春張勣遣將魏虔率衆來寇行密使崔自審敗復命頽往大破虔衆于楮城鎮三年從行密破秦軍于繼揚頽功稱最文德元年圍趙錙于宛陵明年夏錙糧盡舟出東溪乘暴流以逸將奔淮南

鏗度行密皆步騎限水無從復至因泊永陽解甲登岸初顧
 疑鏗將遁密造輕舟擬之至是追及鏗奔不暇爲顧親執以
 獻奏授顧馬步軍都虞候檢校尚書左僕射是冬與安仁義
 攻杜稜于常州下之十二月復爲孫儒所敗大順元年秋顧
 屯浙右懼儒兵盛焚浙右營散于野二年春退軍黃池廣德
 與孫儒軍寨壘相望顧兵屢戰多北會夏大雨儒營多墊溺
 避水而歸是秋儒盡焚維揚復濟師廣德十月顧率敢死士
 千人夜襲儒將張景思沈粲二寨破之擒粲而返十二月顧
 與劉威大爲儒所敗行密怒盡奪其衆儒遂乘勝逼城戴友
 規言于行密曰彊敵匝壘不用田頔恐非長策行密遽復起
 之明年六月盡破賊寨顧親與其下范文感等臨陣擒之秋

行密歸淮海表顏寧國軍節度累遷檢校太保同中書平章
事乾寧三年夏同安仁義破越之蘇州光化末馮宏鐸以樓
櫓自將介守上元顏以厚利購得其工令速成大艦工曰馮
公每一舟必遠求楸楠旣成數十年爲用餘木性不禁水非
久必敗顏云汝但以此地木造之吾只圖一用不暇多年爾
因而急就天復二年四月果與宏鐸戰于曷山宏鐸大敗舉
族奔淮海時以上元地歸行密顏隨入覲會行密左右要賂
者衆下及獄吏亦有所請顏愀然不懌謂所親曰斯吏亦欲
吾下獄哉顏方求池歛爲屬郡行密復未之許顏意望素高
由是愈不能滿及回指維揚南水門云此門不復經入矣初
行密克定江淮方撫循百姓而顏與安仁義朱延壽等皆猛

驚驍果以攻取爲務行密憚其難制每抑之是秋錢鏐游臨安其下許再思徐綰以餘杭外城叛召頽爲應鏐得舟夜從水路入保子城時頽圍之愈急鏐屢遣間使求哀行密行密亦以頽若得志杭越爲患必深不若存鏐別圖進取因召頽歸鎮鏐復輸錢二百萬貫以傳瓘爲質頽始旋軍自是財富兵盛復以取杭越垂下爲行密所召乃與錢鏐和親反意遂決三年秋頽與潤州安仁義同叛初召其謀將康儒議多忤意行密因而間之遣使授儒廬州刺史頽果疑儒私納款遂族儒先是行密遣李神福攻武昌及頽反行密急召神福旋師頽聞之復以兵襲上元劫神福于承鼎遣諭意云苟見機從吾事平之後當分地以治別命將汪建以樓橈踵其後神

福不顧叱左右射承鼎以誓諸軍明日大破建于吉陽磯顏
聞建敗自督親軍求戰神福收兵皖口際水爲堅柵是時行
密別遣臺濠王茂章率步騎以往顏復委舟師于汪建王壇
自出廣德迎戰大爲臺濠所敗遂率殘衆遁保宛陵壇建聞
其敗因盡以舟師歸款于行密十二月顏出外州柵疾戰橋
陷馬墜爲外軍所殺時年四十六顏母老行密哀而捨之初
顏與行密微時約爲兄弟渥渭俱以子孫禮事其母顏善撫
將卒通商惠民復疏財愛樂文士時遊其門者楊夔康駢夏
侯淑殷文圭杜荀鶴王希羽晚年楊夔知顏以兵賦自恃將
謀爲變因著溺賦以諷之顏終不顧以至于敗

卷一萬八千一百三十四

安仁義

仁義沙陀人初事李國昌于塞上以過奔河南隸秦宗權軍中光啓三年擢爲馬軍指揮使從宗權弟宗衡攻維揚及宗衡遇害復奔行密行密得之甚喜盡以騎軍委之列在田頔上文德元年從行密破趙鐔于曷山與頔攻杜稜于常州破之大順初梁祖遣將龐師古率衆十萬至高郵孫儒盡衆禦之行密乘虛襲據浙右命仁義率衆敗儒將劉建鋒于武進儒復渡江陷蘇州自是與儒春夏鬪黃池秋冬戰廣德儒軍竟以衆勝圍行密仁義于宛陵時儒亦久戰不決貽書仁義敘舊款密欲令行密猜間之行密待遇愈至辟爲行軍副使依前馬軍都指揮使景福元年行密仁義及田頔背城晨戰

儒軍大敗破五十餘寨以功奏授檢校尙書左僕射潤州刺史仁義蕃性好貨雖凋弊之後科歛尤急初儒之亂土庶多奔豫章及諸郡平流者皆復行密皆以循吏守之唯浙右人聞仁義所爲相爲悲嘆曰獨吾郡乃得蕃人以是多無歸者天復三年仁義遣衆盡焚東塘戰棹結連宣州田頔以叛潛兵襲常州刺史李遇設伏于路率兵前戰因極罵仁義仁義止其衆曰遇何敢辱我至此是有伏兵也偵之果然仁義戰久而敗遇因襲之至夾岡仁義立二幟于岡上乃解甲而食無敢追者行密遣王茂章李德誠攻仁義仁義不毀濠梁常開門出戰與茂章對敵無不先告所中而後射之故諸將多挫銳而止以是歷年不能破天祐二年仁義之衆漸寡自度

終不濟乃擁其家屬登城樓外衆無敢登者乃呼李德誠謂汝最福人可以委吾命擲去弓矢令德誠執之父子俱斬于廣陵市

卷一萬八千一百三十四第六頁

朱延壽

延壽廬州舒城人行密之妻弟也美姿容未冠事行密從征秦畢孫儒皆以摧堅陷陣受賞行密征維揚授延壽以扞城之任時軍中多盜行密方務寬恕求得士伍心知延壽好殺每捕至者必并所盜物遺而貰之仍誡之曰慎勿使延壽知旣而密報延壽俱復擒殺之乾寧初黃州吳討歸款遣延壽援之徇地蘄陽而還從圍壽春城堅不可拔將捨之延壽請以所部試往臨城一舉而破城中市不易肆以功署淮南節

度副使壽州刺史明年取蘄光二州以功遷團練使四年從
征葛從周于淝河敗之自後梁將屢寇淮上延壽每開關延
敵未嘗敢逼天復初北司擁薦西幸昭宗聞延壽有武幹遣
李儼間道賁詔授延壽蔡州節度使令促行密與諸道犄角
共誅梁祖會鳳翔圍解而止田頔安仁義結構延壽叛將分
地而治行密憂形于色卽詐爲目疾每接延壽使必錯亂所
見以示之嘗誤觸楹柱而朱夫人救之良久始蘇因泣曰吾
今喪目軍府事大兒子輩俱幼不如得三舅代治吾無憂矣
夫人因以書召之延壽不疑遂來覲行密迎至寢門使人刺
殺之年三十四出夫人嫁蘄州刺史石璠旣而朱瑾入賀行
密曰彼一大賊不足憂惟憂此小賊今得之無事矣延壽善

用兵有鈴略好以寡擊衆不勝敵而返者無不盡戮之嘗與
梁人戰遣衆二百持大劍而往內指一卒留之卒云願攻賊
自效延壽亦斬之其令出必行皆此類也性疏財每得賞賜
皆分賚將士李昇建國以延壽子鄴列于環衛復其官爵

萬八千一百三十四第十頁

徐溫

溫字敦美東海昀山人少無賴入羣盜中以販鹽爲事中和
二年行密起合肥遂隸帳下爲伍長常從行密征討先登陷
陣敵人畏之及平秦彥虜趙鐸敗孫儒溫皆有功奏授衙內
右直都將左長劍都虞候又從平濠泗有功授隨身都知兵
馬使檢校工部尙書天復二年昭宗徵兵入援行密將赴之

議以戰艦運糧溫曰此水入吳舟楫不敢南行岸谷旣變葦且深必不繼矣遂令以小舟易之師次宿州重載不能進士卒甚飢惟小艇先至一軍賴之行密嘉之由是參預謀議討安仁義于京口諸軍頻戰不勝行密遣溫率兵援之溫至城下盡易新製衣服旗幟悉用舊者仁義不知如常而陣溫乃麾軍奮擊遂敗之朱延壽入覲行密聞其來慮有內應召溫歸陰爲之備旣殺延壽營中果亂溫奮擊大呼斬其首惡者部分遂定旣誅三叛以功授尙書右僕射廬州長史隨授右衙都指揮使天祚二年行密疾病渥出鎮宣城將行溫謂渥曰公有病而令嫡嗣出外必姦臣爲之不可不防他日有徵召非王令某手書非某之使幸勿應命也渥泣謝而行後

行密問後于判官周隱隱以劉威對諸將皆無言溫進曰宣
州旣賢且長國之令嗣不可廢也乃召渥歸行密疾甚召溫
與左衙都指揮使張顥同受顧託渥旣嗣位憤大臣專權政
非已出乃置東院馬軍置立親信以爲心腹溫與顥頗忌之
故顥將圖弑逆溫知其謀而無所諫止但引嚴可求與之計
事顥旣弑渥白溫議分國兵共歸款于梁祖溫僞許之乃與
可求謀使鍾泰章姚克贍程思忠等入殺顥溫稱疾不朝嚴
兵于第以防不克是日泰章等斬顥渥乃入悉收賊黨紀祥
等誅之遂兼左右衙事無大小皆專斷始立制度戢兵明禁
人漸安堵溫謂可求曰大事定矣與公等克已行善政使人
家解衣而寢于是聞者莫不感激渭襲位遷溫昇州刺史淮

南節度副使七年起復檢校太尉潤州刺史浙西觀察使內
外馬步軍指揮使是時大臣劉威陶雅李簡之徒皆與行密
同起義勲高位重溫以一旦之功超居其上皆內意不服李
遇嘗謂人曰徐溫何人吾素所未識而遽至此豈可入覲耶
乃密議誅溫溫知其謀遣柴再用討之遇出降遂夷其族于
是雅等始懼而來覲溫盡禮事之如見行密雅等乃安中外
遂定以平李遇功加平章事遷行軍司馬領浙西節度十二
年溫請就藩以治舟師乃加浙西招討使封齊國公以金陵
京口毘陵宣城新池陽六郡爲都督府溫以金陵形勝之
地乃大城昇州建大都督府十四年溫徙治金陵以第三子
知訓爲淮南行軍副使留廣陵以輔政十五年知訓爲朱瑾

所殺以長子知誥爲代焉時中朝多事南北道絕諸將分守郡府雖尊奉盟主而政令征伐多以便宜從事溫以都統權不足臨制乃定冊建吳國改元武義稱制拜溫大丞相封東海郡王越人攻常州溫率衆拒之戰于無錫大敗越軍越人多舟師是歲旱江河皆竭諸將白溫曰此天亡越之時也可盡車徒之勢一舉而滅之溫曰天下紛紜民甚困矣錢公亦未可輕也若連兵不解方爲諸君之憂今戰勝以懼之戢兵以懷之其勢不得不服使兩地之民各保室家吾輩亦高枕爲樂豈不快哉多殺何爲乃遣使盡以俘歸之于是越人請和順義三年後唐莊宗滅梁始通使于朝五年封溫東海王賜車輅徽冕七年十月卒于金陵年六十六追封齊王謚忠

武卷一萬八千一百
三十四第一頁

九國志卷三終

九國志卷四

南唐

烈祖以晉天福二年受吳禪至後主煜乙亥歲國滅蓋宋開寶八年也歷三主凡三十九年

世家

烈祖

姓李名昇字正倫小字彭奴徐州人初爲徐溫養子冒姓徐氏名知誥吳太和二年嗣溫位天

祚元年封齊王三年受禪改元昇元國號齊尊溫爲太祖武皇帝昇元三年二月乙亥改太祖廟號

爲義祖已卯改國號曰唐復姓李氏更今名七年二月庚午薨年五十六諡曰光文肅武孝高皇帝

廟號烈祖
葬永陵

元宗

名璟字伯玉初名景通昇長子昇元七年三月已卯嗣位改元保大十五年改元中興是年臣

屬于周奉正朔蓋周顯德五年也宋建隆二年六月己未薨年四十六諡曰明道

崇德文宣孝皇帝
廟號元宗葬順陵

後主

名煜字重光初名從嘉燦第六子宋建隆二年六月嗣立在位十七年至宋開寶八年十一月

宋將曹彬滅其國後主降太平興國三年七月辛卯薨年四十二是日七夕也贈太師封吳王葬洛陽北邙山

列傳

周本

周本

本舒州宿松人漢南郡太守瑜之後祠廟隴畝皆在子孫守故土者猶數十戶本少孤貧嘗在田里獨格猛虎唐末大亂投楊行密軍中以勇敢聞常先登深入家犯矢石身無完肌及歸營自燒鐵烙其瘡飲啗言笑自若軍中猛將皆服之累遷淮南馬步軍使天祐六年楊氏始得江西撫州刺史危全諷率諸郡兵十萬來爭其地屯于象牙潭楚人取高安爲之

援江南守將劉威告急判官嚴可求薦本可用時本從軍圍
蘇州不克恥之稱疾不出可求卽卧內強起之本曰蘇州之
役非彼強我弱也蓋上將權輕下皆專命故爾今必見用願
無任偏裨可求爲言楊氏許之得選兵七千使救高安本曰
楚人非欲取高安也爲全諷聲援爾若先敗全諷楚人必走
乃疾趨象牙潭劉威要之宴犒不留或曰賊勢甚盛宜審觀
形勝計定而後何其遽也本曰賊有十倍之衆使吾軍知
之必將奪氣須乘其銳而用之旣至指授諸將戮力急攻大
破其軍擒全諷諸郡之兵皆潰楚人果遁吉州刺史彭玕信
州刺史危仔昌弃城走于是江西之地始定以本爲信州刺
史越將陳璋據衢州歸款越人圍之本受命以兵迎璋旣至

越人解圍陣于城下璋以衆來奔裨將呂師造曰賊去我咫尺而勒陣不動是輕我也必擊之本曰吾受命迎陳使君陳君今在此吾事訖矣何爲復戰且彼近而不動必有以待我也擊可勝乎待其先動擊未晚也璋亦以爲然乃還越人躡之至中道宿半夜佯驚棄輜重走先設伏于道左越人急追至伏所前後夾擊盡殲其衆越人累至皆敗走唐莊宗入濟陽吳遣司農卿盧蘋使于濟陽莊宗問吳之名將存否而本預焉由是召入爲雄武統軍出爲壽州節度使移鎮廬州拜太尉中書令封西平王本不知書而愛重儒士賓禮寮屬不撓其權吏民愛之性純朴伎藝無能者唯軍旅之事則如夙習烈祖將受禪徐玠周宗等以本及李德誠皆位望隆重故

諷之以爲推戴之首本以昏耄仍不知時變皆少子宏祚左右其事時吳宗室臨川王濛廢處歷陽聞將授終乃殺監守者與親信二騎趨詣本本將見之宏祚固執不可本怒曰我家郎君也何不使我一見宏祚閉中門拒之濛被殺吳室遂移本隨衆至建康勸進由是愧恨數月而卒子鄴有戰功亦至廬州節度使

卷一萬八千二百三十五第五頁

九國志卷四終

九國志卷五

吳越

武肅王以唐乾符二年起臨安至宋太平興國三年忠懿王納土歸朝凡三世五主有國九十八年

世家

武肅王

姓錢名鏐字具美杭州臨安人唐乾符二年二十四起兵討賊歷事四朝累加天下兵

馬都元帥開府儀同三司尚父尚書令兼中書令上柱國吳越王後唐長興三年三月庚戌薨年八

十一在位四十一年諡武肅以王禮葬安國縣衣錦鄉茅山之原

文穆王

名元瓘字明寶初名傳瓘鏐第七子後唐長興三年四月乙未嗣位先是鏐以中原喪亂

于梁開平元年改元天寶私行境中凡改元四天寶十六年寶大二年寶正六年至是以遺命用藩鎮禮仍遵中國年號在位十年于晉天福六年八月辛亥薨年五十五勅諡文穆葬于國城龍山之原

忠獻王

名宏佐字元佑元瓘第六子晉天福六年九月庚申嗣位在位七年于晉開運四年六月

乙卯薨年二十勅諡忠
獻葬于龍山之西南原

忠遜王

名宏侖字隆道元瓘第七子晉開運四年六月丙寅嗣位是時猶稱契丹會同十年閏七月

漢以宏侖爲吳越王遂尊正朔十二月晦內衙統軍使胡進思等作亂劫幽衣錦軍傳位于弟宏

叔居東府二十年始薨年四十四諡忠遜以王禮葬會稽秦望山之原

忠懿王

名俶字文德初名宏俶元瓘第九子漢乾佑元年正月乙卯嗣位宋開寶九年正月入朝

四月歸國太平興國三年納土歸朝賜居禮賢宅端拱元年八月二十四日薨諡忠懿以鹵簿鼓吹

葬于洛陽縣之賢相里陶公原

列傳

杜建徽

鮑君福

成

及顧全武

黃晟

杜建徽

建徽字延光新登人父稜廣明中爲鎮海軍節度副使歷常

潤二州刺史兩浙行軍司馬黃巢之亂稜歸鄉黨保聚徒衆
得千餘人號武安都鏐與董昌起兵石鏡及平劉漢宏其衆
漸盛稜謂諸子曰吾每責人不過十罰則爲之傷心竊觀錢
公每臨斬決皆談笑自若成大事者必此人也遂率衆歸附
于鏐光啓中從征薛郎以稜爲常州刺史尋遷潤州乾寧中
安仁義逼東陽命稜率師討之仁義宵遁鏐平宣州以其降
卒隸中軍號武勇都爲腹心稜常患之密遣人白鏐曰狼子
野心稜觀武勇都士卒終非大王所畜願勿近鏐不聽及徐
綰叛鏐思稜言遣祭其墓建徽少強勇不與諸昆弟類嘗自
署軍事押衙稜聞之頗加詬責建徽出顧左右而歎曰大丈夫
何止一軍校耶後隨稜歸鏐稜治常州爲淮人所攻建徽

率兵馳赴父難未及境而城已陷遂還新登後稜自淮南歸軍中嚴整無改稜甚嘉之累從征伐未嘗介甲所至輒有功軍中謂之虎子乾寧初從征董昌爲流矢貫臂而戰不輟開平中從征姑蘇與敵遇于河河梁斷策馬經渡及岸而馬斃因葬之至今馬塚存焉徐綰之亂建徽率所部自新登來赴難或有勸鏐東保會稽者鏐未之答建徽按劍叱之曰事若不濟當同死于此誰敢東渡耶鏐甚壯之睦州陳詢叛建徽之姻也鏐疑建徽不言俄有睦州親吏來降持建徽所遺詢書以示鏐皆戒勵勸亂鏐大嘉歎賜建徽錢百萬從兄建思嘗譖建徽言其第中蓄兵仗將爲異圖鏐遣人密視之一日建徽方食堂上使者至徑抵卧內建徽但食不顧鏐感悟益

加殊待性儉率出入導從不過數人凡得賜予皆散施鄉里親族每朝使至鏐與之宴必指建徽以示之曰此杜丞相今日至此皆其力也其孫昭達爲宏佐內都監使盛治第宅建徽曰乳臭兒不諳事乃爾後昭達果以罪誅嘗從擊鞠于廣場盤辟大呼舊所中箭鏃忽自臂中迸出人皆壯之初稜之將死也散財物于諸子至建徽但得一笏謂曰此吾所秉者唯女能保之建徽自授節鉞至于丞相封鄖國公皆奏授朝命子弟多至二千石連姻公室人稱其盛乾祐三年卒年五十八

卷一萬八千一百三十七第二十頁

鮑君福

君福字慶臣餘姚人少羈貧性淳厚有膽勇餘姚有井面闊

丈餘橫以雙梁水深不可測君福每醉必寢其上及從軍以
驍勇聞初事劉漢宏及鏐東討乃率其黨來附號曰向明都
累從征討有功能馬上輪兩劍望之若飛電沈默少語軍中
謂之鮑開淮人寇三衢以君福爲應援使屬刺史陳璋叛淮
人入其城楊行密令其將李元嗣監守君福署以郡職君福
不受鏐聞之恐其被害也乃密與絹書令其就職君福竟拒
之一夕與元嗣飲伺其醉而殺之奔歸錢塘授衢州刺史淮
人屢寇其境君福每擊破之及罷歸鏐勞之曰公在郡數年
戰鬪而已豈爲優賢邪因復遣之任傳瓘領清海軍節度辟
爲副使同平章事兼侍中天復五年卒年七十七

卷一萬八
千一百三

成及

及字宏濟錢塘人祖克評唐嘉王府長史父貞國子博士及性純厚爲鄉里所知光啓初江浙兵亂及保聚于富春稱靜江都劉漢宏作亂及以所步兵從鏐討之漢宏平鏐宴犒諸軍北關鎮將劉孟安亂于席上拔劍而將擊鏐坐中驚愕不敢動及徐起舉胡床格劉孟安仆于地左右因擒殺之以功奏遷散騎常侍靜江軍都指揮使潤州刺史薛朗常州刺史丁從實叛鏐命及討之破朗軍于陽羨進圍毘陵從實具牛酒以犒之並遺美女于諸將及大怒曰我當菹醢從實而食之今乃以酒炙女子悅我耶因盡索諸女斬之親督諸將攻陷其城從實遁走以功奏授越州防禦副使潤州刺史阮結

卒命及代之遷蘇州刺史乾寧三年淮人攻姑蘇常熟鎮將
陸郢等以兵應之及不能守遂降于楊行密行密入城閱府
庫多圖書藥物由是重之與歸淮南署行軍司馬及拜泣曰
及以百口託于錢塘姑蘇城陷不能引決豈忍更圖富貴願
以一介之軀贖百口之命乃引佩刀將自刺行密遽起執其
手因厚禮而歸之鏐迎勞郊外把袂以泣署鎮海軍節度副
使徐綰之叛從鏐還至北郊鏐微服將入城及代乘其車行
與賊鬪鏐遂得入綰平奏授保大軍節度遷彰義軍加開府
儀同三司乾化三年卒年六十七

卷一萬八千一百三十七
第二十二頁

顧全武

全武杭州餘姚人少時嘗爲僧博通外學機警有才略鏐每

延接與語甚器之及入都建國因辟令從戎以爲裨將軍中
號曰顧和尚討賊有功累遷武勇都知兵馬使乾寧二年董
昌據越州叛遣裨將崔溫李蕙率兵屯石侯全武率衆擊破
之臨陣斬溫蕙湖州將徐應起兵以應昌與淮人圍嘉禾全
武擊破其烏墩光福二柵以屯西陵三年昌將徐珣李元賓
據肅清四■九鄉之地全武自西陵擊破之洵元賓皆乞降
盡總其衆昌又遣裨將湯舊守石城袁邠守餘姚全武自西
陵趨石城與舊遇大戰石城東斬首千餘級舊僅以身免去
會稽三十里不敢出援復攻餘姚袁邠堅壁自守昌遣將徐
宣率兵援邠全武潛師斷其要衝俟軍半過橫出擊之殺二
百餘人擒徐宣翌日袁邠以城降全武進軍圍會稽昌閱戰

五雲門縣玉帛以誘我師全武率勵諸將并力擊之昌懼退入城中遷全武諸軍都虞候東面都知兵馬使遂攻五雲門時淮將臺濛陷姑蘇鏐欲遣全武屯西陵以備北寇全武曰賊之根本繫于越州豈以失一姑蘇而遂緩大衆耶當先拔越州後復茂苑未爲晚也鏐從之俄而越州陷執董昌以歸奏加全武檢校太保明州刺史四年與沈夏許再思率師由海路以赴嘉禾諸將欲緩入全武曰嘉禾圍閉久矣莫知我之勝負宜速往慰之因倍道而進城中見我軍旗幟皆稱萬歲全武與昌將李宗禮顧金戰于城外大破之獲顧金宗禮以歸餘衆遁去俘千人以歸嘉禾平時吳將田頴守吳興聞之亦遁去全武追襲百餘里斬馘沈溺者千計遂督衆復蘇

州吳將臺濛棄城遁走時淮軍屯崑山全武擊破之擒吳將
秦裴光化二年加贊忠去僞功臣天復初淮南李神福攻衣
錦城鏐遣全武率兵禦之全武素輕神福領衆夜掩其軍爲
神福所敗執全武送于淮南鏐方食聞之大驚以匕擊案曰
喪我良將二年楊行密遣使來求秦裴因歸全武鏐大喜以
秦裴報之是歲徐綰許再思叛圍外城鏐懼綰據會稽將令
全武領兵屯越州全武曰東府不足往當詣邳溝鏐曰何也
全武曰綰急必召田頔來則淮南興師矣鏐乃令全武行成
于吳全武又曰獨行必不濟請擇諸公子與之同往鏐乃以
傳璫聘楊氏與全武俱行至廣陵楊行密乃遣使召頔還師
明年全武以傳璫同歸長興初以疾卒年六十五全武寬裕

有謀善撫士卒喜怒未嘗形也每大敵在前鼙鼓動地分布行陣頤指口授怡怡如也嘗圍淮將秦裴于崑山裴援絕不降頗殺傷士卒全武自爲長檄以諭裴裴乃封函納款全武喜召諸將觀之旣發函乃佛書一卷蓋以全武爲僧也諸將失色全武大笑曰爾不卽死何暇相謔也及裴降乃爲言于鏐卒全活之時人稱其長者

卷一萬八千一百三十七第二十二頁

黃晟

晟明州鄞縣人少伉勇始應募于望海鎮鎮中立表以選魁梧者晟以矬陋不中選隸都虞候林膺膺甚倚之後潛歸鄞江募衆據平嘉埭權知州事楊僕召補平嘉浦將有衆千餘人初劉漢宏以台州賊婁文知明州事僕率兵擊破之其黨

杜宗自寧海鎮率鄉豪據奉化晟自平嘉以所部兵擊之擒
杜宗赦而不殺盡驅使還台州獲其粟帛悉屬于本道遷伙
飛都副兵馬使徙奉化鎮將餘姚鎮將相嘉率衆侵越州董
昌禦之不利晟領兵追嘉殺之昌奏授晟左散騎常侍充浙
東道東面副指揮使會明州刺史鍾文季卒晟遂據其郡晟
好禮尙文士江東儒學之流多往之辟前進士陳鼎羊紹素
以爲賓介頗加優待築居于城中謂之措大營董昌將僭竊
晟每移書諭之及鏐舉兵乃率衆來應破越州晟功居多在
任十八年開平三年卒時屬郡刺史卒多遺疏請立其子晟
疾亟獨上疏不請以子爲嗣凡府庫所蓄必題曰送鏐頗歎

其忠順

卷一萬八千一百三十七第二十三頁

九國志卷五終

九國志卷六

前蜀

高祖以唐大順二年入成都至後主成
康二年國滅父子二世凡三十五年

世家

高祖

姓王名建字光圖許州舞陽人會黃巢亂與鹿
晏宏等西迎僖宗于蜀時中和二年十二月也

明年赴行在僖宗以爲諸衛將軍光啓二年三月
再西幸李昌符焚棧道幾斷建捍僖宗馬過烟焰

中既至興元命爲壁州刺史大順二年破陳敬瑄
入成都爲西川節度使大復七年九月建號曰蜀

明年改元凡改元五武成三年永平五年通正一
年天漢一年光天一年共在位十二年于光天元

年六月薨梁貞明四年也年七十二諡曰神
武聖文孝德明惠皇帝康號高祖葬永陵

後主

名衍字化源初名宗衍建第十一子光天元
六年六月癸卯嗣位改元乾德至六年改咸康于是

年十二月爲後唐魏王繼岌破滅出降時唐同光
三年也明年四月己丑被殺于秦川驛年二十八

列傳

王宗裕

王宗壽

王宗鑑

王宗佖

王宗翰

王宗彛

王宗侃

王宗瑤

王宗播

王宗鉢

王宗弼

王宗範

周博雅

晉暉

張造

張勗

李簡

潘在迎

王宗裕

宗裕建之宗屬幼從建入爲牙校善遁甲絕甘分苦得將士
心大順二年與王宗祐克西川遷青州刺史建伐梓潼爲第
二指揮使建親督諸軍力戰宗裕必冒矢石以掖衛之東川
平諸將爭功宗裕口未嘗言戰謙和接下人皆服其沈厚爲
東川留守昭宗下詔加以眞命武成初召歸總成都城內外
諸軍事其導從不避成都尹崔隱隱懲其僕宗裕大怒入白

建建曰京尹五大長官汝有識之士也不能教戒參從反令
我責大尹耶宗裕僂俛而出再爲東川節度副大使班白者
攜幼以迎于道封通王永平初建興師取秦鳳州再至緜谷
宗裕饋輸貢獻道路相望建以其盡瘁明年乃改東川爲武
德軍以宗裕爲節度使宗裕旣秉旌鉞遂貪冒財貨以白金
百兩作鋌鐫記年月每五鋌爲一束以生牛革裹之子諫曰
牛革著物堅確後難可開宗裕叱之曰何更開也罷歸衍慰
諭久之自謂功高以征伐爲己任築第蜀城中頗侵損民舍
有酤者青陽冢不徙去宗裕遣人以巨虺寘其舍下復投以
洩穢酤者將訴于建宗裕懼而止又于郊外開廣林莽壞掘
邱墓立亭榭鑿池沼樹花木攜妓縱酒爲樂一日方醉坐軒

檻中見數人衣冠甚偉謂宗裕曰與君幽顯異路何相陵太
過因相顧大笑宗裕亦笑遽仆于地寢疾不數日卒

卷一萬八千一

百三十六
第一頁

王宗壽

宗壽建宗人之子幼從征伐警悟有機辯好琴碁篇什方術
皆臻其妙建人蜀奏署懷節軍使以所部鎮遏江原縣嘗于
許汝間得一鐵鏡晦不可鑑屢令工人瑩之了無所睹著

案

六帖十三
引作置

巾奩中有日矣至是忽覽之光采煥發因見市舍

中一小兒青衣艸角獨坐宗壽異而使人召之小兒

案六帖引作

宗壽令人訪之
小兒欣然肯來

曰何以知我至此宗壽以言怛之不懼因曰

我與

案六帖引作爲

鐵鏡來耳公不見還神物終當化去君以還

我他年當有報也宗壽出鏡與之乃長揖謝

○案六帖引作而

去後

宗壽得辟穀行氣之術或謂小兒傳之乾寧初建令率所部兵平南充遂知果州事安輯離散得郡牧之體武成初封嘉王荆南高季昌略地三峽建以宗壽爲忠州節度使兼行營招討使以鐵鎖斷夷陵江季昌戰艦不能進宗壽禦之大敗荆人季昌奔歸以功加中書令宗壽性方正樂于貞退自歸成都以飛鍊自娛與孟繼平許寂楊珍爲入室清談之友未幾爲金吾上將軍持法平正院吏周郃受贓繫獄宗壽捕鞠得其實郃以重貨求救于大閹爲解宗壽不聽竟棄郃市建討鳳翔以宗壽爲第三招討使取陳倉還旌襲位宗壽請老久之行沈于酒色時宣華苑初成數爲長夜飲宗壽在坐諫

衍請以社稷爲念少近盃酌因感激流涕佞臣潘在迎顧在
珣韓昭等奏曰嘉王酒悲無怪也乃大爲諧謔而罷後起爲
武信軍節度使破雞子槽賊擒其魁李茂章請納賂以求免
宗壽曰吾歷官四十年未嘗受同寮之遺況爾賊乎遽命斬
之唐師入境郭崇韜遣使遺宗壽書宗壽不納聞衍降乃治
裝赴闕時衍先次岐陽宗壽請于李嚴求謁衍衍見之泣下
曰早從王言豈至今日及衍遇害奔入熊耳山依定林寺明
宗卽位詣闕自陳賜與甚厚授保義軍節度使行軍司馬上
表請葬衍許之初衍至秦川驛母妻及子弟遇害者十八人
並藁葬道左至是宗壽盡易棺斂縞素徒步親自營護偕葬
于三趙村聞者異之明年授淄州刺史卒

王宗鍼

宗鍼建從子也以偏裨從征建入閬州署都知兵馬使從征東川有功遷廣都鎮遏使天復中僖宗反正建令宗鍼以所部兵奔問行在授北路第二班馬步軍排陣使建親征山南以宗鍼爲御營使師還留屯平利時岐將劉知俊等繼領大軍分路來攻由階成路奪固鎮糧宗侃唐道襲等禦之至青泥嶺爲知俊所敗退保西縣會大雨漢江漲宗鍼自羅村得鄉導緣山而行數百里與宗播遇于鐵谷合軍出湯頭時知俊自斜谷山南直抵興州圍西縣軍人散掠巴中宗鍼與宗播襲之會建亦至遂解西縣之圍以功遷山南節度使同平章事從征秦鳳遷中書令衍襲僞位加太保乾德六年卒

王宗佶

宗佶豫章人本姓甘氏幼穎利建討徐堂舉于江西獲之憐其慧黠是時諸子未生遂收爲養子每給事帳下後從建入閩中隨諸將征討有功補貔虎都指揮使遷嘉州刺史乾寧中建克緜州以宗佶爲兵馬留後尋加檢校太傅知節度事未幾移鎮梓州昭宗幸鳳翔建遣宗佶與宗滌等率步騎迎駕至山南降節度使王萬宏以功加檢校太尉武成初進爵爲公拜開府守中書令宗佶恃其位隆地長頗專攻伐而諸將皆避之多樹朋黨策勲錄舊高下在心附順者超擢違戾者擠之散地及宗懿等兄弟成長內不自安遂與御史中丞

鄭騫判官李鋼謀求爲方鎮欲爲亂建知之因進封晉國公
罷其機務宗佶憤怨陰養死士出入卧內將圖不軌鄭騫等
又教宗佶求爲大司馬盡總六軍并乞爲儲貳表連上而辭
甚不遜建未之罪也忽一日請對言詞甚悖建勉諭令出終
不肯去因叱衛士撲殺之騫鋼並賜死

卷一萬八千一百
三十六第八頁

王宗翰

宗翰建之姊子也本姓孟氏建爲神策軍使僖宗封其姊爲
晉國夫人宗翰最被親愛建入蜀以宗翰爲拱辰軍使累遷
眉彭二州刺史封集王賜姓王氏授文成等州招討制置使
宗翰好蓄妓妾後庭綵翠常百餘人性殘虐吝嗇刺彭州日
部民史有胡讓莊號爲沃饒宗翰殺史民而取之元膺之亂

以兵人衛建令安撫元膺倉卒而死建疑宗翰殺之竟無以
自辯通正初授通義軍節度使同平章事守興元尹以杜堯
嗣爲之佐令規正焉宗翰于泉倉置寨于捍龍山與上清寨
相接分鄉兵屯守建略地秦隴以宗翰爲第一招討使拔大
散關取陳倉耀兵三壘而還宗翰所爲不法堯嗣多諫正之
及爲招討使請堯嗣同行至大散關堯嗣復疾請歸府乃自
木皮店沿流而去宗翰令以膠船載之中流而溺天漢元年
宗翰被病若見堯嗣旣而堂宇藩溷隨其大小皆堯嗣在焉
疾遂亟數日卒

卷一萬八千一百
三十六第二頁

王宗滌

宗滌潁川人本姓華名洪建將入蜀募勇敢之士以宗滌爲

廐將宗滌膂力驍果輕財好施爲士卒所推得隸神策軍爲小校建入成都以宗滌領前鋒兵奪星宿寨進攻七里亭以功奏授威信都指揮使邠州王行瑜與鳳翔李茂貞攻楊守亮于山南鳳州節度使滿存禦之爲茂貞等所敗存與守亮退保山南茂貞逼之因同奔閬中建令宗滌率兵禦之破存等衆斬其將梁承裕俘數千人景福元年授邛州刺史爲都指揮使攻九隴守亮遣將符昭率兵解九隴之圍直趨成都營三學山建急召宗滌歸夜至古城去昭營數里乃多設更鼓遲明益張旗幟徧諸山谷昭疑蜀師不敢出戰宗滌命發機石擊昭營中聲震山谷昭恐懼乃夜遁去宗滌回攻九隴拔之後從建攻梓州宗滌以衆五萬先趨東川與岐將李繼

徽遇于元武宗滌擊敗之以功賜名五十三指揮之首梓州
陷斬顧彥暉降其兵七萬餘衆遂以宗滌爲東川留守光化
初奏授東川知節度副大使事二年歸覲遂以疾乞解職建
不許昭宗反正梁祖與崔允叶通盡誅中官更相引兵輦轂
之下咫尺不通昭宗密遣中官仇承坦諭旨于建建遣宗滌
與宗佶宗播率步騎迎駕至山南逐王萬宏據其城授山南
節度宗佶等以其功高邁以飛語建疑之因至詰讓將加之
罪宗滌對曰天下寇盜平矣是大王聽邪說誅功臣之秋也
建曰昨在大謾天寨中已有不軌之言矣我念汝之勤尙爲
隱忍今又狂率如此豈憲章之所容也宗滌不顧而起建因
令人監歸本營明日盡削奪官爵流于松州旣行縊之于城

外營中將士聞之皆相對掩泣初建開國造端門新樓名曰紅樓采繪既畢都人士女競往觀之曰看畫紅樓建以宗滌得軍情復有是讖故誅之人稱其冤

卷一萬八千一百三十六第五頁

王宗侃

宗侃許昌人本姓田名師世爲鄉豪隸名忠武軍籍建爲部將奏署宗侃決雲都兵馬使光啓中田令孜逼僖宗西幸道出陳倉建率宗侃同扈蹕又從建起閬中賜姓名討陳敬瑄敬瑄遣漢州刺史張頊領萬餘人來迎戰宗侃擊破之敗句惟立于學射山韋昭度來鎮西川敬瑄遣將山行章將兵六萬拒戰宗侃破之于浣花寨縣州刺史常厚奪留東川顧彥暉旌節建令宗侃討之破其七寨厚奔緜谷奏授宗侃雅州

刺史遷眉州團練使未幾授武信軍節度使建開國以宗侃
有佐命功進侍中城內外都指揮使尋加中書令充北路行
營都統岐將李彥琛寇漢川宗侃保安遠城與宗鑑等三將
同破岐軍斬彥琛衍襲位封侃爲魏王卒年六十六子承肇
入洛爲行軍司馬

卷一萬八千一百
三十六第六頁

王宗瑤

宗瑤字寶臣燕人也本姓姜名郅以騎射隸許昌軍籍中建
擢爲隊長建迎駕山南宗瑤以勇伉得隸左神策軍能馬上
盤槊長丈八尺每臨陣馳突人望而畏之遷威猛副兵馬使
建入閬州爲先鋒十九都都頭左威猛都知兵馬使賜姓王
氏更今名軍至絲竹誘諸蠻酋帥蹇諫等得其兵數千人破

楊守厚授蜀州刺史昭宗幸石門詔建赴難以宗瑤爲北路
行營都指揮使奏授嘉州刺史天復中授武信軍節度使建
開國加太子少傅後封臨淄郡王建病亟以宗瑤爲金吾使
參預顧命衍襲位授太傅嘗自作高冢遇暇則酣酒高歌于
其中無疾忽一旦默坐而卒年六十七人以爲知死

卷一萬
八千一

百三十六
第六頁

王宗播

宗播字昌遠上蔡汝陽人本姓許名存少有膽勇秦宗權據
上蔡召募豪傑以宗播爲裨校宗權爲梁祖所破部下皆逃
散宗播亡抵荊州聞郭禹在歸州頗完聚得士卒心遂往依
焉禹知其材令統青州元從兵三萬人時襄州兵圍逼荊州

靜江遊奕將牟權領衆屯清江源據大山列寨諸營危窘宗播言于禹請討權于是伏兵清江岸中遣列校蔡行能捨舟直抵山下權素輕行能罄軍來戰行能遁歸舟中權盡銳逐之宗播發伏兵掩其後擒牟權收其軍實以歸于禹禹大喜俄而荆帥張瓌求救于禹禹宗播率岐州兵解其圍禹度瓌懦弱因據其城秦宗權上蔡別將楊守厚以數千人由均房來攻夔州刺史毛湘棄城遁走保白帝厚圍之禹與宗播以十糧子兵寨于南山以攻厚厚令夔校韓楚言罵禹禹不勝其辱宗播請以壯士五十人夜斫其營上赤甲山揭巨石投厚寨中厚恐懼與百人遁去遂破其寨復取夔州毛湘奔成都禹令捕韓楚言已爲妻所殺矣先是楚言妻李氏語其夫

曰君嘗爲常司空罵郭尙書今寨柵危急鋸解之苦旦夕至矣不如早爲之所楚言不忍曰且看事勢李度楚言終不引決乃以刃自後斷其首并殺二男一女曰無爲他人所魚肉也遂自到死禹聞之大驚駭爲給棺殮刻石以旌之留行軍劉昌美守夔州與宗播沂江而上郡縣望風而潰號宗播爲許埽土禹至萬州賞功以宗播爲萬州刺史宗播不得志居歲餘禹遣人偵之見宗播不治州務但出蹴踘乃曰萬州必背我勻脚力耳遣卒三百襲之宗播踰垣夜遁遲明其衆稍至遂保豐都禹攻之宗播奔成都建得之甚喜令以所部屯蜀州賜姓名奏授緜州刺史建討王萬宏以宗播爲前鋒破金牛黑水西縣褒城四寨乘勝傳其城萬宏降以功奏授漢

州刺史加檢校太保建卽位改金吾衛上將軍領彭州團練使岐將劉知俊圍西縣宗播爲西面招討馬步使夾廉讓水置連珠寨首尾相應以勁卒二百出五洞礮擊之岐軍大敗遷武信軍節度使又敗諸蠻于潘倉加兼中書令爲三招討攻隴州降李繼安封臨潁郡王被病歸建至其第執手曰北面開拓公之力也衍襲位授太子少傅乾德五年卒年六十

八

卷一萬八千一百三十六第六頁

王宗鈇

宗鈇許昌人本姓李名武父裕爲忠武軍小校鈇少無賴善騎射建募義兵迎駕得宗鈇以隸帳下至岐山屢有戰功署爲隊長尋遷爲裨將以勇過人號爲武子路遂爲軍中所推

建攻成都一日城內出數騎直抵七里橋宗鉢因躍馬奪關
子門蜀將宋行能策馬援槩而至將及宗鉢佯墜馬奪槩以
刺行能徑走入城宗鉢逐之至門而還建慰勞久之撫背曰
吾得成都當有汝十死洎建開國授晉州刺史性輕率好貨
恃勇不法未周歲以訟免官歸成都

卷一萬八千一百
三十六第七頁

王宗弼

宗弼許州人本姓魏名宏夫以家籍隸忠武軍建討王仙芝
尙君長皆在帳下建取閬中補義勇都十將賜姓名及入成
都改左驍騎都知兵馬使累遷嘉眉二州刺史建征果州宗
弼掠地于飛鳥爲顧彥暉所獲彥暉責之曰王公見討而君
爲大將不能諫止何敢來見宗弼曰罪固當死但念平昔與

相公有素故敢來也彥暉笑而釋之先是岐將楊守厚攻梓州彥暉乞援于建建遣宗弼等援之臨行建謂宗弼曰汝等破賊彥暉必犒汝汝當報宴俟彥暉至營中則擒之俱來庶免後舉也宗弼如其約及將報宴而宗弼告之彥暉遂以疾辭故宗弼以爲言于是厚待宗弼以爲養子及彥暉兵敗建圍之益急彥暉假子瑤有武勇知其城必陷請彥暉聚族沈飲自裁無爲它人之所魚肉一日城陷瑤仗劍入室宗弼與諸子尙在彥暉顧宗弼曰爾非我子可自求生因壞垣而去瑤遂刃彥暉與諸子而自剄建入梓州宗弼束身自歸建待之如故逾年復令將上軍再授嘉州刺史封鉅鹿郡王天貞軍節度使衍襲位拜宮城内外都指揮使判六軍事封齊王

衍將往秦州宗弼曰唐兵壓境秦州未可去也又上表切諫
衍怒擲之于地衍次利州唐師已入散關陷鳳州衍遂遣三
招討屯三泉以拒唐師未戰三招討俱遁去因令宗弼守緜
谷而誅三招討宗弼遂與三招討同送款于魏王乃還成都
斬宋光嗣等函首送于魏王遷衍及母妻于西宮貴戚納金
寶進妓妾救死于宗弼者不可勝計微有絀誤者咸遭戮焉
盡輦內藏之寶貨歸于其家魏王遣使徵犒軍錢數千萬宗
弼輒斬之魏王甚怒及王師至令其子承班賫衍玩用直百
萬獻于魏王并賂郭宗韜請以已爲西川節度使魏王曰此
我家之物也焉用獻來魏王入城翌日數其不忠之罪并其
子斬之于球場軍士取其尸齺而食之先是蜀有謠言曰我

有一帖藥其名爲阿魏賣與十八子至是宗弼背國歸唐果其驗也

卷一萬八千一百三十六第七頁

王宗範

宗範本姓章氏幼喪父隨母張氏再適建爲九夫人宗範年十歲冒姓王氏及建開國立張氏爲后宗範沈厚寡言好延納名士親從軍晉暉以女妻之封夔王加太子少師永平四年黎州蠻入寇以宗範爲第一招討使宗播宗壽副之乃以所賜金募果敢士出邛崃關至潘倉大破蠻衆斬其首領趙嵯政追奔至山口城與宗壽合殺八千餘人擒蠻王子趙龍眉等三人以歸加中書令後隨衍入洛至長安張錢爲節度留後宗範以珍玩賂錢請復姓爲猶子易名師範後唐天成

初王宗壽改葬衍師範來弔贈宗壽不與齒後爲雍州行軍

司馬卒

卷一萬八千一百
三十六第一頁

周博雅

博雅潁川人唐光啟中爲龍州司倉參軍考滿將歸闕以川
路梗澁乃寓止縣谷建至博雅袖策謁建于軍門建素聞其
名一見忻然接待甚厚置之賓席博雅因說建曰唐祚將終
有土疆者恣爲吞噬以彊并弱然以僕觀之皆非濟世之具
也明公御衆有術臨事能斷僕昨在龍州已爲明公籌之矣
自主上蒙塵明公親鞅乘龍匍匐棧道懷國璽以從周旋患
難險阻之中勤亦至矣及論功受賞不過刺史今端守一隅
坐待窘迫非君子豹變之象也且葭萌四會五達之郊非久

安之地若不薄人人將薄我不如閬地與民豪楊茂實爲
陳田之肘掖控扼要害不修職貢以明公臨之可一鼓而擒
也得其地以廣形勝得其士以增卒伍此策之上不可失也
建然之遂取閬州之地乃奏署博雅爲判官建赴成都爲陳
敬瑄所拒退無所保建甚危之博雅曰兵家勝負無常古者
出師自非晉重耳之賢豈有一戰而霸者今邛南城壁完粟
支數歲取之可以斷蜀右臂願明公留意建曰吾少在戎行
備知民意若無受鉞之將必謂自圖其利今欲請朝廷命將
出征吾當助成其事博雅曰善乃令博雅作奏牘朝廷嘉之
下詔褒獎乃授韋昭度西川節鉞令與建同討敬瑄割邛蜀
黎雅四州爲永平軍節度使建壁靈池與王師戮力逾年會

糧運不繼建請韋公班師因謂博雅曰韋公歸闕我當以兵
塞劍門朝廷謂我何博雅曰今皇綱不振疆臣掣肘朝廷命
令不出閨壺明公當折節爲軍民計豈得顧此也于是建乃
請韋公歸闕而上表自陳急攻成都克之奏授博雅觀察判
官後出知渝州未幾詔加節度判官遷嘉州刺史建開國召
拜成都尹遷御史中丞俄拜中書侍郎平章事建薨葬永陵
博雅議山陵事俄請老遷左僕射出爲永平軍節度使雲南
安撫使依舊平章事卒年六十六博雅本名庠犯孟知祥名
蜀史追改之

卷一萬八千一百
三十六第三頁

晉 暉

暉許州人父和爲忠武軍列校暉少有胆氣杜審權鎮許昌

以暉爲頭營十將從鹿晏宏迎駕至山南晏宏遲留不行暉素與建相善謂建曰鑾駕將回晏宏觀望不進而姑息吾輩甘言見誘苟不自圖去就禍且及矣不如以所部兵爲勤王之舉不爾爲晏宏所累且宮車反正以吾等爲賊黨何面目行于天下建然之遂俱行迎至山泉僖宗嘉之名其軍曰忠義以暉爲指揮使隸右神策軍及再幸褒斜復統南營兵與建同爲先鋒天子居梁暉統四都兵屯黑水修營棧道往來無阻朝廷慮其彊盛因罷拱衛授集州刺史以散其朋聚一歲之中凡歷數郡蓋欲窘之也建圖梓州遂往會焉建以暉爲壕寨使建開國授武泰軍節度使同平章事黔中郡縣多屬涪陵比部員外郎陳凝爲涪州守以暉制衙中不帶涪州

刺史遂不納牌印暉上疏歸之疑責授瀘州司戶暉招來逋
竄剷除蠹弊州民愛之罷上表請老日夕與親友宴談噓爲
娛嘗自言曰吾生罹多難學執干戈者爲求飽暖耳今至此
矣復有何望我嘗拔王宗魯于行陳今致爲將相女復爲王
妃矣分封宏農郡王卒年七十九

卷一萬八千一百
三十六第四頁

張造

造長社人父公素齊州長史造幼好兵家之學年二十應募
隸忠武軍從鹿晏宏出征及晏宏據褒中心無同志因與建
謀曰吾輩遠離鄉土保聚無名今大駕將回主帥反側或隨
其逃遁則皆賊也不如率衆拱衛以取美名建納之遣使上
表僖宗驛召旌賞遂參翊衛隸神策軍及再幸褒中以扈從

功授萬州刺史道阻不能去會建起兵閬中以造爲行軍司馬廣漢糧盡建慮軍情有變謀各據一郡以自固造首倡大義慰諭將士衆皆感悅龍紀初詔授行營諸軍馬步都虞候遷茂州刺史從建討陳田引軍攻笮橋爲陳敬瑄所敗歿于軍年四十五建以其死事聞詔贈司徒子彥昭爲感德都知兵馬使從建收巴西破葛佐授劍州刺史建圍梓州彥昭攻堅力戰歿于陣建痛惜撫其尸以泣曰父死于前子繼于後忠勇之節出卿一門矣

卷一萬八千一百
十第百頁

張劼

劼長葛人善推步之學少隸忠武軍籍從討王仙芝以勇敢稱建以所部迎駕署劼義勇都判官復隸神策軍乃總占候

之要著太一元精祕訣訶七十一首以獻僖宗奇之詔與建
同列從建起閬中破德陽寨斬王彥儔時建屢爲山行章所
困劼每臨陣拔槩蒙輪殺十餘人敵爲之稍却奏署定信軍
都知兵馬使大順中與王宗侃同破浣花寨建將入成都城
中多亡命不逞之徒建恐其搆亂乃令劼爲諸都斬斫使兼
左右廂都虞候以誘掖鎮撫之劼旣入城索無賴者得百餘
人悉鞭其胸死者相藉中外帖然不敢偶語建卽位歷眉叩

二州刺史卒

卷一萬八千一百
三十六第四頁

李簡

簡許州長葛人少以驍勇隸忠武軍從鹿晏宏出征有功遷
爲列校建起閬中簡爲義勇都副兵馬使大順二年陳田遣

將屯犀浦簡以所部擊破之武定節度使楊守忠與守厚舉兵援陳田建令簡逆擊之相遇于鍾陽簡謂諸校曰賊遠來多疲及其未成列擊之遂整陣鳴鼓而進連破其七寨斬首千餘級擒其將楊知宥楊行立等獲其軍資甲馬不可勝計建攻毛湘于邛州以簡爲前鋒晉原守任從海領步騎二萬街枚奄至解邛州之圍簡曰賊輕而驕正可用奇不勞與戰乃分步騎三千爲兩翼潛河村俟其半過夾攻之從海敗俘甲馬數千俄而邛州軍使任可知斬湘以降建令簡入城慰撫景福中彭州部將呂堯率兵焚繁雒以援守厚建令簡逆擊之臨陣斬堯遂進攻其城連拔七寨守厚遁走建獻捷于

朝以簡爲邛州刺史卒于治所

卷一萬八千一百三十五第五頁

潘在迎

在迎字亞卿前蜀樞密使炕之子身長六尺精神警悟少任俠不脩細行交結屠狗天復中起家節度押衙王建開國以爲扈蹕軍使檢校司徒守羽林大將軍內皇城使唐文扆構難謀害宿將委在迎以腹心黜者旣行多以後命誅在迎妻徐氏后兄女也爲營護之獲免衍荒于酒色在迎與韓昭輩多預宴宮中自昏達旦王宗壽泣諫衍在迎等紹以酒悲自是大臣結舌無敢言者王宗壽鎮果州以在迎爲都指揮使知州事渠江賊杜處齊招納亡命據巴王城在迎討平之以功授果州團練使魏王繼岌平蜀補爲右職知祥鎮成都復令典兵未幾出爲蜀州刺史董璋遣使并韜于郡中置邸回

易在迎給事蓋仁達盜官麥以逃誣告在迎因并鞫密餽金于董璋知祥命執仁達送于蜀州在迎斬之尋令在迎以州兵按撫後田乃服藥下痢以疾告召歸知祥親臨問焉遂請致仕從之嘗謂人曰我于前蜀有誅唐文展安社稷功當合秉旄鉞今逮事霸主親觀虎變求一鎮不得命矣夫明德末卒于成都年五十五在迎辯而多詐以財發跡至于權門要地悉啗以厚利未必盡仗之但不欲其冷語爾

卷一萬八千一百三十七

第百頁

九國志卷七

後蜀

高祖自後唐同光三年入蜀至後王廣政二十八年國滅父子二世凡四十一年

世家

高祖

姓孟名知祥字保允邢州龍岡人晉王弟克讓壻也莊宗建號爲太原尹同光三年破蜀以爲

成都尹充劍南西川節度副大使明年莊宗遇弒明宗立加封平原公長興三年破董璋兼有兩川爲蜀王明年建國改元明德是年七月甲子薨年六十一謚曰文武聖德英烈明孝皇帝廟號高祖

葬和陵

後主

名昶字保元初名仁贊知祥第三子明德元年七月丁卯嗣位不改元仍稱明德元年四年改

廣政至二十八年宋將王全斌軍至城下出降五月至汴京改封秦國公越七日薨時宋乾德三年六月也年四十七追封楚王葬洛陽

列傳

趙季良

趙庭隱

趙崇韜

張業

武漳

李肇

李仁罕

李延厚

張公鐸

張虔釗

潘仁嗣

龐福誠

李彥琦

孫欽

何重建

孫漢韶

高彥儔

李廷珪

王彥銖

李奉虔

王昭遠

安思謙

焦彥賓

趙進

石處溫

孟思恭

申貴

趙季良

季良字德彰濟陰人父允唐穀熟令季良幼涉書史長于吏治尤善騎射王檀聞其聲辟爲保義軍節度推官楊師厚鎮鄴署元氏令徙魏州都督府司錄參軍後唐莊宗入鄴召見與語以季良有文武才略卽授大理評事依舊司錄參軍充

義勝都指揮使軍中謀議多以諮之時兵革屢興屬邑租賦
逋久一日莊宗召至切責之季良對曰殿下何時當平河南
莊宗正色曰爾掌輿賦而稽緩安問我勝負乎季良曰殿下
方謀攻守復務急徵一旦衆心有變恐河南非殿下所有莊
宗斂容前席曰微君之言我幾失大計自是益加禮遇遷興
唐府少尹司錄參軍如故嘗夢手扶御座自謂輔佐之象繇
是頗述天時人事以諷莊宗深納其言及卽位授光祿少卿
兼洛南水陸營田都制置使明宗卽位遷太僕卿會宰相任
圜兼鹽鐵事薦季良爲判官明年授檢校戶部尙書爲西川
官告使兼三川都轉運制置使知祥素重其名一見遂悅奏
留爲節度副使累表不許會李嚴來爲監軍知祥深懷疑慮

乃誅嚴而署季良爲副使天成三年明宗下詔徙季良爲果
州團練使知祥匿其詔書密上表留之明宗不能奪遂允其
請自是傾心接待情好款洽或入謁稍晚知祥必顧左右曰
副使來何遲也及至則讌語竟日每有謀議無不見從時朝
廷以夏魯奇李仁矩分鎮遂闡季良言于知祥曰朝廷增兵
二鎮張犄角之勢將有不測之變也公處親賢之地以忠信
見疑倘失先機則禍不旋踵矣知祥曰計將安出季良曰我
甲兵雖衆然而勢孤易動請與東川董璋合從先平遂闡則
朝廷兵至我無內顧之憂矣知祥從之及王師入劍門而遂
闡已平果無功而還及捷書至知祥匿之謂季良曰北軍漸
邇奈何季良徐曰北軍至綿州已來必遁知祥問其故對曰

縣師千里饋運不繼彼勞我逸不走何待知祥大笑以捷書示之及克黔夔二州以季良爲武泰軍節度使董璋率衆入廣漢知祥領兵拒之季良留守成都制置經度軍用無闕先是季良嘗與知祥從容語及璋植性狼戾下多怨憤若堅守一城攻之難克矣及間璋起兵知祥憂形于色季良曰璋不守巢穴自來送死此天以璋授公也俄而璋果敗加檢校太保明宗崩知祥建號加特進守司空平章事宏文館大學士判三司昶襲位加守司徒領山南節度使行興元尹廣政九年卒年六十四諡文肅季良性寬厚居常無喜愠之色母早亡事從母如所生季札季友皆從弟也並致位清顯所上遺表言不及私蜀人驢之

趙庭隱

庭隱太原人世爲卿家庭隱少知兵律尙氣義始事梁祖子友亮因擊鞠墜馬而死庭隱董璋等十數人皆追赴汴州知其無過竟釋不問令給事左右末帝卽位唐莊宗入鄴兩河對壘十有餘年時庭隱爲邢州都監累立戰功節度使劉重霸嫉之誣庭隱將所部兵降于莊宗因械送汴州末帝知其非罪又重違邊臣之請乃貶庭隱于南陽未幾追復舊職王彥章守中都庭隱在其軍中及彥章敗庭隱爲莊宗所獲將以就戮大將夏魯奇奏曰此桎也其材可用遂釋之魏王繼岌討西川以庭隱爲先鋒監押自入敵境卽禁兵士燒廬舍剽財物蜀人德之魏王平成都錄其功奏授左廂馬步軍都

指揮使知祥入蜀康延孝陷漢州遣庭隱率兵擊破之擒延孝檻送闕下知祥奏加檢校司空漢州刺史因留屯成都長興初明宗將議伐蜀乃以夏魯奇李仁矩分鎮遂闡以分其勢知祥令庭隱與李仁罕張業率步騎十萬經略遂闡魯奇堅壁不出戰會唐師入劍門知祥急召庭隱令統銳兵五千至東川與董璋合軍以拒之至中路大寒士卒不能前庭隱撫諭勞問將士皆奮遂營于普安深溝固柵以養銳一日唐師奄至又分兵斷三亞父水及土橋庭隱密遣軍中善射者五百人伏唐師之歸路乃領軍出營久而不戰至暮唐師退庭隱縱兵追之伏卒齊起表裏合擊唐師大敗初唐師之入劍門也內有堅壁外有勍敵遠近震駭及庭隱之捷人心乃

安知祥遣使慰勞賜書以褒之明年別將平魯奇唐師至葭萌而還庭隱班師知祥親勞于郊翌日至其第賜資甚厚卽授昭武軍節度使留後以鎮遏葭萌知祥送于北郊親舉觴以勸之在鎮踰月上言三泉餘寇盡去乞假一旅之師以拓漢中及秦鳳之地知祥答書慰勉且令休息董璋襲廣漢將攻成都時東川廩藏充實部下多敢死之士其來也衆皆畏之知祥親督諸將召庭隱爲副以率勵士旅璋遺書庭隱而詐達于知祥以書授庭隱投書褚中曰此必反間之辭不足觀也族擒董璋而後閱之與璋戰雞蹤橋前頗爲所挫庭隱僞遁璋逐之知祥與公鐸領兵繼進璋軍亂不成列庭隱復整陣與知祥公鐸合擊之璋軍大敗斬首數千級璋領數騎

遁歸東川爲部下所殺庭隱追至東川頓兵城下以待知祥
梓州平以庭隱爲節度使會李仁罕自遂州至求領東川庭
隱將讓之知祥以庭隱功多且怒仁罕之貪愎遂自領兩川
節度使以庭隱爲保寧軍節度使以閬果蓬渠開五州隸之
昶襲位李仁罕求總六軍將圖非望以庭隱爲六軍副使以
制之未幾仁罕誅改衛聖諸軍指揮使明年移鎮東川廣政
初加中書令庭隱久居大鎮積金帛鉅萬窮極奢侈不爲制
限營構臺榭役徒日數千計十年被病懇讓兵柄疏再上從
之仍就第冊爲宋王經歲不能起賜肩輿入朝旣謁見昶感
動涕泣賜金沃盥及繒錦加太師卒年六十六子崇祚崇韜

趙崇韜

崇韜少驍勇有父風累從征討有功署副兵馬使及庭隱卒
昶以崇韜領衛聖諸軍使以襲父任廣政十八年周師復至
境上昶以崇韜與控鶴指揮使袁可鈞同爲北面招討崇韜
率勵將士行陣整肅士卒有點其額爲斧形者號曰破柴周
師前鋒屢爲崇韜所破至歸安而退二十七年王師來伐崇
韜與李廷珪等率兵拒之遇王師于漢源崇韜策馬先登我
師大敗崇韜力戰不止兵器皆斷折猶手擊殺數人爲王師
所擒

卷一萬八千一百
三十六第十一頁

張業

業開封浚儀人性沈厚有果斷事梁爲東頭供奉官時兩河

兵革未息業頻領監護之任皆立戰功法令峻整士卒畏之
莊宗入洛聞業有幹略擢爲列校繼炭伐蜀以業監先鋒兵
補右廂馬步軍都指揮使蜀平以所步兵駐成都知祥入蜀
奏授檢校司空簡州刺史時蜀漢賊盜羣起燒劫鎮戍百姓
驚擾知祥遣業率兵捕之業令五家爲小保五十家爲大保
旬日之內擒獲殆盡討夏魯奇于遂州以功授寧江軍節度
使兵馬留後董璋襲成都業在夔州聞之率所部赴難東川
平正授節鉞加檢校太傅明德初領右匡聖步軍都指揮使
會武定興元兩鎮來附令業將兵二萬屯漢水業至褒梁分
布寨柵控扼駱谷秦鳳諸隘會武定軍衙將與蒲谷鎮將任
漢謙同謀導晉師入武定業遣戍卒擊走之昶襲位改信武

軍節度使同平章事是歲昶殺判六軍事李仁罕業仁罕之甥也昶慮其爲變詔歸本道未幾召入依舊同平章事兼判度支新收征稅多爲主吏乾沒業作盜稅法犯者十倍征之吏民不堪其命業多視事私第中宰相之門被桎梏者常滿昶知之遽除十倍之法業子繼昭好擊劍嘗與淨衆寺僧歸信同訪劍術士左匡聖指揮使孫漢韶與業不協告業與繼韶同謀不軌翌日令壯士就都堂擊殺之年五十七

卷一萬八千一

百三十六
第十一頁

武漳

漳字巨川太原文水人父玉汾州別駕漳少勇敢善騎射事莊宗爲定塞都虞候莊宗以全軍援澤潞漳與裨將數攻其

別寨斬首千餘級擢太原衙前兵馬使改匡聖軍指揮使同
光初從魏王繼岌入蜀因留成都知祥鎮蜀補衙內右第二
指揮使天成初璋與張公鐸迎瓊華公主于北都中國兵革
之後盜賊充斥漳披堅執銳通夕不寐至蜀改左第二指揮
使奏授檢校僕射其後東討果閬北拓劍利漳屢有功授縣
州刺史知祥開國攻邛州遷山南節度使漳以褒中用武之
地營田爲急務乃鑿大洫以導泉源溉田數千頃人受其利
入爲奉鑾肅衛指揮使未幾改山南加同平章事廣政七年
卒于治所年六十四漳質厚儉約所至有治迹俸入之外不
營貲財蜀人稱之

卷一萬八千一百
三十六第十一頁

李肇

肇汝陰人父璋唐神策兵馬使肇少以材勇從父征伐後隸宣武軍補左建牙都頭累轉陝虢馬步軍都指揮使莊宗平梁恢復河洛割宣武一軍隸于河東時知祥爲北京留守待之甚厚同光中以所部兵從魏王繼岌討蜀蜀平班師康延孝至普安叛擁衆回據廣漢肇在其伍中延孝敗肇被俘而知祥親釋其縛權爲內衙都指揮使未幾奏授嘉州刺史長興初我師圍魯奇于遂州唐師來援劍門不守肇領兵赴普安以拒唐師不得進以功改漢州刺史駐軍縣谷明年董璋率兵攻成都軍勢甚盛遣使致書于肇諭以禍福肇素不知書擲之于地曰此不過勸我叛爾因并其使殺之梓州平加昭武軍節度使昶襲位肇以足疾不卽時來朝昶怒罷其軍

權授太子少傅致仕于邛州安置坎壈不得意廣政八年卒

年七十

卷一萬八千一百三十六第十三頁

李仁罕

仁罕字德美陳留人少隸宣武軍爲小校容貌瓌偉梁祖爲四鎮節度署爲衙內昭宗幸鳳翔梁祖遣仁罕奔問行在因修貢禮梁祖革命補宮苑儀鸞等使歷許蔡華三州馬步軍都指揮使莊宗伐蜀令監先鋒軍知祥領鎮奏授馬步軍都指揮使康延孝叛知祥命仁罕討平之以功授彭州刺史遷蜀州夏魯奇鎮遂州稟朝廷之命繕治兵甲將圖蜀知祥與董璋謀先討魯奇令仁罕攻遂州拔之以仁罕爲兵馬留後未幾承制授武信軍節度使又以所部兵定三峽走夔將安

崇阮知祥卒遺命仁罕輔政昶嗣位令判六軍事仁罕奉幼主無隱情自以先朝舊老遇事必諫時控鶴指揮使張公鐸內醫韓繼勳豐德庫使韓保貞弓箭庫使安思謙等皆昶在東府時舊所親狎素不爲仁罕所禮皆懷怨怒每譖仁罕欲納王衍妃徐氏爲側室遂誣以姦昶大怒俟仁罕入謁令武士擊殺之年六十二

卷一萬八千一百三十六第十四頁

李延厚

延厚洺州平恩人父及唐邢州別駕延厚少有胆略善騎射從父琮爲洺州節度使率衆歸于梁祖延厚亦從焉梁補左拱辰指揮第二都頭後唐同光中以所部兵從魏王入蜀改馬軍右驍銳第一指揮使康延孝入漢州知祥遣延厚率精

兵二千會李仁罕往討之將行延厚集將卒于營中誓之曰
今出師征討不三旬必破賊乃立功圖賞之日也士卒有誓
報國恩不以家爲慮者立東廂衰疾怯懦厭爲征行者立西
廂無自苦也得請行者七百人逐延孝西寨斬首百餘級竟
拔其城以功奏授檢校右散騎常侍改右廂馬軍都指揮使
歷陵果州刺史源州押衙文景琛叛延厚討平之岐軍逼文
州延厚率衆赴援卽日解其圍昶襲位遷雅州刺史永平軍
節度使未幾移鎮昭武軍廣政九年卒年六十一

卷一萬八
千一百三

十六第
十四頁

張公鐸

公鐸太原樂平人父頊唐儀州兵馬使公鐸身長七尺侖儻

有節義好文史之學知祥爲北京留守錄爲親從及出鎮成都補爲牙校從高敬柔迎公主于晉陽轉義勝定遠都知兵馬使董璋舉兵襲我廣漢先鋒兵將至成都公鐸率諸軍從知祥逆戰于雞蹤橋我師不利公鐸率所部兵力戰直衝其腹璋兵大敗梓州平以功授簡州刺史遷捧聖控鶴都指揮使知祥病公鐸與趙季良趙庭隱李肇等同受遺命輔政祖襲位授保寧軍節度使爲政嚴猛寮吏畏憚時承前蜀之弊獄訟繁多案牘堆積公鐸量其所犯隨意裁決無不稱當在任六年民被其惠先是屬邑連歲多逋租公鐸詰其由乃豪民猾胥乾沒賦稅時令佐已有授代者公鐸悉勒止之令盡徵其租而後解由是不數月征錢糧數萬貫斛時論以爲嚴

而不殘遷寧江軍節度使公鐸馭下嚴正宿衛二十餘年宮
禁寧謐初染心疾祖憂之爲玉局洞開靈寶壇親署青詞以
醺焉廣政八年卒年六十二

卷一萬八千一百
三十六第十五頁

張虔釗

虔釗遼州榆社人父簡唐檢校尚書左僕射虔釗少以武勇
事唐武皇莊宗之世累補左右突騎軍使莊宗嘗以偏師取
鎮陽命虔釗率騎乘爲前鋒屢挫賊銳遂陷其城明宗卽位
以虔釗有將帥才擢爲隨駕親軍都指揮使歷遼春二州刺
史天成中鎮定節度王都阻兵連結契丹爲邊患命虔釗爲
北面行營兵馬都監進討契丹殺傷甚衆虜不敢南下遂圍
定州百日而城陷斬王都降其餘衆師還以功遷橫海軍節

度使未幾移鎮山南兼西面諸州馬步軍都部署應順初閔帝卽位以鳳翔節度使潞王從珂有異志發兵討之詔虔釗爲犄角師次岐陽人心離散降于從珂虔釗憤之乃退歸南鄭率孫漢韶以山南之地納款于蜀知祥遇之甚厚委以節鉞祖襲位加中書令歷左右匡聖馬步軍都指揮使出爲昭武軍節度使及漢祖卽位乃移鎮梁州以觀朝廷之變會晉昌軍節度使趙匡贊鳳翔節度使侯益俱謀歸蜀遂以虔釗爲北面行營招討使應接經略俄而趙匡贊侯益請祖出師掠定三秦因命虔釗與韓保貞等總師五萬出散關雄武軍節度使何重建出隴右奉鑾肅衛都虞候李廷珪出子午谷會于雍州廷珪始出子午谷聞匡贊爲王景崇所逼棄城自

拔東去遂先退師時虔釗福誠保貞師次陳倉謀不相協而
侯益聞匡贊已去廷珪班師亦誠款中變閉壘不出司天監
趙延樞累以雲氣候不利諷于保貞保貞惑之乃與福誠率
所部取隴州道會重建歸蜀虔釗留寶雞以勢孤不得深入
遂班師士卒夜發部伍不整至興州自以功業不成感憤而
卒年六十六

卷一萬八千一百
三十六第
十五頁

潘仁嗣

仁嗣浮陽東光人父廷訓密州都指揮使仁嗣少倜儻尚氣
起家爲保義軍兵馬使後唐魏王繼岌西伐仁嗣以所部兵
從入蜀蜀平改左右廂馬步軍都指揮使知祥受節鉞留在
麾下康延孝襲漠州知祥遣仁嗣率兵救之連破數寨遂屯

于漢州董璋與兵趨成都城外皆爲敵境仁嗣以所部兵陣于赤水璋以全軍二萬擊之仁嗣大敗以十數騎潰圍而出身被十餘創卧于血中及璋敗獲免知祥親至其第以藥傅之明德二年奏授武定軍節度使源壁等州觀察營田處置等使之任卒于成都年四十六

卷一萬八千一百三十六第十六頁

龐福誠

福誠河東太谷人少善騎射倜儻交結豪俠傾竭家產中原兵亂福誠聚徒鄉里剽掠縣鎮知祥爲北都留守署昭爲太谷主簿令招諭福誠因相率歸附從知祥入蜀補衙內指揮使王師陷劍門從趙庭隱率兵據石橋福誠夜領兵數百人循水次東北上山攻王師夾其腹背王師不虞其至舉軍驚

擾因奮擊破之以功遷茂州刺史知祥建國加檢校右散騎
常侍昶襲位歷資絲叩三州刺史奉鑾肅衛馬步軍都指揮
使會張虔釗經略秦中以福誠爲行營馬步軍都虞候克寶
雞分兵吳山進攻隴州以功改左驍騎軍都指揮使武寧軍
節度使廣政十五年授衛上將軍以目疾罷卒年七十一

一卷

萬八千一百三十
十六第十六頁

李彥琦

彥琦字子溫京兆長安人本姓楊氏祖父皆隸神策軍彥琦
善騎射有權略唐中和初鳳翔李茂貞委以心腹之任易姓
李氏齒于諸子後昭宗西幸梁祖迎駕攻逼岐下者累年及
昭宗東遷長圍方解大軍之後府庫空竭彥琦請使甘州以

通回鶻往復二載美玉名馬相繼而至所獲萬計茂貞賴之
劉知俊自靈武班師途經長城嶺梁將率精銳數萬躡其後
彥琦與俊同設方略擊敗之潞王之守岐下也諸道將急攻
其壘彥琦時在圍中罄家財以給軍用潞王篡位以功授檢
校太傅知河南軍府事俄授鎮川兵馬留後晉祖入洛彥琦
罷職西歸家財素厚乃閉關自奉游心釋氏專務散施廣政
十年王景崇納款于蜀彥琦因歸成都授左將軍維州刺史
卒年八十八

卷一萬八千一百
三十七第二頁

孫欽

欽幽州安次人性忠烈善騎射少遇亂隸安義軍節度使充
衙內都頭後改補合州衙內都頭兼土客都虞候徙本州刺

史徐章入蜀會知祥鎮成都長興初轉充右截山都頭董璋來寇戰雞蹤橋有功遷普州刺史昶襲位累遷東川武德軍左捧聖都指揮使廣政十五年令以所部兵北征欽將行白于都監王承丕承丕將謀亂欲害判軍府事郭延鈞曰詰朝當領部卒二千人介冑閱于雄義營欲與府公觀之欽未知其由從容謂承丕曰卒閱習舊皆木刀竹槍今都監令執帶器甲將士臨行又是詔旨或有不虞如何承丕遂止又明日欽已具行裝入辭承丕承丕止之同詣府中謁延鈞及延鈞送承丕上馬承丕頤指數卒擊殺延鈞自稱準詔處置軍府事卽據府廳指揮放諸司罪人分遣將校領兵屯果聞綿劍州拒守劍門關發帑廩以賞將士自辰至巳亡命之徒應募

而至者千餘人明日大會將校寮屬欽言于衆中曰郭延鈞
既抵朝憲遠近未知其由公受命權總留務願出詔書以示
軍府承丕曰作好官何問詔書欽知其已叛乃紿之曰州城
內外人情未安願爲公督部下兵以伺察之因躍馬而出承
不連呼不止馳至本軍立召將士告其事遂率衆徑趨府中
承丕左右皆奔散因擒斬之傳首成都加檢校太子賓客二
十五年寢疾卒年七十二

卷一萬八千一百
三十七第一頁

何重建

重建其先回紇之別部居雲朔間祖允慶父懷福從後唐武
皇世著勲闕因家于太原重建初事晉祖爲奉德馬軍都指
揮使歷驩睦曹三州刺史檢校司徒會延州節度使丁審琪

殘暴貪冒蕃部苦之重建以所部兵攻其城審琪遁去晉祖
卽以重建權節度兵馬留後下車諭以威福邊民安堵就加
彰武軍節度使累遷涇鄧貝澶孟五鎮節度使皆以廉儉簡
易稱未幾移鎮秦州廣政十年契丹犯中原虜使賫僞詔至
重建不勝其憤謂將吏曰吾事石氏二主八擁旄節人臣之
榮已極矣豈能交臂以事戎狄乃斬其使以秦成階三州歸
款于我祖遣右千牛衛上將軍李繼勳馳往慰諭賜予甚厚
加特進同平章事依前雄武軍節度使時固鎮與鳳州未平
重建悉經略討平之祖大舉兵北伐遣張虔釗出大散關以
重建爲招討使由隴州路以進師無功而還堅請入覲祖不
許二十一年加兼侍中卒年六十九

孫漢韶

漢韶太原人祖昉唐嵐州刺史父存進振武節度使漢韶幼有器局風儀峻整存進甚愛之起家安定軍使知祥留守晉陽屬蕃渾侵擾邊郡表令漢韶督軍進討莊宗知其可用遂委以戎律大破虜寇擒獲甚衆以功授檢校右僕射蔡州刺史明宗卽位遷彰國軍節度使觀察留後累遷昭武武定等軍節度使閔帝嗣位加特進漢韶以其父名上表讓之改檢校左僕射制曰改會稽之字抑有前聞換瓊寶之文非無故事及潞王入洛遂與張虔釗等奉表歸附及謁見與知祥敘汾上舊事及洛中更變相對感泣知祥曰豐沛故人相遇于此何樂如之于是賜第宅金帛供帳什物悉官給之授永平

軍節度使昶襲位加同平章事明德三年入爲匡聖馬步軍都指揮使廣政十年爲山南節度使會何重建以秦階成三州歸附鳳州石奉頤堅守不通我使昶遣漢韶入城宣慰號令嚴肅秋毫無犯駐數日乃還加檢校太師雄武軍節度使後以疾乞解兵柄封樂安郡王賜肩舁入謁卒年七十二漢韶忠勇有父風而重厚過之居藩閫皆有治迹始以去危卽安委質于我頗竭股肱之力終保富貴識者多其淳慤

卷一
萬八

千一百三十
六第十二頁

高彥儔

彥儔太原人少善騎射慷慨有大節知祥留守太原召爲軍校從入成都授親衛指揮使昶襲位遷茂州刺史廣政十年

秦州何重建以城降以彥儔領雄武軍節度使領衆守其城
未幾召歸領右衛聖馬步軍都指揮使十八年周師攻秦鳳
以彥儔爲北路行營招討使與李廷珪呂彥珂率兵赴援與
周師遇于唐倉大戰我師敗績彥儔追保青泥嶺周師遂克
階成秦鳳等州彥儔歸成都祖釋不問改寧江軍節度使二
十七年王師來伐分兵由峽路攻夔州彥儔謂副使趙崇濟
監軍武守謙曰北軍涉險遠來利在速戰宜堅壁待之守謙
曰寇據吾城下而不擊將何待也乃獨領麾下千餘人以出
時王師頓白帝廟西遣騎將張廷翰引兵與守謙戰我師敗
走廷翰乘勝登城彥儔整衆將出拒戰王師已乘而入彥儔
力戰于城下不勝身中十餘槍左右皆散去彥儔奔入府中

反拒其門判官羅濟勸彥儔單騎歸蜀彥儔曰我昔已失天水今復不能守夔州縱不忍殺我何面目見蜀人乎濟又勸其降彥儔曰老幼百口俱在成都以一人偷生舉族何負今日止有死爾卽解符印授濟曰君自爲計俄而王師壞門彥儔挺劍拒之殺十餘人于是登樓縱火自焚而死大將劉光乂憐其忠蓋收其骨以葬焉

卷一萬八千一百三十六第十二頁

李廷珪

廷珪太原人幼慧黠七歲隸知祥帳下爲給使從入蜀爲牙軍指揮使征康延孝有功遷陵州刺史知祥征東川廷珪權領親軍以從董璋平轉資州刺史累改眉蜀二州昶襲位遷捧聖控鶴都指揮使領興元節度使歷雅遂閬三鎮加兼侍

中廣政十八年周師攻秦鳳以廷珪爲北路行營都統高彥儔呂彥珂爲招討廷珪遣先鋒指揮使李進以兵據馬嶺分兵出斜谷營于白澗將腹背以攻周師又遣染院使王巒領兵出唐倉與周師遇我師敗走王巒死之而馬嶺斜谷之兵聞之皆退奔高彥儔與諸將謀退守青泥嶺由是秦鳳階成之地皆陷于周矣廷珪上表請罪和釋不問明年來朝遷左右衛聖諸軍馬步軍都指揮使仍分衛聖匡聖步騎爲左右十軍以武寧軍節度使呂彥珂爲之使並隸于廷珪二十八年王師拔劍門加廷珪太子太傅令從元喆統兵以拒王師至緜州聞王昭遠趙崇韜之師皆敗元喆懼退保東川翌日奔歸成都所過盡焚其儲蓄及王師入成都行營都監王仁

贍按籍詰所在軍資將歸罪于廷珪廷珪問計于部將康延澤曰吾觀王公志在聲色苟足其欲則置而不問矣廷珪素儉約不蓄妓樂遂求于姻戚家得女妓四人復假貸金帛直數百萬以遺仁贍繇是獲免歸朝爲右千牛衛上將軍卒

萬人千一百三十六第十三頁

王彥銖

彥銖太原人祖義方汾州長史父德誠贈太子少保彥銖性仁弱不好弄讀書究大義天祐中事知祥于太原後入蜀果補節度押衙詔使李嚴之爲監軍也密懷異謀知祥數其過命彥銖擒斬之嚴之左右無敢動者知祥破董璋擇腹心有權略者俾護其軍于是以彥銖爲東川監押及建國轉授右

僕射祖襲位歷蓬嘉雅三州刺史出爲山南兵馬都監數歲
罷歸補左右羅城使眉州刺史遷昭武軍節度使轉右衛聖
馬軍都指揮使罷歸改左金吾衛上將軍復授昭武軍節度
使廣政二十四年卒于治所年六十五

卷一萬八千一百
三十六第十六頁

李奉虔

奉虔太原人本姓王氏祖欽唐隰州刺史父存賢佐唐武皇
累著功因賜姓李氏梁人攻上黨莊宗親總大軍以援之存
賢先登陷敵授盧龍軍節度使奉虔幼有才略不循小節年
十四爲幽州衙內都指揮使居父喪骨立數歲及知祥鎮蜀
奉虔懇請從行補廳直左押衙明宗卽位充貢奉使諸將進
攻遂寧王師掩至劍門不守知祥命趙庭隱督兵往拒之署

奉虔爲兵馬監押時衆寡不敵人心搖動奉虔與庭隱率勵士卒竟敗王師以功授檢校右僕射昶襲位領嘉州刺史文思使遷右金吾衛大將軍爲昭武軍都監屬夏秋多雨嘉陵江溢出城奉虔置堰開湍瀨二十餘處洩其蓄水築堤以護之城池克完人被其利授昭武軍節度自監護擁節旄自奉虔始人皆榮之入爲左右街功德使卒年六十三

卷一萬八千一百三

十六第
十六頁

王昭遠

昭遠成都人幼孤貧年十三依東都僧智諲爲童子知祥入蜀飯僧于府署昭遠持巾履從智諲得入時昶方就學見昭遠聰慧留給事昶左右昶嗣位以爲捲簾使遷諸司使會樞

密使王處回得罪乃以昭遠爲通奏使知樞密事機務一以委之府庫財帛恣其所取不問未幾遷山南節度使判官張廷偉言于昭遠曰公素無勲業一旦位至樞近不自建大功何以塞時論莫若遣人致書通好并汾令其發兵南下我卽自黃花子午谷出兵應之使中原表裏受敵可坐有關右之地則君之功無有出其右者昭遠然之乃言于昶遣人間行賁蠟書以往太原爲疆吏所獲及王師來伐昶令昭遠與韓保貞趙崇韜等領兵以抗王師昭遠好讀兵書頗以將略自任始發成都昶遣宰相李昊等餞于郊外昭遠酒酣攘臂而言曰是行也非止克敵當以此數萬彫面惡少取中原如反掌爾及行執鐵如意指揮軍事自方諸葛亮時王師已破劍

門昭遠大懼俄與王師遇于漢源趙崇韜布陣將戰昭遠據胡床不能起崇韜敗乃免胄棄甲走投東川爲追騎所獲送闕下授左領軍大將軍開寶中卒

卷一萬八千一百三十六第十七頁

安思謙

思謙并州人幼事知祥于太原以勤恪聞知祥入蜀補爲軍校昶襲位頗見親信歷簡叩彭三州刺史奉鑾控鶴馬步軍都指揮使武泰軍節度使未之任改左匡聖馬步軍都指揮使山南節度時鳳翔監軍王景崇以城歸順命思謙率兵應接且略地關中會漢兵圍鳳翔燒其雙門景崇遣使來求救昶遣思謙及韓保貞等率兵救之兵次右界漢兵屯寶雞城思謙令保貞分兵趨隴州逼汧陽以分其勢又遣先鋒將申

貴等分兵走模壁設伏時家林貴以數百人晨壓寶雞列陣以誘漢兵漢兵爭出戰貴僞遁漢兵逐之爲伏卒所擊退入寶雞城思謙次渭水將引軍濟會羅暉保義軍與東相應掩我不備多殺士卒而漢兵復振思謙與諸將議曰糧儲將盡而賊勢且盛不如釋之以圖後舉遂班師十二月景崇又來告急昶復督思謙令進兵思謙請先運糧四十萬斛然後進軍昶覽表不悅謂左右曰古之良將因敵取資近者契丹以數十萬衆入中原豈先事飛輓耶揣思謙此意必不爲朕進取也乃發興州乾渠渡糧食及山南諸倉米數萬斛屯鳳州以益之思謙不得已遂進軍次大散關申貴以所部先進擊漢兵燒箭筈寨毀閣道遁去貴盡銳追之及安都思謙進軍

玉女潭又殺漢兵千人漢兵退屯寶雞城思謙駐軍模壁時
保貞之師攻隴州不能下思謙遂遷延不進會漢軍陷鳳翔
景崇死乃班師上表待罪昶釋不問召歸移鎮閬州仍留宿
衛思謙以受任無狀爲物議所薄頗不自安昶旣誅張業宮
禁門衛悉加嚴警思謙以其疑已頗惡之言多悖三子屢嗣
裔恃父權恣橫國人畏之會翰林王藻乘間奏思謙出怨言
將圖不軌昶懼翌日俟其入朝伏壯士擊殺之并其三子廣
政十七年也

卷一萬八千一百
三十六第十七頁

焦彥賓

彥賓字英服滄州清池人父軫唐兗海節度彥賓少聰敏多
智略事後唐武皇尤所委信及莊宗卽位遷左監門衛將軍

充四方館使出護邢州軍知祥移鎮成都詔以彥賓爲監軍使與知祥同入蜀康延孝據廣漢彥賓說知祥令召董璋與之協力討賊遂擒延孝明宗卽位忿閹豎輩怙勢擅權先朝使四方及逃遁不出者皆就戮之死者殆盡彥賓爲知祥保護獲免朝廷因以李嚴代之彥賓辭疾不歸朝知祥因令判都提學院事未幾轉左驍衛上將軍以年老乞代從之彥賓乃營別墅鑿池沼植蒲葦養魚以自給昶襲位以先君舊友命全給俸祿而不令覲謁俾遂其性廣政十五年卒年七十

八

卷一萬八千一百三十六第十八頁

趙進

進定州人少以膽勇隸天雄軍籍時河北宿兵進累戰有功

泊莊宗入洛猶在行間屯于清廩祿旣薄又不時給士卒多
怨憤思亂者十七同光未與本軍皇甫暉等共推副趙在禮
相率夜犯鄴城城中士卒莫有鬪志進等因陷其城未踰旬
兵數萬在禮署進衙內都虞候三城巡檢使莊宗遣元行欽
以其言聞因詔明宗馳往招諭及入城乃共推戴遽有洛中
之變天成初除貝州刺史鄴都衙內指揮使明年移典寧州
屬慶州叛遣進討平之遷雅州刺史知祥入蜀進來覲謁知
祥以進始謀叛逆將誅之進大懼趙季良諫曰莊宗季年天
下思亂匪獨貝魏一境公國之懿親所宜責以干紀加其顯
戮進自知必死歸命于公所宜撫納以責其後效知祥納之
董璋之亂我師致討進戎服謁見而言曰進荷明公不殺之

恩今日有所報矣請前蹈白刃決命破賊乃署爲前鋒監陣
使先登立功璋平轉左衝山指揮使昶襲位歷忠鳳卬普四
州刺史右匡聖步軍都指揮使所至軍政修舉戍卒有疾苦
者必撫問周悉當盛暑沍寒未嘗勞役將士以此樂爲之用
廣政十七年督部兵戍漢中逾月以疾聞召還卒于道年六
十一

卷一萬八千一百
三十六第十八頁

石處溫

處溫萬州人本波斯之種仕前蜀爲利州司馬同光中知祥
入蜀補萬州管內諸壇點檢指揮使率義兵同收峽路時通
州大將王允瓊侵擾邊鄙及草寇杜景溫劫東鄉豪殺縣令
牟孟剽略戶口焚燒村落處溫與諸軍討平之知祥遺書褒

美轉寧江軍節度都知兵馬使萬州管内義軍都指揮使昶
襲位遷獎州刺史處溫初據石市招納亡命遠近多歸之由
是廣事耕墾常積穀數十萬石前後累獻軍糧二十餘萬石
加之以寶貨昶嘉之加檢校司空未幾授萬州刺史移簡州
卒年八十

卷一萬八千一百
三十六第十九頁

孟思恭

思恭字近禮潁川人父彥暉嘗爲許州獄吏前蜀王建嘗隸
忠武軍坐事被繫謂彥暉曰卿能免我他日將厚報彥暉遂
縱之令亡去及建霸蜀遣使迎之授簡州刺史遷漢州團練
使思恭弱冠奇峭猿臂善射起家保信軍使建嘗集文武射
苑中思恭屢中的建大悅賜衣服以其女妻之爲駙馬都尉

累遷靜塞軍團練使王衍襲位爲北路行營都指揮使知祥
鎮蜀以其宗姓補先登指揮使以所部兵從董璋遣思恭分
兵討集州誠之曰賊少則與戰賊衆則退守要害我將濟師
反遇賊思恭與之戰不利退求濟師璋怒放思恭歸知祥免
之明年隨趙庭隱破璋于雞蹤橋以功改清遠指揮使和襲
位加檢校司空改雄義都指揮使屯梓州累遷飛棹都指揮
使歷劍階忠三州刺史思恭有胆略善撫士卒廣政二十年
爲峽路行營都指揮使屯赤英山時秋暑未退思恭苦熱食
冷物浴寒水致疾卒于任年七十二

卷一萬八千一百
三十六第十九頁

申貴

貴潞州人弱冠有勇力初事李彥琦爲帳下卒天成中歸于

知祥累補定遠都頭從征伐身當矢石深爲諸將之所推許
改決勝耀武指揮使昶襲位遷右衛聖都指揮使歷昌渝文
眉四州刺史貴貪鄙殘虐所在聚斂貨財民不勝其弊典眉
州受財鬻獄尤恣暴橫常指獄門謂左右曰此我家錢爐其
不道如此初兼五縣巡檢令其子元寶與州吏許延祺誣構
民連賊枷禁以求賂被訴下獄責授貴維州司戶參軍馳驛
發遣至率浦賜自盡

卷一萬八千一百
三十六第十九頁

九國志卷八

東漢

世祖以乾祐四年稱帝至英武帝廣運六年國凡歷四主凡三十九年按十國紀年及通鑑作北漢此

與五代史同

世家

世祖

姓劉名閔初名崇後漢高祖母弟也爲河東節度使乾祐三年遷帝遇弒郭威篡漢四年正月

戊寅卽位于晉陽仍用乾祐年號受契丹冊命在位四年薨年六十廟號世祖

睿宗

名鈞初名承鈞閔次子受契丹冊命仍稱乾祐七年行三年喪服除改乾祐十年爲天會元年

至十二年七月戊申薨年四十三謚曰孝和皇帝廟號睿宗

少主

名繼思本姓薛鈞養爲子嗣位六十餘日爲郭無爲所弒

英武帝

名繼元本姓何亦鈞養子既襲位仍稱天會十二年越五年改元廣運至六年五月癸未

降于宋降封彭城郡公淳化中薨追封彭城郡王

列傳

蔚進 張元徽 鄭進 衛儔 李隱

蔚進

進太原人少有膂力身長七尺日行二百餘里高祖鎮并汾進以材官給事及高祖領軍令負羈勒開運末南行留進于太原爲崇翊衛卽受馬步軍指揮使鈞襲位領建寧軍節度使典親軍如故繼恩監國郭無爲受詔輔導世子無爲與進不協出爲代州刺史時無爲專政繼恩潛欲圖之進知其必爲亂自以居親衛之地頗懷危蹙及有中山之命忻然卽路未幾繼恩遇弑國人皆以進爲先見以城納款歸朝授左衛大將軍領檀州刺史卒年七十二進無他能惟掌兵方嚴所

至不敗事劉氏四主以質直聞歸老中國祿二千石亦武夫

之終吉也

卷一萬八千一百三十七第二頁

張元徽

元徽邢州武安人少以沈勇隸本城爲兵累轉至列校高祖鎮并汾召置帳下累從征討有功晉開運末破契丹于三交以功授代州刺史歷雲州防禦使遷代州與崇素相友善及崇建號領侍衛親軍遷武寧軍節度使崇舉兵南下將圖周室以元徽爲前鋒與周師遇于巴公原元徽以東軍先登陷陣擒監軍使一人降其步卒千人而還崇大褒賞之元徽乘勝復入馬倒爲周師所擒殺之其麾下十餘騎畢力血戰奪其尸而出俄而崇衆亦敗先是前鋒兵將次巴公一夕營中

刁斗皆噀元徽亟遣詣崇大寨易之凡易數十皆噀而不可
擊因以白崇怒曰故要吾金鉏耶遂止是夜有大星墜元徽
營中明日果敗元徽沈厚有將帥材善撫士卒輕財好施雖
爵祿豐厚而家無餘貲既而軍吏爲立廟晉陽城西北隅塑
其象歲時祀之見者必掩泣

卷一 萬八千一百
十七 第二頁

鄭進

進開封陽武人身長七尺餘驍勇多力漢祖鎮并汾以材官
給事累從征討有功卽位遷侍衛步軍都指揮使鈞龔位以
先朝勲舊賜予彌厚進性慷慨重然諾好施家無餘貲繼元
立馬峯典機密性鄙吝與進不協峯怒悉奪其兵柄進不堪
屏詬之于朝繼元怒翌日送定襄安置遣人殺之于路

卷一
萬八

衛 儔

儔吐渾族人少事鈞爲蕃落小底善騎射驍果絕倫明書計
通六蕃語鈞襲位遷如京使令專掌吐渾一軍以從征討所
向多克捷虜援兵每至卽遣儔居前鋒軍中凡布列烽燧措
置寨柵皆儔爲之繼元立爲闡人衛德貴所嫉出爲遼州刺
史吐渾數千人遮道請留繼元不許自是一軍失帥不復可
用矣儔少長蕃中不樂爲郡頗出怨言繼元慮其爲變潛遣
人殺之

卷一萬八千一百
三十七第三頁

李 隱

隱鴈門人少以驍勇隸緣河十寨善騎射有胆略鈞襲位以

軍功擢授馬步諸軍都引進使累從征討性純直未嘗曲事
權要衛儔出知遼州隱惜其忠勇爲佞臣所逐頗憤惋形于
言德貴聞而惡之白于繼元卽日送嵐州安置未幾殺之

萬入千一百三十
十七第三頁

九國志卷九

南漢

唐天祐元年烈宗爲廣州節度使至後主大寶十四年國滅凡六十七年斷自高祖乾亨元年爲始凡四

主實五十五年

世家

烈宗

姓劉名隱父謙爲封州刺史有三子曰隱台巖乾寧元年冬謙卒士民謀亂隱誅之嶺南節度

使劉崇龜表爲封州刺史天祐元年朱全忠奏爲清海軍節度使梁開平元年封大彭王三年改封南平王四年進封南海王乾化元年三月丁亥薨年三十八諡曰襄乾亨元年追尊曰襄皇帝廟號

烈宗陵曰德陵

高祖

名龔初名巖又名陟謙庶子乾化元年五月甲辰梁以爲清海軍節度使三年二月龔封南平

王貞明二年八月癸巳稱帝建國號曰越改元乾寧追尊祖安仁曰太祖父謙曰代祖兄隱曰烈宗乾亨二年十一月改國號曰漢凡改元三乾亨九年白龍三年大有十五年三月丁丑薨年五十四

諡曰天皇大帝廟號高祖陵曰康陵

殤帝

名玢襲第三子初名宏度封賓王改封秦王及嗣位更今名改大有十五年爲光天元年二年

三月丙戌遇弑年二十四諡曰殤

中宗

名晟初名宏熙封晉王旣弑玢遂嗣位改光天二年爲應乾元年十一月丁亥改乾和至十六

年八月辛巳薨年三十九諡曰文武光聖明孝皇帝廟號中宗陵曰昭陵

後主

名張晟長子初名繼興封衛王乾和十六年八月辛巳襲位改是年爲大寶元年至十四年二

月宋師入城降封恩赦侯時開寶四年也八年進封彭城郡公太平興國初進衛國公五年薨年三十九追封南越王或云歸葬于韶州之越王山

列傳

劉宏操

劉宏杲

蘇章

吳懷恩

陳道庠

邵廷琄

潘崇徹

郭崇岳

劉宏操

宏操字貞度龔第九子洪澤之母弟也幼知書及長有識量大有中封萬王十一年吳權攻交趾皎公羨求救于龔龔欲乘其亂而取之遣大將梁克貞率兵南下龔自護其軍以宏操爲靜海軍節度使封交王令統衆趨白藤時吳權已殺公羨而據交趾親率衆來逆戰先于海口多植捷櫪悉銳其首以鐵冒之潮水方漲權乘船引兵挑戰宏操逐之須臾潮退戰艦爲捷櫪所絀士卒皆覆溺死者過半遂擒宏操殺之

一卷

萬八千一百三十七第六頁

劉宏杲

宏杲字日宣龔第十子母尙儀謝氏名宜清有寵宏杲十歲

封循王好步鬥復便弓馬以膽勇聞諸兄皆尙儒學或勸令讀書宏杲曰我家立功立事皆起馬上獨使我老一經乎龔以兵書教之遂略通其義光天初循州賊張遇賢自稱中天八國王擁衆數萬攻下郡邑宏杲請統衆討賊玠以其尙幼不許宏杲曰兵法尙變不尙齒也因令越王爲都統宏杲副之次錢帛館軍士方食賊衆奄至宏杲率親信數百人介甲躍馬徑入賊中殺數十百人賊爲之少却俄而越王領衆繼至與賊大戰自辰及午賊衆益盛圍我師數重矢下如雨軍人多死宏杲矢盡挺劒力戰流血滿袖裨將萬景忻等蒙以大楯翼二王以出賊亦解去宏杲以戰功授桂州觀察使未幾與晉王同謀篡弒應乾初爲諸道兵馬副元帥參政事晟

初立國中謗議騰沸宏杲請歸罪于劉思潮等晟不從反爲思潮等所譖以宏杲謀爲亂晟遣思潮偵之一日宏杲與親信飲酒第中思潮與譚令禪領衛兵排闥而入斬其首以徇

卷一萬八千一百
三十七第五頁

蘇章

章封州人少事隱爲牙將性忠厚有勇力從征譚宏圯盧琚有功薛王奏署衙內馬步軍都指揮使從隱討盧延昌于韶州隱率舟師出雙石會天大霧昏暝如夜韶人四出以鐵纜繫巨鈎投隱艦中士卒驚撓章引弓射殺數人以巨斧擊鈎皆斷折纜不能施韶人乃退翌日進逼其城城上望樓中有人罵隱言頗穢褻隱慙甚不敢視左右章伏柁樓中引弓

射罵者應弦而斃舟中皆鼓譟時江水暴漲自清遠峽以北湍瀨尤惡運糧不繼會延昌父光稠自虔州擁兵來援隱與戰屢敗乃班師韶人以兵襲我後遂捨舟而走士卒不成列隱馬斃章以所乘馬援隱因徒行爲後殿韶人不敢逼以功遷封州刺史充左右街使龔龔位命章典禁衛諸軍白龍中楚人舉舟師來伐圍封州敗我師于賀江溺死者千人龔乃遣章領神弩軍三千人戰艦百艘援之章至賀江沉鐵索水中兩岸設巨輪以挽索築連堤以隱之伏壯士堤中章以輕艦逆戰佯不利楚人逐之堤中挽輪舉索楚艦不能進退乃以强弩夾水射之楚人殲焉收戰船百艘以歸遂解封州之圍以功遷團練使童子五人俱爲中郎將豪俠任氣所爲不

軌番禺號爲五郎將章年老不能致訓會有告其謀叛者逮捕下獄悉斬之章以功得不坐慙悻成疾大有十年卒

卷一萬大

千一百三十
七第三頁

吳懷恩

懷恩番禺人事襲爲內府局丞性謹愿典宿衛二十餘年未嘗有小過玠襲位遷內常侍玠好宴樂東西兩教坊伶官千餘人常晝夜出入宮中懷恩屢言于玠曰今禁中自有蕭韶內府樂百餘人皆善音律夜宴用此足矣焉用教坊若夜雜入禁中不拘闌籍恐姦人竊發不可不慎玠不聽未幾果爲陳道庠所弑晨襲位授宮闈諸衛押番乾和六年加開府儀同三司西北面招討使與指揮使吳恂領兵侵楚親冒矢石

半歲間取梧桂六州之地以功加濮陽縣公大寶中王師取
郴連錕懼以懷恩爲桂州團練使令治戰艦懷恩馭下方嚴
臨下精至每舟成必自臨視材有良窳不等及制度疏略不
如法者必榜役工役者多怨之又造龍舟十以備錕親征舟
成懷恩以綿罍其手徧捫鉤楫匠區希彥在側運斤斬之首
墮船中左右皆驚走後數日擒希彥斬于市懷恩治兵嚴整
所至輒有功及被害國人愛之

卷一萬八千一百
三十七第五頁

陳道庠

道庠端州人父璿唐末避亂于封州力絕人隱聞其忠勇召
至帳下隨隱入廣州遷雄虎將軍卒道庠幼俊爽起家爲虎
賁郎驍果有父風大有末給事晉王府龔疾亟命以道庠爲

元帥府馬步軍都指揮使光天初張遇賢起循州大掠郡邑
道庠與萬景忻從越王循王東征遇賊錢帛館賊圍之數重
自辰及午我師殆盡道庠與景忻奮劍大呼殺十餘人賊衆
披靡于是掖二王而出玠旣立所爲不法疑羣弟圖已每宴
集則令宦官守閤供奉將吏悉露索而後入及晟將爲亂謀
于道庠玠好角觝道庠因引多力者劉思潮等數人習角觝
于晉王府中玠聞而悅焉翌日大置酒長春宮召角觝與諸
王觀之至夕玠大醉旣罷晟遣道庠等掖之因拉殺玠血濺
寢門左右皆散走晟立以道庠爲功臣領英州刺史出入宮
中賞賜優厚旣得志頗誅殺勲舊功臣劉思潮等皆相次被
誅道庠不自安特進鄧伸與璫有舊嘗遺道庠漢紀問其意

伸咤曰慙獠此書有韓信彭越事審讀之道庠大懼遂謀亂
事未及發而晨覺之乃收道庠伸下獄翌日同斬于市悉夷
其族

卷一萬八千一百
三十七第六頁

邵廷琄

廷琄循州人幼爲黃門給事禁中言論峭直與羣閹異及長
有文武材幹博覽書史尤善騎射玠襲位爲內謁者遷內府
局令總宿衛兵軍務嚴整尤重儒士有自遠方來者廷琄必
先見之爲具貲糧而後引薦多被任用大寶中遷內常侍時
張春秋已長而未知稼穡荒于游宴人心危懼廷琄每從容
言曰男兒十五奪父志今宗社安危繫于陛下願加檢愼張
建禹餘宮在城東南六十里山水奇絕張避暑多往焉廷琄

雅所愛尚因請解兵職願爲宮使鋹從之而令典兵如故廷
珣以諸戎器不甚犀利弓弩不能及遠甲鎧銷薄不可以禦
大敵乃爲樣親督工匠造之累言于鋹曰中國亂離久矣我
先朝乘其間故有南越之地五十年來嶺表無事師之耳目
不識旗鼓今國中已有真主陛下未嘗遣一介之使馳咫尺
之書珠貝犀象璫瑁翠羽積于府內歲久而不可較陛下未
嘗以修聘一旦兵至何以禦之鋹憚然不以爲慮七年王師
克郴州招討使暨彥贊戰死王師乘勝取連州鋹始懼乃加
廷珣開府儀同三司東南面招討使以舟師屯洸口王師旣
退廷珣循撫將士招輯亡叛境上肅然稱爲良將因繕治兵
甲親加訓練將復郴連會同列者嫉之投匿名書謂廷珣將

圖不軌銀信之遣使賜廷珪死士卒排軍門爭入對使者哀
訴言廷珪無反狀請加考驗弗許軍民冤病爲立廟于洗口
至今祀之

卷一 萬八千一百
三十七 第四頁

潘崇徹

崇徹南海人事龔爲內侍省局丞頗知書有鈐略乾和中晟
遣崇徹率兵攻郴州時江南將邊鎬披湖南發兵來援相遇
于義章崇徹令步將康崇保分兵爲兩翼以掩賊江南兵大
敗遂克郴州明年潭州節度使王逵率兵五萬來復郴州晟
遣崇徹領衆赴之與逵遇于壕石逵軍遠來罷乏不成列崇
徹登壕而望喜曰此成擒也乃縱兵擊之潭人大敗逵僅以
身免桂州吳懷恩爲部下所殺遣崇徹代領其衆加西北面

招討使歲餘以飛語見疑于鋹遣薛崇譽來覘其軍戒之曰崇徹果有異志卽就誅之崇譽至崇徹知其意悉以所部兵自衛以見崇譽不敢發還以白鋹曰崇徹日夕領伶官八百餘輩並衣錦繡吹玉笛爲長夜之飲不恤軍政鋹方怒會崇徹單騎來歸束身請罪鋹釋而不問但奪其兵柄自是常怏怏及王師圍賀州刺史劉守忠告急于鋹召大臣議皆請以崇徹領兵以拒王師崇徹難之辭以目疾鋹怒曰何須崇徹伍彥柔獨無方略耶乃以彥柔代領其衆彥柔至賀州爲王師所擒賀州陷鋹憂迫計無所出乃加崇徹內大司馬步軍都統領衆五萬屯賀江會王師徑趨韶州崇徹但擁衆自保不爲之援王師度馬徑崇徹請降從鋹歸朝太祖知其事特

赦崇徹以爲汝州別駕卒

卷一萬八千一百三十七第四頁

郭崇岳

崇岳番禺人宮媼梁鸞真之養子也幼爲闈人以慧黠聞乾和中爲內侍監銀襲位遷內侍中大微宮使大寶十二年王師來伐都統李承渥以全師出韶陽爲王師所敗銀震駭顧諸將無可使者鸞真卽薦其子可用乃以爲招討使與大將植廷曉統衆六萬守馬逕去番禺裁百餘里時王師已過瀧頭翌日入馬逕去我寨十里游騎據雙女山直我軍頻摩壘挑戰崇岳本無將材所統之衆皆韶英敗卒絕無鬪志廷曉欲出戰崇岳不從但堅壁自守晝夜禱祠鬼神而已王師繼至廷曉謂崇岳曰北師乘席卷之勢其鋒不易當也吾士

旅雖衆然皆傷痍舊卒今不驅策而前將坐受其斃亡無日
矣于是領前軍據水而陣令崇岳殿後禦其奔衝旣而王師
濟水廷曉力戰而死崇岳奔入營王師攻之初一夕南風甚
厲至是北風大起王師縱火燒寨崇岳大敗死于亂尸之下

卷一萬八千一百
三十七第五頁

九國志卷十

閩

司空以唐景福二年有泉汀五州地爲節度使至天德帝天德三年減于南唐歷七主凡五十二年

世家

司空

姓王名潮字信臣光州固始人唐末爲縣佐史與弟審邽審知以材氣知名號三龍屠者王緒

聚衆自稱將軍署潮爲軍正旣誅緇衆推爲主時光啓元年八月也至景福二年盡有泉汀五州之地九月戊戌唐以爲福建觀察使乾寧三年九月庚辰升福建爲威武軍拜節度使四年十二月丁未薨贈

司空

太祖

名審知字信通潮季弟景福四年冬潮有疾託審知以大事旣卒自稱留後光化元年三月已

丑受朝命十月癸卯授本軍節度使天祐元年四月封琅琊王梁開平三年四月封閩王後唐同光二年十二月辛未薨在位二十九年年六十四諡曰忠懿龍啓初追諡昭武孝皇帝廟號太祖陵曰

宣陵

嗣主

名延翰字子逸審知長子初審知寢疾命權知軍府既卒自爲留後同光四年三月辛酉唐授

爲節度使明宗天成元年十月己丑建國曰閩稱王十二月辛卯遇弒

惠宗

名鱗初名延鈞審知次子建州刺史王延稟審知養子也既與延鈞弒延翰推爲留後天成二

年五月癸丑唐以爲節度使封琅琊王三年七月戊辰進封閩王長興四年正月稱帝改元凡改元二龍啓二年永和元年十月庚辰遇弒共

康宗

名繼鵬鱗長子既弒鱗明日辛巳卽位更名昶既而稱節度使奉表于唐明年改元通文至四

年閏七月辛巳夜控宸控鶴二都兵作亂比明遇弒永隆諡曰聖神英睿文明廣武應道大宏孝皇

帝廟號

景宗

名義初名延義審知第二十八子先是被幽私第及繼鵬遇弒控鶴軍使連重遇等迎立自稱

節度使閩國王時通文四年閏七月壬午也是月改爲永隆元年又奉表于晉在國仍用天子制六年正月乙酉爲朱文進連重遇等所弒諡曰文廣武明聖元德隆道大孝皇帝廟號景宗

天德帝

名延政延義弟也延義既立封爲富沙王繼

因延義肆爲酷虐貽書切諫遂成讐敵久之

自立爲帝以建州開國號曰殷改永隆五年爲天

德元年二年三月朱文進等弑延義延政討之十

二月衆殺朱文進連重遇于天德三年正月迎延

政爲帝復號曰闡是年八月丁亥唐兵破建州出

降時晉開運二年爲唐保大三年也保大五年唐

封爲鄱陽王九年徙封光山王未幾薨贈福王諡

恭懿

列傳

王仁達

楊思恭

留從効

王忠順

陳洪進

黃仁諷

許文稹

董思安

王仁達

仁達延鈞從子也幼聰悟博覽羣書及長魁梧有機略善用

鐵槊每擐甲持槊上馬馳刺觀者稱其妙延鈞襲位仁達爲

樓船指揮使王延稟叛與其子繼雄領兵攻福州仁達舟師禦之僞立白幟請降繼雄登舟與語因刺殺之以首示延稟大慟士卒擾亂遂擊破其軍擒延稟以獻遷親從都指揮使領台州刺史性慷慨自以功高又居親衛言事頗肆胸臆延鈞忌之一日延鈞宴羣臣酒酣顧謂仁達曰趙高指鹿爲馬以愚二世其理安在仁達對曰秦二世幼冲爲強臣所蔽故有此弊今朝中官吏不滿百人長短美惡陛下皆見之動息飲啄陛下皆知之敢有蒙蔽聰明擅作威福召族滅之禍者耶延鈞大慚因賜金帛以慰之翌日加檢校太傅自是延鈞每醉卽欲殺仁達私謂所親曰仁達多智略當吾之世猶可駕馭觀其詞氣非幼主臣也後竟誣以叛誅之

楊思恭

思恭建州建陽人少俊爽好學有心計事昶爲同安尉延政聞其名辟爲節度巡官襲位遷戶部尙書時兵革屢興國力空匱命思恭爲樸射錄國事增山澤隴畝之稅魚鹽蔬果皆倍其算道路側目號楊剝皮唐兵至建陽延政遣統軍陳望帥衆拒之列寨相屬斥候甚明唐人不敢逼凡月餘不戰思恭遣使以延政之命詰責之望對曰江淮間多精兵將帥練習戰事未可輕敵陛下不以臣不肖舉國中之衆以屬于臣安危之機在此一決今之曠師非臣之怯也且欲觀其變爲萬全之策耳思恭大怒復遣讓之曰淮兵侵凌百姓叛逆睡

不交睫食不知味且彼之衆不過數千跋涉山川師無停糧將軍擁衆盈萬兵精馬壯今乘危投隙與之角戰是以石破卵也若曠日持久使其營壘堅固芻粟豐備復何望哉將軍受國重恩宜盡死力立功立事以報萬一江淮懼而自退將軍無血刃之勞何面目見陛下乎望不得已乃引兵渡水唐人張左右翼以擊我軍大敗溺死者尤衆延政降思恭遂歸金陵斬于建康市

卷一萬八千一百三十七第七頁

留從効

從効泉州桃林人少隸本城爲衙兵征臨汀以功遷冗員指揮使朱文進殺延義竊據福州以其黨黃紹頗爲泉州刺史從効與其裨校王忠順董思安同謀殺紹頗迎立于繼勳爲

刺史從効自署爲平賊統軍俄而文進率兵來攻從効開城門與戰文進敗走于是人心悉歸于從効會江南兵已平建州從効遂劫繼勳送于金陵李璟以從効爲清源軍節度使發兵屯郡中一日從効謂屯將曰此一方東漸于海與福州世爲讐敵南限廣州瘴癘之地人使不通西連鄞水皆援徑鳥道近歲干戈屢動三農廢業冬徵夏斂僅足自贍不煩大軍久駐于此屯將皆不對翌日置酒餞之郊外屯將不得已皆卷旗而去從効遂有漳泉之地李璟不能制累授從効同平章事兼侍中封晉江王從効起自行陳知人疾苦勤儉養民常衣布素涉獵史傳延納名士部內清治吏民愛之王氏有二女嫁爲郡人妻從効每給其衣食歲取進士明經謂之

秋堂周世宗征淮南從効遣衙將蔡仲興爲商人以帛書置
革帶中由岳鄂送款內附又請置邸京師世宗以其素附江
南恐其非便不許宋朝建隆初上表稱藩李璟遷于洪州從
効遣使假道吳越入貢太祖遣使賜詔書以慰之未至而衙
校張漢思陳洪進劫從効遷于東亭漢思自稱留後從効疽
發背卒

卷一萬八千一百
三十七第八頁

王忠順

忠順泉州人隸本城爲鄉軍與從効同殺黃紹頗遷爲軍校
江南兵逼建州董思安與忠順同領衆赴難延政屯西門數
戰不利延政諭之曰孤以不德致寇公等與從効首誅兇黨
克定泉南越踰巖險以兵來援見公等之忠亦也今當勉之

思安等俯伏對曰臣以必死奉報時城中衆心離散或說以去就之計思安曰吾輩世爲王氏臣今視其危而叛去天下皆皆有容我者乎衆感其言遂無叛者翌日城陷忠順力戰死之思安整衆歸泉州追兵不敢逼

卷一萬八千一百三十七第八頁

陳洪進

洪進泉州仙游人少材勇選爲州兵留從効殺紹頗遷爲指揮使從効將送紹頗首于建安迎延政爲閩王羣下以道阻賊盛莫有肯行者獨洪進請往時尤溪賊數千衆遮道不得前洪進神氣自若語賊曰朱福州已爲義師所襲殺之矣爾輩更爲何人戍守卽持紹頗首示之曰我倍道兼送之建州以進嗣君返國爾等無所歸矣賊遂潰散渠帥數人皆聽命

因從洪進至建州延政大悅擢洪進爲建州馬步軍都指揮使及江南克建州延政歸金陵李璟以留從効爲清源節度使洪進佐之出戰入守十五餘年以功遷統軍使從効卒其子紹基使江南未復少子紹鑑領留後事月餘吳越遣使來聘紹鑑夜召其使與之宴語洪進疑之乃誣紹鑑謀叛欲以其地入吳越執之送于建康推副使張漢思爲留後自爲副使漢思者且淳謹事無巨細皆決于洪進漢思諸子患洪進之奪因大宴伏甲府署中將殺洪進酒數行地忽大震屋宇皆傾動甲未及發而同謀者告之洪進遽起去洪進子文顯文顯俱爲牙校請以所部兵擊之洪進不許一日洪進累大鑊于袖從子常服安步以入府中漢思安處閤內洪進自外

鎖其中門使人叩門謂漢思曰郡中軍吏以公耄荒不能治請洪進知郡事衆情不可遏望以郡印相授漢思錯遘不知所爲乃以印與之洪進出召將吏告之曰漢思昏耄不能治事以印見授矣將吏皆賀卽日置漢思于別館以兵監守之遣使如江南請命李煜以洪進爲清源軍節度使建隆初太祖平李重進于揚州江浙皆納款洪進懼乃遣牙校奉表自稱副使言張漢思請老歸第以已領軍事太祖賜詔書慰諭乾德二年制授平海軍節度使仍鑄印以賜開寶八年江南平洪進遣其子文顥來朝貢因降詔洪進入覲至建州聞太祖崩乃還鎮發哀太宗卽位加檢校太師太平興國三年入朝遂獻所管漳泉二州之地願朝請加平章事卒年七十二贈

中書令謚曰忠順

卷一萬八千一百三十七第九頁

黃仁諷

仁諷建州浦城人少有武幹隸本城爲鄉兵以陣敵立功累遷飛捷指揮使福州林仁翰殺連重遇送首于建安迎延政歸王閩中時唐兵壓境不果行遣仁諷護送從子繼昌入守閩中以仁諷爲福州在城鎮邊使繼昌庸懦無馭下才人心不安會江南兵逼建安將吏知其必破上下思亂仁諷因之遂與李仁達陳繼珣等同謀殺繼昌而自立延政大怒收仁諷妻子戮于市發兵討之時仁達已推立卓儼明令仁諷爲城西門軍帥以并建兵仁諷知妻子已戮臨敵不顧出入奮擊建軍大敗退而謂繼珣曰忠信仁義士之所守也舍此無

以立吾頃在建安嘗攻伐今見利忘義不能慎守晚節是不忠也富沙託子于我曾不營救中道而變是無信也與建軍對敵所殺者皆鄉曲故人不仁也棄其妻子使爲魚肉是不義也此身十沈九浮旦夕歸地下何面目以見之因拊膺而哭繼珣曰大丈夫殺身殉名何顧妻子且置是事無輕泄也建軍旣退左右以其言白仁達翌日擒斬之并殺繼珣

一卷

萬八千一百三十七第七頁

許文稹

文稹泉州同安人少事審知爲給使累歷內職袒襲位遷文思院使延義立改金吾使率兵屯臨汀未幾授汀州刺史朱文進竊位以其黨黃紹頗守泉南而臨汀亦叛以應文進留

從効殺紹頗以其首送建安文稹懼乃諭郡人歸款于延政
加大尉兼侍中爲治嚴整賞罰必當吏民畏而愛之江南兵
圍建州遣將時厚卿分兵攻汀州文稹率衆拒戰擒厚卿遣
歸金陵因上表謝罪及建州陷明年文稹率軍吏赴金陵璟
復以爲汀州刺史未幾改蘄州召歸授建州刺史周顯德中
王師圍壽春潘承祐薦文稹有武幹璟令統兵數萬屯紫金
山爲周師所敗擒文稹世宗釋不誅璟割地歸款世宗放文
稹歸璟以其失律不復用歸同安坎壈而卒

卷一萬八千一百三十七第八

頁

董思安

見前王忠順傳

九國志卷十終

九國志卷十一

楚

武穆王于唐乾寧三年丙辰自立于湘南至後唐保大九年辛亥國滅凡五十七年

世家

武穆王

姓馬名殷字霸圖唐中和時孫儒劉建鋒戍蔡州殷隸軍中及儒敗死衆推建鋒爲帥殷

爲先鋒建鋒被殺衆推張佶佶讓于殷時乾寧三年五月也九月唐授殷潭州刺史光化元年三月命知武安軍留後未幾進本軍節度使梁開平元年四月辛未封楚王後唐天成二年六月封楚國王許自開國長興元年十一月己巳薨年七十九諡武穆葬于衡陽之上嶺

衡陽王

名希聲字若訥殷次子殷有子數十人嫡子希振長而賢次希聲與希範同日生以母寵

得立長興元年十一月丙戌襲位去建國制十二月唐以爲節度使三年七月辛卯薨追封衡陽王

文昭王

名希範字寶規殷第四子希聲旣沒長興三年八月辛酉襲位九月唐以爲節度使四年

正月乙卯封扶風郡侯應順元年正月壬辰封楚王晉天復四年四月加天策上將軍十一月開天

策府開運四年五月壬辰薨年四十九諡文昭是年六月漢祖劉知遠改國號曰漢

廢王

名希廣希範同母弟希範病以希廣屬拓拔恆將佐以希萼爲長恆亦勸希廣讓希萼指揮使

劉彥瑫等不欲遂奉希廣權軍府事時越希範薨之四日乙未也七月甲午漢封爲楚王十月希萼

來奔喪拒之遂構兵乾祐三年十一月希萼陷長沙戊申被害葬瀏陽門外

恭孝王

名希萼殷第三子既害希廣遂自爲楚王時漢乾祐三年爲南唐保大八年十一月丁

未也保大九年二月入貢于唐三月唐以爲楚王九月戊寅同母弟希崇指揮使徐威作亂執希萼

幽于衡山縣希崇崇既襲位國人不附復立希萼爲衡山王希崇求援于唐唐命邊鎬將兵趨長沙十

月鎬入醴陵遂趣希崇入朝十一月辛酉盡遷于唐辛未鎬遣先鋒李承識將兵如衡山趣希萼入

唐十二月唐仍賜希萼爵楚王以希崇爲節度使數年希萼薨于金陵諡恭孝希崇率兄弟十七人

奔于周

列傳

張佖 許德勳 鄧進忠 姚彥章 秦彥暉

王環 王贊 李瓊 呂師周 廖匡齊

彭玕 劉昌魯 鄧處訥 龐巨曦 彭師曷

劉言 王逵 周行逢 何景真

張佖

佖京兆長安人少通經史咸通初以明經中第累遷宣州從事秦彥暉牧宣城陰養亡命將圖江淮而兇暴多忌不爲吏民所信佖慮其害已乃辭疾去職將歸京師至汝陽值秦宗權阻兵佖往依之宗權與語大悅署爲行軍司馬會宗權叛遣衆四出屢爲梁祖所敗佖謂劉建鋒曰今天下方亂英雄角逐吾觀秦公剛鷲猜忍終不能濟大事梁王軍政精明將

士悉力一旦全師奄至吾等無賴矣不如早自爲謀建鋒孫
儒俱從儒殺宗衡自領其衆以佶爲行軍號令嚴肅衆皆憚
之及破楊行密佶有力焉行密逐趙鏐據宣州儒與建鋒領
衆西上將討行密建鋒謂佶曰今與孫公權全軍爲公刷恥
于宣州如何佶唯唯謝之于是儒盡焚維揚積聚驅其民人
大屯廣德將先平行密而後北渡及圍宣州糧道阻絕士卒
大疫反爲行密所破佶與建鋒率餘衆據湖南推建鋒爲帥
建鋒多私狎每飲酒部曲間有長直兵陳瞻者其妻有殊色
建鋒通之瞻怒以鐵撾置袖中擊殺建鋒建鋒將吏推佶爲
帥佶將入府常所乘馬忽蹏躑不止正中佶髀仆地不能起
者久之時殷征蔣勛于邵州佶謂其將吏曰吾非汝主當迎

馬公爲之于是磔陳瞻于東市遣姚彥章等迎殷及殷至佶
乘肩輿入府受其拜謁訖命殷升廳佶卽降階率將吏拜賀
請代殷攻邵州梁開平中奏授佶朗州永順軍節度使累遷
檢校太保同平章事乾化初移鎮桂林卒于治所子少敵有
武略事殷爲軍校希範襲位遷永州刺史天復中卒

卷一萬
八千一

百三十七
第十頁

許德勲

德勲蔡州朗山人少爲縣吏好讀書史任氣不羣秦宗權據
淮西德勲往依之擢爲左軍判官與殷同在帳下有州里之
舊情好欵洽從孫儒討揚州以德勲爲蹈白都指揮使時淮
上饑僅德勲所至必先固圉廩以待儒謂左右曰成吾事者

許蹈白也自是軍中謀議皆得預焉及儒敗于宣城與劉建鋒同入湖南以軍功奏授檢校太傅兼侍中殷代立以德勲爲內外馬步軍都指揮使乾寧四年淮南楊行密遣使來通好以梁祖擅朝政願與殷爲兄弟之國以絕梁殷欲許之德勲諫曰行密盜據淮甸抗衡中國明公義脩職貢于朝爲附庸一旦棄之前功盡廢他日朝廷問罪江表以我爲同惡卽王師先至湖上矣不如拒絕之乃心王室久長之策也殷從之天復中淮人攻鄂杜洪求救于朝廷詔發荆湖澧朗兵以援之殷遣德勲與秦彥暉率舟師東下時荆南成汭知梁祖將篡曲意從之乃自擁衆乘巨艦直抵夏口爲淮人所敗汭溺死德勲遂與朗州雷彥恭襲破荆南盡俘其府實及士女

伶倫工巧之徒凡數千人以歸天復三年又領兵略地荆南
還經岳州刺史鄧進忠以城歸附遷岳州刺史梁開平初淮
將冷業寇平江以德勲爲東面行營步軍都指揮使去淮軍
五里下營業以遊騎偵邏晝夜不絕德勲選習水者五人斬
木取其枝葉戴之各持長刀浮江而下夜犯業營合舉火爲
號俄而營中擾亂自相蹂藉火舉德勲以勁兵奄至大敗淮
軍斬首千餘級擒業及裨校貳拾餘人以歸天成中淮將王
彥章苗璘等寇岳州舟師萬餘人蔽江而下屯君山側殷遣
德勲率蒙矜戰艦千艘以禦之德勲謂諸將曰淮人遠來掩
吾不備今若以全師臨之必懼而遁矣乃潛師屯角子湖偃
旗臥鼓夜遣裨將王環以戰艦二千斷楊林浦絕其歸路淮

人覺之遲明淮人移軍荆江口將會荆南兵合攻岳陽德勲
選輕艦三百令裨將詹信先襲淮人且行且戰德勲擁艨艟
自後而至大戰荆江中淮人大敗斬首千餘級溺死者甚衆
擒彥章及璘以歸而行密遣使來行成且請二將殷以禮歸
之遣德勲餞彥章等德勲謂之曰楚國雖小舊臣宿將尚在
願公此歸勿以湖南爲念若須得志當待衆駒爭皂棧然後
可圖也彥章等媿謝而去自後馬氏諸子果爭立爲江南所
滅人以德勲爲知言天成二年殷建國拜右相卒年七十餘
子可瓊

卷一萬八千一百
三十七第十頁

鄧進忠

進忠湘陰人世爲士豪兄進恩唐中和初爲瀏陽鎮將黃巢

之亂江湖荒饑進恩陰養死士千人以防寇盜會巢弟黃浩
領惡少數千剽劫江左號浪宕軍轉入湖外大掠瀏陽進恩
患之乃與進忠謀率壯士伏山塚間候浩軍半過橫出擊之
浩軍大敗前後皆遁走浩僅以身免縣以事聞于州奏授進
恩嶽州刺史天復中進恩卒進中襲位天祐二年許德勳襲
荆南出戰艦臨其城進忠遣人獻牛酒開門納德勳大享將
士德勳諭以禍福翌日舉族南歸長沙賜進忠鞍馬繒帛金
銀器令權知衡州軍州事未幾奏授刺史同光中卒

卷一萬
八千一

百三十七
第二十頁

姚彥章

彥章字繼徽汝南人少倜儻有武略乾符中黃巢盜起秦宗

權召募豪俊以彥章隸帳下善用鐵槊重百餘斤每上馬盤
辟疾如旋風觀者壯之隨孫儒渡淮拔廣陵儒死宣城隨劉
建鋒入湖南領聽直軍最被親信及建鋒遇害張佖傷髀不
能視事佖與彥章首議迎殷遂遣彥章率所部逆殷于邵州
殷初疑之猶豫未卽還彥章入白殷曰劉龍驤張行軍與足
下同功一體之人也不幸龍驤有不測之禍行軍以髀病廢
是天意人望歸于足下何遽疑也殷釋然遂令彥章統衆先
歸國內既定翌日殷至代立以功遷長直都指揮使彥章建
議平嶺北五州薦李瓊爲游奕使桂州平奏授靜江軍行軍
司馬監軍府事遷檢校工部尙書橫州刺史容南龐巨曦歸
欵彥章率兵迎之遷寧遠軍節度副使知容州事殷建國拜

左相遷昭順軍節度使清泰中加兼侍中卒

卷一萬八千一百三十七第十

頁一

秦彥暉

彥暉上蔡人宗權之族弟父轍仕郡爲牙校彥暉少伉勇有知略宗權將敗族人懼禍彥暉請隨族兄宗衡討揚州宗衡爲儒所害彥暉從儒攻宣州儒敗又從建鋒入湖南爲捉生指揮使光化中殷將平嶺北以彥暉及李瓊爲五州游奕使率兵平桂林虜劉士政以功奏遷檢校太保天祐末淮將劉存劉威領戰棹攻湖南殷以彥暉爲在城都指揮使領兵三萬以禦之彥暉潛艘艫于上流以待淮人又遣副指揮使黃璠分戰棹三百艘潛瀏陽口存以舟師至越隄屢戰不利乃

遣使送書于殷以請和殷欲許之彥暉曰淮人多詐將緩我師而爲變不可信也使者回以其言白存時彥暉與存對水爲陣存登岸遙呼彥暉曰我降矣而公弗許古人有言殺降不祥公豈不爲子孫計彥暉怒曰賊踞吾城下而不擊奚顧子孫耶乃鼓譟齊進淮人遁走黃璠自瀏陽口列戰艦橫絕大江合擊之淮人大敗擒劉存至夕劉威以輕舸遁去彥暉親戮其裨校百餘人以功奏加檢校太傅開平二年領兵攻朗州殺其將區景思擒節度使雷彥恭及其宗屬雷彥雄等七人以歸朗州平遷道州刺史乾化中代歸卒

卷一萬八千一百三十七

第十
一頁

王環

環許州人少隸忠武軍秦宗權據淮西以環有勇力召置帳下後與劉建鋒從孫儒渡淮儒死宣城又隨建鋒入湖南爲捉生指揮使剽掠郡邑先登陷陣衆推其果毅建鋒死殷代立遷水軍都指揮使略地上高擒淮將劉靖奏授檢校司徒貞明初徙岳州刺史許德勲以舟師巡境上夜中南風暴起環乘風鼓棹直抵齊安城中纔四鼓矣環挂繩梯登城殺守卒十餘人引戰士直入州廨擒刺史馬鄴遲明城中驚擾德勲乃驅其官屬將吏寘入舟中大掠而歸至□口德勲謂環曰鄂人其邀我乎環曰我師入黃州而鄂人不覺今奄至城下迅雷不及掩耳當自救無暇安能邀我乃展旗鳴鼓成列而行鄂人不敢出至岳陽以所俘獻殷大喜奏以環領黃州

刺史天成初史光憲自京師還爲荆南高季昌所執奪明宗
所賜名馬妓女殷遣環與袁詮詹信率戰艦三百艘討之大
略于境上季昌遣將屯劉郎洑環進兵擊破之奪戰艦百餘
艘遂逼荆渚季昌懼請和取光憲以歸殷建國以環爲左六
軍副使長興二年卒環善治舟師能以寡擊衆布衣糲食與
士卒同甘苦每戰罷必盡索傷者扶至帳前手自療治之鐵
鉤鈐夾名膏上藥常置座右殷每部分諸將使之出征士卒
得隸環麾下咸相賀曰吾輩不畏死但獲居王六軍隊伍中
足矣其爲士卒所愛如此

卷一萬八千一百
三十七第十二頁

王贊

贊事希範爲衡山指揮使時十五餘年境內無事但以所部

營飾宮室剏脩佛廟而已贊求自試乃以爲岳州刺史乾祐
初希萼率兵攻湖南希廣以贊爲都部署率衆禦之敗朗軍
于僕射洲奪戰艦三百艘希萼奪歸武陵密遣人以珍幣通
好于贊贊拒而不荅三年希萼復大舉兵攻長沙路由岳陽
贊堅壁自守希萼不敢逼遣人謂贊曰比約與君同行今何
異心也贊曰大王兄弟尙不相容何責將吏之異心也願大
王入長沙無傷同氣臣守岳陽敢不盡臣節希萼感其言及
篡位奏授贊永州防禦使淮將邊鎬據湖南有占者云王氏
繼馬氏時議以贊有世功當應其讖鎬白于李璟乃授贊鎮
南軍節度使賜襲衣巾帶以毒寘巾帽中未幾贊腦裂而卒

李瓊

瓊蔡州汝陽人少以驍勇選隸秦宗權帳下後隨孫儒渡淮
儒敗又從劉建鋒入湖南爲親從都裨校殷代立遷本軍指
揮使時湖外初霸土宇未廣議者復請規取嶺北五州之地
乃命瓊與秦彥暉爲五州游奕使張圖英李唐爲之副兵克
永道郴連四州因水陸齊進屯全義嶺時桂州劉士政遣副
使陳可璠營嶺下指揮使王建武營秦州以拒我師彥暉三
戰不利會全義民請爲鄉導瓊詰之對曰此去西南有古路
背巖闕抵秦裁五十里雖生荆棘可通單騎瓊乃白彥暉請
以步卒三百騎兵六十以巨槩長劒啣枚夜襲秦城至建武
營纔三鼓矣時營中士卒不虞我師之至皆熟寢令騎兵分

布柵外自以牛革蒙柵門踰入士卒隨之營中亂自相蹂躪
斬首百餘汲衆遁走擒建武而歸遲明至大寨係建武以素
練示可璠營中可璠不知我師已破秦城寨猶鼓譟未信乃
斬建武投首營中士卒震駭彥暉因其驚擾以全軍擊破之
擒可璠降其將吏三千餘人欲部送歸湖南瓊曰我以七千
人討桂林若分兵以送降者前有大敵何以當之此敗軍烏
雜其心不一不如殺之以全軍直趨桂林此席卷之勢也于
是盡坑降兵自秦城以南猶有二十餘柵皆迎風而潰瓊以
先鋒兵躡之比至桂林殺戮萬計遂圍其城九日而土政降
彥暉班師殷以瓊爲桂州刺史令經略嶺南遂襲容州降龐
巨曦明年又與呂師周克韶賀梧三州瓊魁岸多力每食肉

十餘斤踞案大嚼耽耽然軍中號曰李大蟲先是桂林兒童聚戲衢路中忽相驚走曰大蟲來大蟲來至是果應瓊治桂林三年招納逋遁法令寬簡吏民便之開平中卒于治所年六十八

卷一萬八千一百三十七第十三頁

呂師周

師周廣陵人吳將蒙之裔孫也父珂少以勇敢隸楊行密帳下累戰有功遷黑雲都指揮使師周少勇敢任氣隨父征討臨陣未嘗介甲金創被體而談笑自若衆皆服其果毅珂卒行密令代其父爲指揮使天祐初副指揮使綦母章以所部兵屯上高與湖南爲敵境累戰殺傷者萬餘人遷袁州刺史師周性豪率頗通緯候及兵書自言世將家子不可保富貴

每恣爲杯酌狎客常十餘人醉必起舞或擊節狂歌慷慨泣
下行密聞而疑之密遣人偵其動靜師周不自安乃謀于基
母章曰吾與湖南對壘有日矣觀其營上雲飛常紛紛然未
易敗也馬公寬仁待士有禮吾欲逃死馬公以爲如何章曰
公自圖之章舌可斷而言不洩也乃遣牙將呂蔚通欵于我
開平初以所部兵大獵境上因歸于湖南章縱其親隨之人
殷聞師周至甚喜曰吾方圖嶺表得師周足矣卽以爲步軍
都指揮使領袁州刺史明年率兵攻昭賀梧蒙龔富等州與
劉隱十餘戰而克之奏授韶州刺史乾化中領兵破飛山蠻
斬其帥潘金盛諸蠻悉歸欵奏遷檢校太傅清泰中卒

卷一
萬八

廖匡齊

匡齊有武幹事殷爲決勝副指揮使天成末從許德勲討荆南屯兵沙頭高季昌之子從嗣爲雲猛指揮使驍勇無敵一日單騎薄德勲營衆不敢出匡齊怒言于德勲曰此驂童也請爲公擒之乃介馬援槍而出與從嗣格鬪良久匡齊僞墮馬從嗣奪槌以擊之反爲匡齊所擒時季昌以數十騎觀于臺上見其子被擒亟令騎士來請及入營匡齊已拉殺之矣季昌大慟翌日遣使請成匡齊以功遷決勝指揮使性簡傲使酒因爭酒令毆同列黜爲邵州教練使未幾復舊職討溪州蠻中流矢而卒

卷一萬八千一百三十七第十四頁

玕吉州廬陵人世居赤石洞爲酋豪黃巢之後江表寇盜蜂起玕于鄉里保聚徒衆得數千人自爲首領捕逐羣盜有功本州補玕永新制置使玕雅好儒學精左氏春秋當兵荒之歲所在饑饉玕延接文士曾無虛日治具勤厚人多歸之廣陵筆工李鬱者善爲詩什玕嘗貽書與鬱以白金十兩市一筆又令鬱訪石本五經卷以白金百兩爲直廣陵人相謂曰玕以十金易一筆百金酹一卷況得士乎于是蕭謨等數人咸往依之鍾傳據江西其裨將韓德師叛傳令其弟瑊攻破之斬獲甚衆軍政嚴肅樵採不犯傳以瑊爲吉州刺史未幾以玕代之玕以傳爲輔車之勢會傳死楊行密將破攻豫章虜鍾匡時玕懼將圖據湖南先遣其黨敖瞻李緒來致書于

殷且覩殷之起居殷勞之翌日大宴府中將吏畢集以瞻爲
上客瞻等歸以語玕曰馬公龍髯鳳眸大人之表其將吏輯
睦少長有禮未可圖也玕默然開平中撫州危全諷率袁吉
之衆以復豫章至象牙潭淮將周本擊破之玕乃以所部并
其族千餘人歸欵于我殷發兵境上援其輜重至卽奏授郴
州刺史隴西鄴公以希範聘玕女天成中玕卒年七十三兄
鄴弟瑊子繼英繼勲

卷一萬八千一百
三十七第十四頁

劉昌魯

昌魯字安國相州鄴縣人唐末明經登第釋褐項城主簿累
遷至尙書郎乾符中出爲高州刺史黃巢寇嶺南郡縣離析
昌魯使其居民據保障以自守一境獲安就遷防禦使劉隱

入廣州遣其弟龔領兵攻高州昌魯率勵丁壯逆戰于城外
大破龔軍自以地小力寡終慮爲隱所吞開平初乃致書于
殷曰僕昔占籍鄴中受恩唐室莅高三歲遏黃巢之亂收合
生齒堡于掠山因深爲壑憑高作壘攻苦食淡以勤士卒洎
盜賊平定一境獨全高掠之民至今相戴而中原多故嶺南
不賓劉隱亂常僭興師律舉蠻貊之衆成吞噬之心僕常訓
勵甲士躬當矢石掃壘一戰劉巖遁走雖仗義者必勝恃力
者必亡然而山越之人瘡痍衆矣殘民以逞所不忍爲昔古
公去豳竇融歸漢千古之下迭爲推美僕雖顓愚景慕前烈
竊惟明公負江湖之固有桓文之業土宇至廣仁風素厚願
以所部歸款于執事謹刺血染翰上達誠悃惟明公圖之殷

覽書甚喜卽遣指揮使張可求率兵迎之昌魯盡輦其帑庫及士卒千餘人歸于湖南奏授永順軍節度副使兼行軍司馬天成中卒

卷一萬八千一百三十七第十五頁

鄧處訥

處訥邵州龍潭人少爲州兵累遷至軍校唐乾符中從閔頊征蠻于安南黃巢之亂盜殺潭州觀察使李巢城中無主會頊自安南回以所部兵駐郡中傳檄諸州同捍寇盜境內以安遣使奉表于朝詔以頊爲檢校右僕射欽化軍節度使潭州刺史處訥從頊久在安南及是欲歸邵州省其親族頊回署處訥爲邵州兵馬留後未幾衡州刺史周嶽舉兵襲頊殺之因據長沙處訥縞素發哀召集將吏諭之曰閔僕射駐軍

長沙親捍寇盜布衣糲食以養士卒救民于塗炭恩德厚矣
不幸爲鼠輩所圖今欲與諸軍問罪于周嶽可乎衆皆曰留
後爲善人雪冤敢不從命乃以精卒二千襲嶽殺之梟首于
東市遂據其城慰撫將吏中外胥悅時景福二年也旣而州
人以狀聞于朝廷詔以處訥爲湖南節度兵馬留後乾寧元
年劉建鋒領衆自豫章至處訥遣其鄉豪首蔣勛等領步卒
三千斷龍回關殷先至關召勛等諭以禍福仍許奏授官秩
勛衆皆喜是夕乃棄鎧甲旗幟潰邵州明日建鋒令前鋒兵
盡被邵軍鎧甲張旗幟直趨潭州薄城東門守陴者不之覺
且謂邵軍之回也門啓前鋒兵徑趨府中將吏驚走是日處
訥內宴集寮屬了無備禦裨將朱全節就擒處訥斬于長史

橋側

卷一萬八千一百
三十七第十八頁

龐巨曦

巨曦不知何許人唐末爲容州觀察使精天地緯候之學黃
巢入廣南巨曦括部內諸蠻得數千人親自選練分屯險隘
巢寇憚之不敢犯其境以功加寧遠軍節度使開平初高州
劉昌魯率衆歸附殷遣姚彥章李瓊率兵迎之長驅而南前
鋒至容州巨曦將歸款于我乃大享將上而謂之曰李瓊甲
馬雄盛乘席卷之勢必來侵我何策以禦之裨將莫彥昭對
曰瓊軍遠來士卒疲乏請盡徹儲糧潛兵山谷空城以待之
瓊至當據吾城外無救援我以全師掩其不備浹旬之間瓊
可擒也巨曦曰吾觀楚氣甚銳未易破也不如以斗酒犒其

軍爾輩不失爲富家翁足矣彥昭不從巨曦殺之迎勞瓊瓊以軍徑赴城中俄而廣南劉隱率衆來我師不能守于是盡輦其府實驅其人民以歸巨曦挈其族數百口隨歸長沙殷久聞巨曦之名遣使慰勞卽日奏授檢校太傅領容管經略使巨曦在嶺南嘗占翼軫間有善星因謂所親曰劉隱兄弟不道殘害良善吾終當逃難于長沙至是果歸附人或問湖南與淮南國祚長短巨曦曰吾入境來聞童謠曰三羊五馬馬子離羣羊子無舍自今以往馬氏當五主楊氏當三主後皆如其言貞明中卒年七十六

卷一萬八千一百三十七第十九頁

彭師曠

師曠溪州人世爲諸蠻酋長父仕然唐末溪州刺史其地西

接牂柯兩林南抵桂林象郡東北控澧朗方數千里山水險惡舟車不能通其蠻有六種盤氏爲大卽盤瓠之種也俗無文法約束繫于酋長當仕然之世昆弟強力多積聚故能□脅諸蠻皆歸之勝兵萬餘人春夏則營種秋冬則暴掠而長沙四境最被其患天復五年仕然遣使通款于蜀且請兵同寇澧朗辰三州大略縣邑希範遣指揮使劉勅劉全明率衡山步卒五千以救之勅等擊破其兵仕然遁去遂進兵襲溪州州在山頂爲堡四面斗絕勅選壯士緣崖梯山縛棧道以圍守之仕然夜舉烽火以集蠻軍勅于溪澗中置毒蠻軍至飲其水者皆病嘔不能戰死者甚衆一日南風暴起勅以火箭射堡中盡焚其廬舍蠻軍多死仕然乃率所部夜逾絕險

遁入獎州遣師曷率諸蠻酋長田汧贊單行方向存祐羅君
富等攜牌印納欵于勅班師與師曷等歸長沙釋其罪厚
賜而遣之奏授仕然溪州刺史兼溪洞招撫使以師曷補武
安軍牙校師曷有勇力善射累從諸將征討有功遷衝山指
揮使希廣襲位改強弩指揮使領辰州刺史希萼舉朗州之
衆以攻湖南列戰棹于水西軍勢甚盛師曷登城觀之白希
廣曰朗人驕而輕雜以蠻兵其勢易破請假臣步卒三千人
南自巴溪渡江趨嶽麓後夜擊之請令許可瓊以舟師陣于
山前破之必矣希廣因與可瓊謀堅沮止之翌日師曷見可
瓊于軍門坐談戰事師曷瞋目叱之曰汝反文在面卽日當
投敗何庸論戰耶拂衣而去乃白希廣請誅可瓊希廣不從

師曷退而歎曰禍亂如此王稔惡無斷敗亡可待矣及朗軍
攻長樂門可瓊果束甲以入于賊城陷師曷被擒希萼命釋
之師曷溪洞人性獷直不喜阿附屢爲希萼以罪笞責及希
崇篡立令師曷銜送希萼囚于衡山欲使殺之于路而師曷
奉事彌謹終以保全因與指揮使廖偃同謀立希萼爲衡山
王後隨希萼歸江南李璟聞其忠節擢爲殿直指指揮使後卒
于金陵

卷一萬八千一百
三十七第二十頁

劉言

言吉州廬陵人少事彭玕爲伍長以勇幹聞開平中玕納款
于湖南言從歸長沙希範卽玕之壻也出鎮朗州召言爲牙
校及希範襲位溪洞酋長多求款附乃以言知辰州軍事以

鎮撫諸蠻使之未幾奏授辰州刺史希萼入湖南百役繁興
靜江軍指揮使王逵周行逢叛歸朗州初希萼令其子光贊
爲朗州留後逵至廢之以馬希振子光惠權軍州事光惠庸
懦不能馭羣下但酣醬淫戲而已將吏患之逵等懼亂遂與
行逢謀遣人往辰州請言爲副使言素知逵等兇暴謂其徒
曰南方禍亂方始今若不往必加于我矣于是盡留所步以
單騎行逵等遂廢光惠推言權留後事時周廣順元年也言
旣立遣使詣闕上表又遣使納款于李璟求授節鉞璟未之
許也會希崇逐希萼而自立請援于江南璟遣其將邊鎬率
師入長沙盡俘馬氏之族歸于金陵二年冬璟又下詔召言
入覲言不行因令副使王逵行軍司馬何景真指揮使張傲

蒲公益朱全琇字文瓊周行逢彭萬和潘叔嗣張文表等號十指揮使同率兵攻湖南逐邊鎬鎬奔歸江南言乃以達權知潭州軍府事遣使詣闕上表且言逐江南賊軍復馬氏土疆之意周太祖遣使來宣慰三年正月言又遣使上表以長沙經兵火焚毀請就以朗州爲治所周太祖下詔升朗州爲大都督府在潭州桂州之上以言爲檢校太師同中書門下平章事武平軍節度使達爲潭州刺史武安軍節度使景真爲桂州刺史靜江軍節度使指揮張傲而下並領刺史爲節度副使或行軍司馬皆言奏請之也是月又遣牙校張崇嗣置邸京師歲時修貢周祖下詔賜言舊屬湖南在京及諸處莊宅邸時王逵爲節度使周行逢爲行軍司馬專制湖南

威雄漸盛言懼其爲變將圖之達與行逢謀先六月達率所部兵入朗州殺言部將鄭玟收言囚于別館誣奏言與江南通謀誘引淮賊將并潭朗之地以歸金陵八月周祖下詔奪言官勒歸私第委達以便宜安置復下詔令達歸治潭州乃以潘叔嗣權知朗州軍府事未幾令叔嗣殺言于武陵初民間謂爲劉黻牙馬氏將亂湖南有謠言曰馬去也不用鞭黻牙過今年及邊鎬入長沙盡俘諸馬歸金陵鎬尋爲王達所逐奔歸江南是歲言亦爲叔嗣所殺皆其驗也

卷一萬八千一百三十七

第十
五頁

王達

達朗州武陵人或名進達少以驍勇選爲靜江兵希萼入朗

州累遣討賊有功遷本軍指揮使乾祐三年希萼攻湖南令
逵領戰棹爲前鋒陷長沙希萼旣立逵有力焉時剽劫之後
城中帑庫盡以焚毀賞賜不足又重構府署執役者皆靜江
士卒相與怨憤聚而謀亂副指揮使周行逢聞之以告逵曰
士卒怨懟深矣不早爲計難將及我是夕乃擁其衆以長柯
巨斧斬關以出遂歸武陵時希萼亦醉遲明始遣裨將唐師
翥領兵追之不及因徑趨朗州士卒皆重足不復成列逵先
已入城伏卒門下師翥至逵縱兵擊之師翥大敗追殺殆盡
師翥僅以身免逵乃逐留後馬光惠請辰州刺史劉言爲帥
未幾長沙兵亂指揮使徐威等廢希萼而立其弟希崇囚希
萼于衡山行軍司馬廖偃與指揮使彭師晟共立希萼爲衡

山王將納之希崇懼納款于江南且請兵爲援李璟遣其將
邊鎬率師入長沙盡遷馬氏之族歸于金陵璟以鎬爲武安
軍節度使又遣將劉仁贍率師取岳州鎬將圖朗州密白璟
請召言入覲言不行謀于達曰江南召我不往必加兵于我
矣爲之奈何達曰鎬之此來以制置潭朗爲名公如東行正
入其算武陵負江湖之阻帶兵萬衆乃欲拱手臣異姓乎鎬
新至長沙經略未定乘人心憤怒引兵攻鎬可一鼓而擒也
言然之乃遣與何景真等同起兵于武陵號十指揮使以攻
邊鎬達率舟師南上至長沙邊鎬大駭以所部奔歸江南諸
州屯守皆罷去盡復湖外之地時廣順二年冬也達遂據長
沙與劉言同遣使上表于朝三年正月周祖下詔褒諭以達

爲武安節度使逵出于行陣木無鈴略不能馭羣下時諸指
揮使受詔爲節度副使者數人多留長沙各置牙兵分廳案
事軍政淆亂將吏患之每宴集府中喧呶如市逵莫能禁止
會廣兵乘間盡取梧桂郴連之地逵率衆南征敗于壕石而
還時何景真朱全琇同在武陵與劉言不協各謀爲亂言又
以逵專制湖南慮其難制將并長沙之地逵大懼因與周行
逢謀召景真全琇領兵討桂林至皆殺之又殺張傲于府中
景真之姻也乃率所部兵襲武陵幽言于別館誣奏言欲併
潭朗歸欵于江南周祖下詔委逵以便宜處置逵旣殺言遂
移治武陵時顯德元年也世宗下詔以逵爲武平武安等軍
節度使三年世宗征江南詔逵爲南面行營都統以所部兵

逼鄂州攻其長山寨而還復領衆逼宜春道出長沙耀兵金
波亭有蜜蜂集繖蓋中占者以爲不利遂留長沙令行營副
使毛立領兵南下以潘叔嗣張文表爲前鋒叔嗣怒至豐陵
擁衆而還遠聞兵叛乃棄輕舸奔歸武陵叔嗣追殺之于朗
州城外

卷一萬八千一百
三十七第十六頁

周行逢

行逢武陵人少無賴與王逵同里俱爲靜江兵事希萼爲小
校從希萼攻湖南陷長沙靜江軍叛隨逵入朗州破追兵于
城門下殺千餘人逵攻邊鎬令行逢領步卒趨益陽拔其寨
殺江南兵二千餘人擒其將李建期逵平湖南周祖下詔以
行逢爲集州刺史充武安軍節度使行軍司馬劉言將併潭

朗達聞而憂之以語行逢行逢曰言本江西反徒景真全琇
今□無職相與爲亂必矣會廣南兵寇全義行逢乃與達
密謀白于劉言請以景真爲南面行營招討使全琇爲先鋒
令會兵于湖南比至皆殺之達攻劉言于武陵以行逢權知
潭州軍府事顯德元年世宗下詔以行逢爲武清軍節度知
潭州軍府事達奉詔領軍征宜春至長沙不行遣副使毛立
潘叔嗣張文表統衆南伐行逢久專湖南之務頗任威刑達
屢以言規之行逢不悅叔嗣又怒達卽安而令已起難頗出
怨言叔嗣將行行逢餞之泣曰吾見師之入也叔嗣懼至澧
陵邑吏請以牛酒犒師毛立不許士卒皆怒叔嗣乃與張文
表械立送于行逢明日擁衆回長沙叔嗣旣殺達乃迎行逢

歸治朗州行逢至懲王逵之亂斬叔嗣以徇遂自領兩鎮留
後遣使奉表詔以行逢爲朗州大都督武平軍節度制置武
安靜江等軍事乃表宇文瓊爲武清軍節度使張文表爲衡
州刺史領親衛都指揮使彭萬和爲永州防禦使觀察判官
李觀象通判軍府事釋毛立爲水軍都指揮使行逢旣得志
恣行誅戮逵之子弟及門將吏死者百餘輩性猜忌每遣人
伺察郡縣守宰有聚飲偶語者必逮捕下獄以謀反誅宇文
瓊彭萬和與行逢族兄飲酒疑其謀叛夜遣甲士圍其第盡
擒殺之麾下之人皆重足脅息五年朝廷遣使儲魚鹽于境
上行逢懼乃繕治戎器增築城壁閱諸州鄉兵大修武備皇
朝建隆三年以疾卒年四十六葬武陵之肩山子保權嗣行

逢性殘忍然爲治嚴整不徇私黨躬履儉約以率羣下辟署官吏必取廉介之士條教簡約民甚便之有女壻求補吏不許給以耒耜而語之曰吏所以治民也汝才不能任職豈敢私汝以祿姑歸墾田以自活也其妻嚴氏不入府署躬率奴僕畊織以給賦調人民化之率務稼穡四五年間倉廩充實尤崇信釋氏常設大會齋緇車畢集行逢徧拜之捧施執悅親待滌洗因謂左右曰吾殺人多矣不假佛力何以解其冤報乎

卷一萬八千一百三十七第十七頁

何景真

景真武陵人少以強武隸朗團軍希萼入朗州署步軍都指揮使乾祐三年希萼攻湖南命景真率步騎三千出竹柵屯

兵楊柳橋以逼其城湖南指揮使韓禮率步騎五千陣于橋西景真登橋望之見旗幟不整曰此非我敵也乃縱兵擊之潭人大亂奔入城中體被破傷至其家而卒明日城陷希萼之攻長沙也以其子光贊守武陵至是旣平湖南乃以景真爲朗州衙內指揮使以翊光贊王逵周行逢叛于長沙以所部兵奔歸朗州廢光贊奪其印綬而立馬光惠景真不能拒後又與王逵同請劉言爲帥會希崇逐希萼而自立請援于江南邊鎬率師入長沙劉言王逵同謀逐鎬乃結景真爲十指揮使率舟師同攻湖南鎬遁走奏授景真檢校太尉靜江軍節度使景真求歸治所言不許留于長沙與王逵不協求歸朗州許之時劉言已爲使相景真不能下之每使酒悖慢

言不勝其忿且意王逵等遣景真伺已也將誅逵景真亦欲
殺言以據朗州事未及發逵皆偵知之因與周行逢密謀將
先誅景真後圖劉言會廣南兵入境因僞召景真爲招討使
會兵于長沙景真卽日以牙兵百餘人徑往湖南逵迎勞于
郊相見甚歡館于馬氏之故第宴飲彌日多選妓女寘幄帳
中景真留連月餘逵乃遣人僞自朗州來者傳劉言之命就
詰景真曰邊寇搶攘委公以戎事公耽淫縱酒遲留不發太
師以公觀望命械公歸西府時景真已醉恟怩不知所爲乃
俛首就縛送朗州殺之于路

卷一萬八千一百
三十七第十八頁

九國志卷十二

北楚

武信王子梁開平元年據有荊州旋得歸峽至宋乾德改元國除傳襲四世五帥凡五十七年按歐史作南平十國紀年及宋史作荆南

世家

武信王

姓高名李興字貽孫陝州硤石人本名季昌避後唐諱更今名初隸朱友讓得見全忠奇

其才命友讓畜爲子冒姓朱氏補制勝軍使天復三年拜宋州團練使徙潁州防禦使復姓高氏梁開平元年五月拜荆南節度使乾化二年八月封渤海王龍德三年十月戊寅梁王入覲于後唐同光二年三月丙午封南平王天成二年因掠唐所部送蜀貨削官爵乾亨二年六月稱藩于吳是年十二月丙辰薨年七十一諡武信葬于江陵城西之龍山鄉

文獻王

名從誨字遵聖季興長子旣襲位吳以爲節度使懼唐見討復修貢職時爲嗣位之明年

唐天成四年也是年七月唐復以爲節度使追封李興爲楚王長興三年二月賜爵渤海王應順元年正月改封南平王荆南介于吳楚自吳稱帝而南漢閩楚皆修貢中原假道境上自李興以來邀掠貨物諸道移書誚責卽復還之亦無慙色其後南漢與閩稱帝從誨所嚮稱臣利其賜子諸國目爲無賴子又曰高無賴漢乾祐元年十一月癸卯薨年五十八葬龍山鄉明年漢加諡文獻

貞懿王

名保融字德長從誨第三子漢乾祐元年十月丁丑薨以爲荆南節度使周廣順元年

封渤海郡王顯德元年正月丙子追封南平王朱建隆元年八月薨年四十一葬龍山鄉宋加諡貞懿

侍中

名保勗字省躬從誨第十一子保融同母弟也保融卽世宋以爲荆南節度使建隆三年十一

月卒年三十九贈侍中

侍中

名繼冲字成和保融長子保勗旣歿宋以爲荆南節度使乾德元年二月宋師至納土出降十

月至闕下授武寧軍節度使鎮彭門幾十年開寶六年卒年三十一贈侍中

列傳

李景威

李景威

景威公安人幼隸于軍頗有智略累以戰功遷雲猛指揮副使保勗以爲衙內兵馬副使繼冲嗣立多委任之初聞慕容延釗等伐張文表景威乘間見繼冲曰今王師雖稱假道以收湖湘然觀其勢恐因而襲我景威欲效犬馬之力願假兵三千人于荆門中道險隘處設伏候其夜行發伏攻其上將王師必自退却回軍收張文表以獻于朝廷則公之功業大又不然則有搖尾求食之禍繼冲曰吾家世世貢奉朝廷必無此事爾無過慮況爾非慕容延釗之敵也景威又曰俗傳

江陵諸處有九十九洲若滿一百則有王者興自武信王之
初江心深浪之中忽生一洲而滿百昨此洲漂沒不存茲亦
可憂繼冲又不聽景威知計不行自扼吭而死及王師入城
繼冲悔不用其言太祖聞景威之計曰彼忠其主也命王仁
贍厚恤其家

卷一萬八千一百三十七第二十四頁

九國志卷十二終

九國志拾遺

行密以唐景福元年再入揚州至晉天福二年爲李昇所篡

五代史吳世家注

陳儒同安賊也

通鑑二百五十五卷注

盧延昌歸命于吳僞乞命于梁

通鑑五代史吳世家注

吳楊渚十二年冬十月捨東塘之楊林江水出大浦以燃燭

六帖七

楊溥巡白沙太學博士王穀上書請改白沙爲邇蠻其略曰

日月所經星辰盡爲黃道蠻輿所止并邑皆爲赤縣

通鑑二百七十一卷注

注三

溥能委運壽終不罹篡殺之禍深于機者也

通鑑二百八十一卷注

吳殷文圭舉進士奎中遇一雙目文圭久之謂人曰向者一人眉緣拳必人口神仙狀也如學道當冲虛不爾有大名于天下而文圭拳實入口乾甯中擢第

六帖三十一

徐溫嘗自迎鑾還至百家灣暴風起舟人相顧失色溫乃袒裼以帛繫環首顧謂妾御曰吾善游儻溺不暇相救幸保此子言訖風浪漸息

六帖二

景以保大十五年正月改元交泰是歲盡獻進南十四州畫

江爲界

五代史南唐世家注

吳初朝中大臣多蔬食月爲十齋齋之明日太官具晚膳始復常珍謂之半堂食至是果盡割淮南之地去唐土封疆之

半

六帖十六

楊璉拜陵至竹篠口維舟大醉一夕而卒

通鑑二百八十二注

吳越錢鏐少在軍中未嘗寢末年少倦乃刻木爲枕以自警
或命諸孫諷詩以達旦晉天福中契丹使至朝廷以近侍李
泳爲監伴使虜有判官者幽薊人謂泳曰吳越常不睡乎泳
詰其故對曰嘗聞五臺山王子大師言浙中不睡龍今已歸
矣訪所聞乃長興壬辰之後也

六帖九十五

吳越錢鏐嘗歲除夜宴命諸子及諸孫鼓胡琴一再行遽止
之曰人將以我爲長夜之飲也

六帖六十二

有胡僧以玉羊一獻于鏐曰得此當生貴子元瓘果以丁未

歲生

六帖九十六

馬綽餘杭人少與錢鏐俱事董昌以女弟妻鏐鏐復爲元瓘

娶綽女

通鑑二百八十二注

王建以唐大順二年入成都爲西川節度使天復七年九月

建號明年正月改元武成

五代史前蜀世家注

明宗出啟夏門駐華嚴寺晡晚出幸南山之莎城駐于石門

山之佛寺

通鑑二百六十注

建將七夕出遊先一日元膺召諸軍使及諸王晏飲邸第中

且議七夕從行之禮而集王宗翰等不至

詰朝元膺入白

建曰潘峭毛文錫離間兄弟將圖不軌

及聞唐襲徵兵乃

遣伶官安悉香諭軍使全殊率天武甲士以自衛

明日徐

瑤常謙與懷勝軍使嚴璘等協謀以所部兵挾元膺以逐唐

襲元膺介馬帥卒過其兄宗賀之門召與同進宗賀曰兵起

無名不敢聞命 建急召宗侃宗賀及諸軍使令以兵討寇

乃逐唐襲至城西斬之盡殺屯營兵又自大安門登陴以入

攻瑤謙等

通鑑二百六十八考異

蜀許寂少學劒居四明一夕有村民夫婦揭壺酒訪寂而飲
迭謠以歡寂寂飲訖聞室中曼曼有聲視之有數劒飛躍寂
甚懼夫婦顧寂笑曰奉以薄技佐酒何懼也及舉手叱劒皆
入指端至夜分乃去明日有二僧至寂以其事語之僧曰知
君好劒術欲來相教耳願公無好學神仙清淨事異於此諸
俠皆鬼爲陰物故婦人與僧尼皆學之言訖命水洗足以淨
水拭之騰空而去

六帖十三

蜀杜光庭黃巢之亂從宰興元途次西縣遇陳休復有道術

與光庭憩于路左軍中以拄杖掘地得酒一壺酌之不竭光庭因問車駕何時當還荅曰五年後龍星動卽歸矣果如其

言

六帖三十二

蜀林知元所居有茂林修竹爲山石之娛嘗駕三輪車命僮牽之隨意所至

六帖十一

王處回積鉅萬計蜀中富家罕與比在大原家甚貧善相者周元豹每指謂知詳曰此子寶精也它日當大富果如所言

六帖二十一

王潛夜宴盜入其家盡取飲具逮明方知笑曰亦好飲耶竟

不問

六帖二十七

劉閔乾祐七年閔卒享年六十子承鈞立時年二十九喪服

三年服除改十年爲天會元年

五代史十國世家年譜注

劉崇之長子曰贊少慧黠高祖憐之錄爲己子

通鑑二百八十九注

契丹古匈奴之種也代居遼澤之中潢水南岸南距榆關一

千一百里榆關南距幽州七百里

通鑑二百六十六注

契丹宴犒漢使必厚具酒肉以示夸大高祖鎮河東嘗命韋

曜北使曜羸瘠不能飲酒虜人強之遂卒

通鑑二百九十考異

南漢楊洞潛存水令梁愚堂謝洞潛見之謂同列曰愚血脈

貫眸子行步矍鑠類驚麕者當有風雷之厄及愚至縣未幾

颶風壞廨壓死

六帖三十一

閩王氏七主六十年審知同光元年卒在位二十九年鑄在

位十一年

五代史十國世家年譜注

馬殷以大中六年歲在壬申生以長興元年卒享年七十九

是歲子希聲立長興三年卒

同上

唐閔蔡結皆以郡人聚兵據郡陳彥謙桂陽人殺刺史黃岳

據郴州魯景仁本從黃巢以病留連州遂拔之

通鑑二百六十一注

光化二年殷克桂州

通鑑二百六十二考異

乾祐三年辛亥

同上

楚馬希聲海商有鬻犀帶者直數百萬晝夜有光洞照一室

希聲殺商而取之逾月光遂滅

六帖十二

馬希範十八學士李鐸潘起曹悅李莊徐牧彭繼英裴頴何

仲舉孟元暉劉昭禹鄧懿文李宏節蕭洙彭繼勳拓拔恒李

宏皐廖匡圖徐仲雅

通鑑二百八十二注

楚馬希振天祐初殷爲娶洪川鍾傳女資從甚厚有玉腕照

夜珠希振以非人臣所玩皆納之於殷

六帖七

楚廖光圖與伊岳道士伊用昌爲林泉之交母病思鱸屬江水夏漲魚不可得用昌探懷出一木獺長三寸許再三祝之投於江中須臾波浪沸遂擒一巨鱗出獺着魚背堅不可脫用昌舉之木獺耳因作鱸母愈

六帖三十一

按宋路振九國志五十一卷末二卷北楚張唐英補撰明焦竑國史經籍志箸錄四十九卷不知何由誤題爲曾顏然可見萬歷時振書猶未佚也今傳鈔本十二卷乃邵氏晉涵從永樂大典錄出周氏夢棠重爲編次凡列傳百三十六篇邵氏編校舊五代史嘗采取之其世家全闕周氏据歐史略注

於卷首檢十國世家年譜注間及九國志不盡相合而通鑑
考異及注孔氏六帖所引數條亦此本所無因掇錄附後中
如柴再用傳昇牀事王宗壽傳鐵鏡事及陳休復伊用昌諸
條未免近小說家習氣然大致質實本末詳備足補正史之
漏略惜吳志伊作十國春秋時猶未及見此也錢熙祚識



